

NATIONAL ASSEMBLY OF SEYCHELLES

Wednesday 30th March, 2022

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour manm staff ki pe asiste nou e nou piblik a lekout, mersi pou zwenn nou. Nou pe pran Mosyon Manm e premye Mosyon. Onorab Pillay, *yes what is it? Point of order?*

HON SEBASTIEN PILLAY

Mersi Mr Speaker. Bonzour Mr Speaker. Mr Speaker, mon annan 2 pwen ki mon oule demann ou, ou gidans lo la. Premyerman Mr Speaker, i konsern sa size SBC i vin devan Lasanble.

Mon'n swiv Nouvel yer swar e mon'n swiv bann *statement* ki'n ganny fer par SBC an relasyon avek si zot pou vin dan Lasanble. E zot in dir ki SBC i devret ganny reprezante par son *Board* e Sef Egzekatif ler i ganny demande

pou paret devan Lasanble Nasyonal.

Sa i ava donn lasirans tou bann parti prenon ki pa anba kontrol Gouvernman.

SBC in osi dir ki pou Minis Lenformasyon vin devan Lasanble Nasyonal pou reponn kestyon spesifik lo zeson e gouvernans SBC, i pa an ankor avek ...lasyon ki sa lenstitisyon i travay dan en fason endepandan.

So pou mwan mon realize ki i annan en keksoz ki serye la akoz yer ler mon'n avoy sa kestyon, se Vis-Prezidan ki'n vin reponn sa kestyon e napa okenn Manm *Board* SBC, oubyen CEO SBC ki'n vin devan Lasanble.

Pou mwan sa i en vyolasyon privilez Lasanble. Alors mon oule demann ou gidans. Ki mannyer alors ki nou koman Manm Lasanble - tou Manm Lasanble, nou pou kapab kestyonn SBC lo son travay? Akoz i paret ki ler mon'n seye yer, Vis -Prezidan in vin dan Lasanble li tousel, si in kontakte SBC pou vin ek li, nou pa konnen.

Lasanble in aksepte pou li vin li tousel e sa ki pe ganny dir dan SBC i kontradwir prezans Vis-Prezidan dan Lasanble Nasyonal. E si nou pe koz lo bann lenstitisyon endepandan

Mr Speaker, Lapolis i endepandan anba Konstitisyon, me Minis Fonseka in vin ek Komisyoner Lapolis pou reponn tou kestyon ki adrese anver Lapolis.

So lo sa premye size mon ti a kontan demann ou, ou gidans.

MR SPEAKER

Mersi. Les mwan adres sa premye pwen, apre ou dezyenm pwen.

Bon, les mon a dir en keksoz avan. Premyerman Onorab Pillay, mon'n fer kler dan Lasanble poudir mon dakor ki bann Manm i met devan Lasanble, bann size ki konsern kondwit Lasanble mannyer i fer son travay.

Me selman mon'n demande osi ki sa ki oule fer sa, en *statement*, i adres mwan e i dir mwan poudir i pe al fer, i ti a kontan fer sa *statement*. E sa i dan *Standing Orders*.

So, avan mon ti a demann ou pou note sa avan mon adres ou pwen. Prezan avan nou al lo ou pwen, mon a les Onorab Georges e Onorab Henrie adres sa size. Wi.

HON GERVAIS HENRIE

Mersi Mr Speaker. Bonzour tou dimoun. Mr Speaker, mon krwar pwen ki *Leader*

Lopozisyon in leve, mon zwenn li lo la.

Mon krwar *SBC* sa ki in dir yer swar *was out of order*. Me selman mon ti ava prefere, sa size i telman enportan ki nou annan *ABC* lapremidi, *let's take it there*.

Akoz nou annan biznes la dan Lasanble pou fer. Sa i telman enportan ki i konsern Lasanble, mon ti a kontan ki i en size ki *ABC* ki *deal* avek *as oppose* ki nou rod en solisyon pou li la *on the floor*, bomaten. Mersi.

MR SPEAKER

Thank you. Prezan ki mon mazinen, ki mon *ruling* lo la. Onorab Georges, ou ti annan osi pou dir? Wi?

HON BERNARD GEORGES

Mersi Mr Speaker. Mr Speaker, mon zwenn Onorab Deputy Speaker pou dir ki *SBC* par son kominke yer ti konpletman *out of order* e mon pa al pli lwen. I ti *out of order*.

Me mon bezwen dir ki entervansyon Onorab *Leader* Lopozisyon i egalman *out of order*. Akoz sa kestyon i senp, son repons i dan *Order 31*. Si nou lir nou *Order 31*. *Leader* Lopozisyon in demann avek Vis- Prezidan en kestyon, i pa'n demann avek *SBC* li.

Si i ti anvi ki SBC i vin devan sa Lasanble, i annan plizyer fason. I ti a kapab demann SBC vin fer en *statement*, i ti'n kapab anmenn en Mosyon. I ti'n kapab fer tousala. Me in swazir pou li demann en kestyion. E kestyion i senp anba *Order 31*. I demann avek sa Minis.

Minis i kapab *attend sitting* si i anvi *may be accompanied by members of the staff*.

Me anba 31.(3) "Questions relating to matters which are under the control of bodies, whether totally or partially, directly or indirectly, owned by the Government, shall be restricted to those matters for which the Minister is responsible."

Napa personn ki responsab pou SBC. SBC is not owned totally or partially by Government. SBC is an independent institution! E distenksyon i bezwen ganny fer ant par egzanp Seychelles Trading Commission, (STC) ki en konpanyen kot Gouvernman i annan 100poursan par ladan.

SBC is a completely different animal. I en lenstitisyon endependan ki pa tonm anba okenn dimoun. E se pour sa rezon ki Vis-Prezidan yer in fer sa repons kler.

Alors wi, mon dakor. Let's take it up dan ABC ozordi. Me mon krwar ki nou pa devret fer, e la mon akiz SBC osi yer, pou pa lir zot manda byen. Pou pa get Standing Orders Lasanble e pou vin fer en deklarasyon ki fo. Mersi Mr Speaker.

MR SPEAKER

Mersi. Prezan mon gidans parey ou'n demande Onorab Leader Lopozisyon. Dan Standing Orders i dir Minis i vin dan Lasanble pou reponn kestyion, e si i oule i anmenn son zofisye.

Dan pratik ki nou'n swiv, mwan zanmen mon'n dir en Minis lekel zofisye pou anmennen oubyen si pou anmennen oubyen non. Alors se dan menm loptik ki ou kestyion in ganny prezante avek Vis-Prezidan pou sa lokazyon.

Si sa i devret sanze, mon dakor e 2 Mamm lo kote latab in sizere ki nou pran sa dan ABC, mon dakor avek sa, so nou a kapab prosede avek sa. Mersi.

Lot pwen Onorab Pillay.

HON SEBASTIEN PIALLAY

Mersi Mr Speaker. Mr Speaker, mon remersi ou pou ou *Ruling*. Mon note ki i annan en kontakte konfizyon otour sa sityasyon ki'n arive yer. Enn pe dir enn, lot pe dir lot. Vis-

Prezidan in vini in dir nou enn dan Lasanble, son bann Manm dan Lasanble pe dir nou en lot, SBC pe dir nou en lot e lepep Seselwa pe ekoute ki pe pase dan sa pei. E mon krwar nou a konnen ki pou arive pli tar.

Me ki nou, nou egzize. Nou egzize parey mon'n ganny dir Mr Speaker, mon pou fini lo sa pwen,

Parey mon'n ganny dir par Onorab Georges, mwan mon napa en BAR parey li, me mon lir mon Konstitisyon...

MR SPEAKER

Onorab Pillay, ou pe anmenn tou bann lezot size ki pa neseser ladan.

HON SEBASTIEN PILLAY

Wi, mon pe zis dir ki dan ...

MR SPEAKER

Silvouple nou'n *deal* avek sa. Nou kapab terminen ?

HON SEBASTIEN PILLAY

Mon pe zis dir ki lespri Konstitisyon, ler i dir ou en Minis *shall - shall*. I bezwen vin devan Lasanble, i pe donn nou-i pe donn nou lespri Konstitisyon se ki sa Minis i vin ek sa responsabilite ki anba li. Sa i enkli bann Lazans *over which* i annan en *supervision*

pou li *exercise*. E sa i enkli SBC dan ka Vis-Prezidan.

MR SPEAKER

Byen, ou'n fini fer ou pwen. Ou lot pwen?

HON SEBASTIEN PILLAY

Mon dezyenm pwen Mr Speaker ki mon oule fer, i ankor enn fwa mon bezwen demann ou, ou gidans lo sa size. Ou'n fer en *Ruling* yer, ki ou'n fini fer ou *Ruling* e parey mon'n dir, ou *Ruling* i ou *Ruling*. Me mon ti a kontan aport ou latansyon en keksoz vreman enteresan. Se ki ler ou'n donn ou *Ruling*, ou'n donn ou *Ruling* pou en sesyon ki'n fini pase.

E Onorab Georges i konn sa tre byen li. Akoz o moman ki Onorab Loze e atraver Onorab Deshila Bastienne, sa Mosyon in ganny *raise*, sa sesyon ki Onorab Desheila Bastienne pe refer lo la in fini pase. Si sa Manm ti merit ganny *named*, i ti merit ganny *named* dan sa sesyon ki'n fini pase.

E sa Manm in fini ganny pini dan sa sesyon, in fini ganny met deor ! E ou annan provizyon pou pran sanksyon. E la mon dir sa pwen, ou provizyon pou ou *deal* avek sa *conduct* i al anba *Order 51*.

Me Onorab Georges in al an deor *Standing Orders* e move

en Mosyon anba ou Lotorite zeneral ki i pa ganny drwa fer, pou fer met Onorab Loze deor *and then call for the suspension of the Member.*

E menm ler in fer sa, son bann dimoun pa'n kapab swiv li, pou realize pou dir i bezwen ganny segonde e i bezwen ganny vote. E avan menm ganny vote, Onorab Loze pe ganny met deor!

Mr Speaker, sa kalite konportman dan Lasanble i kont lespri nou Konstitisyon e kont nou *Standing Orders!*

E mon pe met ou *on record* Mr Speaker, dan lafransiz e avek tout lonnekte, ki nou pe konsider seryezman anmenn en *case Ankour* kont *ou* pou prosedir ki ou'n servi pou sispann Onorab Loze, yer dan Lasanble!

(APPLAUSE)

MR SPEAKER

Mersi. Bon, bon. Dan mon gidans parey ou'n demande Onorab *LOTO*, mon a retras zistwar sa sityasyon.

Premye lensidan se ler Onorab Loze ti kriye dan Lasanble "Koripsyon!" e i ti o deranz Lasanble pou sa. A sa moman mon ti demann li sorti dan Lasanble. Sa demann li sorti dan Lasanble, in *deal* avek

sa premye remark ki i ti fer. Sa in fini, in passe. Mon dakor e mon pa pe refer sa.

Ler Onorab Loze ti pe sorti dan Lasanble apre ki mon ti'n demann li, i ti kriy ankor e i ti kriy plizer keksoz enkli Onorab *Chief Whip* in dir poudir mon pa ti kler lo ki si sa ki Onorab Loze ti'n dir.

Mon ti kler ki Onorab Loze in dir sa bann parol. Sa ki mon ti dir li mon pa kler, mon pa konnen si in dir "kouver koripsyon", "soutir koripsyon." Selman i ti adres sa e i ti pe vin ver mwan. Mon konpran i ti pe adres sa ek mwan.

Alors sete pour sa ki mon ti demann Onorab Loze *apologise* yer e i ti refize pou *apologize*, i ti persiste avek mwan pou kontinyen defann son pozisyon e se sa - se lo sa lensidan ki mon ti *name* li. I pa ti lo sa premye kriye "koripsyon" ki mon ti *name* li. I ti lo sa ki ti arive yer bomaten.

Fotespere sa i kler e mon tenir mon pozisyon. Mersi.

HON SEBASTIEN PILLAY

(Off-Mic)

MR SPEAKER

Mon pa konnen si mon annan nesesite pou donn laparol kontinyelman lo sa size. Mon'n fer en *Ruling* e mon krwar sa

Ruling i devret stand e i devret final.

Wi, ki *point of order* Onorab Pillay.

HON SEBASTIEN PILLAY

Anba Order 51.(2) - e la mon pe raise Order 51.(2) atraver Order 8.(2) ki dir ki ou Speaker oubyen Deputy Speaker ki zot ki prezerv lord dan Lasanble, *decorum* e se zot ki desid lo bann pwen lord.

So, anba Order 51.(2), ok. “The Speaker shall order a Member whose conduct is grossly disorderly to withdraw immediately from the Assembly for such period.” Ok, ou’n fer.

52.(1) “If on any occasion the Speaker is of the opinion that the powers conferred under Order 51 are inadequate to deal with the offence, the Speaker may name the Member.” Ou’n name the Member, me selman se ou kote latab, atraver Leader zafer Gouvernman ki pou anmenn en Mosyon pou demann *the suspension of the Member*.

MR SPEAKER

Yes.

HON SEBASTIEN PILLAY

Me ou pran aksyon. Ou pran ou aksyon. Akoz ki ou ti bezwen Mosyon sorti kot

Onorab Bastienne, en Mosyon sorti kot Onorab Georges e la mon pou demann ou Mr Speaker, mon pou demann ou an relasyon avek *Order 8* e an relasyon avek nou Konstitisyon ki asir enparsyalite ou Lofis, pou dir ek nou si sa ki’n arive ek Onorab Loze, napa naryen pou fer avek sa *statement* ki Prezidan Larepublik ti fer dan Konvansyon LDS Sanmdi pase?

Kot i ti dir pou annan kriz dan Lasanble e pou annan *walk out*. I pa konnen ki pou arive, me selman i konnen i annan en keksoz pou arive!

MR SPEAKER

Mon’n dir Onorab Pillay, ti napa okenn koneksyon avek sa ki Prezidan in dir. Mon napa kontrol lo sa ki Prezidan i dir.

Lo ou premye pwen ki ou’n leve, lo ki mannyer sa *naming procedure* in ale, mon enterpret *Standing Orders* diferan avek ou. *Standing Orders* 52. (a) i dir “if the offence has been committed in the Assembly the Speaker or the person presiding, shall forthwith put the question on a motion being made.” I pa dir poudir Speaker ki fer sa Mosyon.

I dir “the Motion is made” e apre “no amendment, adjournment or debate being allowed” Speaker i met the

question - i put the question that such a Member - Sa i mon Ruling.

Yes-yes?

HON SEBASTIEN PILLAY

Mr Speaker, dan sa sesyon kot sa Manm pe fer sa lofans. Pa dan en lot sesyon. Sa ki zot in fer, zot in pini sa Manm Onorab dan en lot sesyon, e an plis zot pini son kestyon ki napa nanryen pou fer - Konmsi menm en kestyon *as if* in al kont Standing Order.

MR SPEAKER

Onorab Georges.

HON SEBASTIEN PILLAY

Se sa ki nou pa kapab ganny en konpran. E *no matter what* ki Onorab Georges pou al dir, i pou al zis sey zistifye sa ki in fer.

MR SPEAKER

Les li dir. Ou, ou'n dir ou bout, les li dir pou li.

HON BERNARD GEORGES

Mersi Mr Speaker. Mon fer Onorab Pillay rapel ki mon osi mon annan en lavwa, pa zis li ki annan en lavwa dan sa Lasanble. Mr Speaker, mon pa pe al dan sa ki'n arive. Ou'n fer ou *Ruling* e ou absoliman korek lo ou lenterpretasyon Standing

Orders ki pa le ka ditou pou Onorab Pillay.

Mon pe raise en matter of privilege, silvoule Mr Speaker. Anba Order 40 nou Standing Orders, spesifikman 40.(2) "Provided that if during a sitting of the Assembly a matter suddenly arises." Alors mon pe fer sa mater of privilege la akoz the matter has just suddenly arisen.

Mr Speaker, mon pe demann ou e ou ava rule lo la. Mon pe demann ou rule ki privilez Manm sa Lasanble, privilez sa Lasanble an antye in ganny afekte e i kontinyelman ganny afekte par lefe ki Onorab Pillay i swazir toulstan, tou leskiz pou i adres Lasanble. E dir tre klerman "ki i pe fer sa pou bann dimoun deor tande!"

E i pa swiv okenn Standing Orders nou Lasanble! Sak fwa ki i met son mikro on pou adres en pwen, i profite pou fer en kantite lezot pwen.

Sa i en labi total nou Lasanble, mon pe demann ou Mr Speaker, rule ki mon privilez koman *Leader of Government Business* e privilez sak Manm sa Lasanble pe ganny abize par labi, ki Onorab Leader Lopozisyon pe pran dan son bann lentervansyon devan sa House.

E si ou *rule* dan nou faver Mr Speaker, Mardi prosen mon ava anmenn en Mosyon devan sa Lasanble *of censure against* Onorab *Leader Lopozisyon*. Mersi.

(APPLAUSE)

(Interruption)

MR SPEAKER

Order! Order! Bon lo-

(Interruption)

MR SPEAKER

Order! Onorab Loze ou pe deranz Lasanble par kriy atraver sa. Mon pa'n tann-

(Interruption)

MR SPEAKER

Bann Manm, mon pe adres zot silvouple. Nou bezwen gard en pe lord dan Lasanble. Sa Lasanble pe vin an dezord e nou pa kapab fer nou travay.

Lo *matter of privilege* ki'n ganny leve par Onorab Georges, anba *Standing Order 40.(4)* mon krwar Onorab Georges i kapab lev sa *matter of privilege* e mon donn li permisyon pou li anmenn en Mosyon lo sa size. Mersi.

HON SEBASTIEN PILLAY *(Off-Mic)*

MR SPEAKER

Onorab Pillay mon'n fini ekout ou. Onorab Loze in lev lanmen. Onorab Loze. Les mon a zis dir ki mon determinen ki nou bezwen gard lord dan sa Lasanble. Mon pa konnen lo ki ou pe al adres nou, selman mon demannde ki sa ki ou fer i dan lord e ki ou respekte Lotorite Speaker. Onorab Loze, wi.

HON JOHAN LOZE

Mr Speaker, bonzour. Mon pe *raise* en *matter of privilege* anba 40.(2) e sa prefas ki ou'n fer letan ou'n donn mwan laparol, i li menm en mank respe pou mwan Mr Speaker. Parske ou pa'n fer menm zafer ler ou'n donn laparol Onorab Georges. Ou pa'n *insinuate* ki i pou mank respe pou Lotorite Speaker. Mersi Mr Speaker.

Mr Speaker, mwan mon ti a zis anvi lo en *matter that suddenly arises*, mon zis anvi klarifye avek ou letan, ou'n koz lo mon sispansyon. Ou'n dir ki ou'n sispann mwan akoz mon'n refize *apologies*. Ou'n dir mon ti pe isi, mon ti pe laba, *whatever*.

Mon oule ekliersi *for the record, I was actually suspended not for a gross*

misconduct, but for having a civil discourse, a civil exchange with the Speaker. Se sa rezon that I was named? Pou mwan fer en konversasyon byen avek ou, parey lo sa menm ton ki mon pe fer la yer? Se sa rezon ki ou ti name mwan?

I was suspended from the Assembly for a civil discourse en, not for gross misconduct! Mon oule ou ekliersi sa Mr Speaker and put it on record please.

MR SPEAKER

Mersi Onorab Loze. I dan mon lopinyon ki mannyer ou ti behave ti mank respe pou Lasanble e pou Speaker. E se lo sa baz ki mon'n fer mon *Ruling*. Silvouple, nou a termin lo la.

Matter of privilege, Onorab Pillay wi.

HON SEBASTIEN PILLAY

Mr Speaker, mon krwar seryezman mon privilez koman en Manm Lasanble pe ganny afekte. Konstitisyon i *dir there shall be freedom of speech and debate* dan Lasanble. Mon'n pas tou lord, mon'n demann ou permisyon e ou'n donn mwan permisyon koze. Mon pa konnen ki sa latitud dominer ki Onorab Georges i oule annan, pou li vin dir mwan koumsa

poudir mwan mon pa ganny drwa dir dan Lasanble "lepep Seselwa pe ekoute."

E keksoz ki tou Manm Lasanble in dir dan lepase e ki ou koman Speaker ou pou akord li privilez pou anmenn en *Motion of censure* kont mwan, pour lefe ki mon'n dir "lepep Seselwa pe ekoute deor ?"

Me mon krwar Mr Speaker, nou pe al tro lwen. E sa i en labi ou pouvwar koman Speaker Lasanble e ki mon pa kapab les sa kontinyen.

MR SPEAKER

Mersi Onorab Pillay.

HON SEBASTIEN PILLAY

Mon krwar ou bezwen annan serten *fairness* dan ou louvraz, ki ou pe egzerse koman Speaker Lasanble Nasyonal.

MR SPEAKER

Ok.

HON SEBASTIEN PILLAY

Mon pa'n fer naryen mal, ou pou vin pini mwan pou en keksoz ki mon pa'n fer? E ou pou vin donn li permision pou anmenn en *motion of censure*. *On what grounds?* Dir mwan ki *grounds* i pou anmenn en *motion of censure*? Ki mon'n fer pou li anmenn en *motion of*

censure kont mwan. Ki mon'n fer?

MR SPEAKER

Bon, Onorab Pillay ou ava adres sa pwen ler sa *matter of privilege* i vin devan Lasanble. Mersi.

(*Interruption*)

MR SPEAKER

Mersi, nou a pran Mosyon Onorab Andy Labonte.

HON ANDY LABONTE

Mersi Mr Speaker. Bonzour Mr Speaker. Bonzour tou bann Manm koleg Onorab, tou dimoun ki a lekout. E en bonzour spesyal tou bann ansyen travayer APDAR, tou bann travayer aktyel dan DSAPTR e bann kliyan DSAPT. E en pli gro bonzour tou bann zabitant La Rivière Anglaise.

Mr Speaker, sa Mosyon i lir koumsa. Prenon kont restriktirasyon kot APDAR in prezan vin DSAPTR, en divizyon anba Minister Lasante, sa Lasanble i demann Gouvernman pou revwar son Polisi e stratezi lo reabilitasyon e tretman programm pou lit kont labi sibstans. Mersi Mr Speaker.

MR SPEAKER

Mersi Onorab. Ou pou adres ou Mosyon la oubyen nou a pran segonnman avan?

HON ANDY LABONTE

Nou a pran segonnman apre mon a adrese.

MR SPEAKER

Wi, mon a ganny en segonnman pou sa Mosyon. Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour tou Onorab. Mr Speaker, mon pou segonn sa Mosyon e mon pou koz lo la plitar. Mersi.

MR SPEAKER

Byen, nou aprann Onorab Labonte premye e apre Onorab Bistoquet a ganny laparol.

Onorab Labonte ou ava adres ou Mosyon.

HON ANDY LABONTE

Mersi Mr Speaker. Mr Speaker, pou lenformasyon piblik DSAPTR i sa novo divizyon anba Minister Lasante ki'n ganny kree e pran tou fonksyon APDAR. Nou pou agree ki malgre APDAR in egziste pou 3an, pa neseserman tou Seselwa ki ti vreman konn son fonksyon. Koman ou ti nonm

APDAR, Seselwa ti nonm methadone.

DSAPTR i vedir Division for Substance Abuse, Prevention, Treatment and Rehabilitation. Ki kapab ganny interprete koman Divizyon pou Prevansyon Labi Sibstans, Tretman e Reabilitasyon.

Fodore note ki *DSAPTR* in egziste depi Zanvye 2022. Alors i pou enportan ki ler son Polisi e plan stratezi i ganny met ater, pep Seselwa i konpran son vre fonksyon.

Le 29 Septanm, 2021 en *Bill anmennen par Vis-Prezidan Ahmed Afif* ti vin dan sa Lasamble, kot i ti demann nou koman bann reprezantan Lepep Seselwa, pou *repeal the Agency for Prevention of Drug Abuse and Rehabilitation, Act 13 of 2017*. Ki ti ganny interprete koman Lazans pou Prevansyon Labi Drog e Reabilitasyon.

Sa Lazans ki ti byen koni koman *APDAR*. E an fezan sa, apre ki Prezidan Wavel Ramkalawan ti assent sa *Act le 11 Oktob, 2021*, *APDAR* ti ganny dizourd koman en Lazans. Tou fonksyon ti otomatikman tom anba Minister Lasante e tou son travayer ti vin en travayer Gouvernman Sesel.

Mr Speaker, i enportan pou note ki sa i en form parti sa

transformasyon ki sa Gouvernman dizour i anvi vwar dan Sesel. Vis-Prezidan ti sit 10 rezon akoz ki sa Lazans *APDAR* ti bezwen ganny aboli e ganny mete anba parasol Minister Lasante.

Mr Speaker, Prezidan ti dir e mon site; ‘premyerman, labi drog ek lakol i dabor e avan tou en problem lasante piblik.

Dezyenmman, mazorite travayer *APDAR* se bann profesyonnel Minister Lasante. Savedir dokter, ners ek psikolog eksetera.

Trwazyenmman, tou le 3 dokter ki aktyelman travay avek *APDAR* se bann dokter ki anploye avek Lazans Swen Lasante ki en antite dan Minister Lasante. Zot in senpleman ganny segonde kot *APDAR*.

Katriyenmman, 18 ners *health care agency* i travay part time kot *APDAR* an plis ki sa 9 ki anploye an plentan avek *APDAR*.

Senkyenmman, ler *APDAR* napa dokter oubyen ners pou okenn rezon, i bezwen vin kot Minister Lasante pou parey nou dir, degaz lasasen.

Sizyenmman, tou programm ki *APDAR* i fer swa lo prevansyon, tretman oubyen reabilitasyon i bezwen fer li an

kolaborasyon avek Minister Lasante pou li reisir.

Setyenmman, lenportasyon bann latizann tel ki *methadone* ek lezot prodwi medikal tel ki sereng, legan, eksetera i kapab fer pli byen si i fer atraver Minister Lasante ki annan en sistenm solid pou fer sa.

Wityenmman, i annan en lyen direk ant problemm drog ek lalkol ek bann maladi parey *HIV*, *SIDA*, Hepatitis ek maladi ki transmet par sex ki tonm anba responsabilite Minister Lasante.

Nevyenmman, i annan en lyen direk ant labi drog ek lalkol e bann risk ek maladi ki bann manman ki lo drog i annan pandan zot lansentman e ki nou pe vwar ki pe annan plis lanmor bann manman pandan zot lansentman e pe annan plis lanmor bann baba avan e apre zot nesans akoz problemm drog ek lalkol. E ki Minister Lasante i bezwen adres dan fason global e par pti bout dan en fason dekonekte.

E dizyenmman e dernyen rezon, Minister Lasante i bezwen re aziste son bann programm psikyatrik, akoz ti annan en pe konpetisyon e menm konfli pou lespas par egzanp kot *Wellness Centre* ant Minister avek APDAR.

Desizyon alors pou restriktir bann programm lalit kont drog ek lalkol, i osi baze lo nesesite pou mye servi resours limite e koup serten depans ki pou absoliman neseser'. Retir sitasyon.

Mr Speaker, baze lo serten sa bann rezon ki Vis-Prezidan ti dir e an prenon kont ki sa National *Drug Master Plan* 2019-2023 oubyen NDCMP 2019-2023, ki byento pe al ariv a son lafen milye lannen prosen, ki ti ganny sipor UNODC, *United Nation Office on Drugs and Crimes*, sa Lasanble i krwar fortman ki dan lespri konsiltasyon e pou angaz popilasyon pou lager antoure.

E ed nou kominote e nou bann dimoun ki pe itiliz drog e dimoun ki pe enzekte drog e tou bann lezot endividé ki pe abiz sibstans, i kapab ganny pli mye servi e latansyon profesyonnel ki ava vreman efektiv, efikas e apropriye pou Sesel.

E osi prenon an kont pou amelyor bann kondisyon ki sa bann travayer vreman devote ki pe donn sa servis. Sa Mosyon pe demann Gouvernman pou fer en evalyasyon e revwar son Polisi e stratezi lo lafason ki tretman e reabilitasyon i ganny fer, dan en fason ki zabitan Sesel ki konsernan e vreman

anvi vvar en meyer fason fer, pou ki tou sa ki i ganny diskite ler nou ti vot pou *repeal* sa *Bill* i vitman an valer.

Prenon kont sa ki VP ti dir, sa ki bann Manm ti dir le 29 Septanm, 2021 e sa ki pou ganny dir pandan sa deba ozordi dan sa Mosyon.

Me pli enportan an gro se ki Lepep Seselwa pe demande pou vvar. Avan ti enn sa Lazans, ti separe e ganny kontrole par en Sekreter Deta, apre pli tar par en *CEO* e *Deputy CEO*. Sa nouveau divizyon ki apel *Division for Substance Abuse Prevention, Treatment and Rehabilitation, (DSAPTR)* aprezan pou annan en Direkter Zeneral ki pou desarz menm fonksyon dan kapasite *Deputy CEO* dan letan *APDAR*.

Mr Speaker, mon apresye ki premyerman dan zot nouveau non sa divizyon zot in omit mansyonn labi drog e ranplas li par labi sibstans ek tretman. Akoz malgre ki dan le pase zot ti pe travay osi avek plizyer dimoun ki lo labi lezot sibstans, me piblik la deor ti krwar ki zot zis travay avek dimoun ki lo labi drog. San realize ki lalkol ki osi en gro problem pou lasosyete e *APDAR* ti osi pe fer en travay avek sa bann dimoun ki ti pe abiz lalkol.

Sa nouveau divizyon in osi met lanfaz lo tretman, me non pa zis mansyonn reabilitasyon, malgre ki nou konnen ki dan reabilitasyon i annan son tretman ki al avek.

Dan sa *NDCMP 2019-2023* oubyen *National Drug Control Master Plan 2019-2023* ki byento pou arriv a son lafen, i konsantre lo 4 gran laliny stratezi. I enportan pou note ki ti sipoze kout *APDAR* en total R314 milyon 36mil 490. 70 sou pou en enplimant sa *National Drug Master Plan 2019-2023*.

E dan sa sonm, Gouvernman Sesel ti pou bezwen finans R254milyon 465mil 568. 20 sou e 59milyon 570mil 932.50sou ti pou en donasyon. Sa ti pou pandan sa peryod 2019-2023. Vi ki byento 2023 pe aprose, kestyon, eski pa i neseser pou fer en lodit e vvar si sa bann lobzektif in ganny akonpli e si in fer lefe dan pei?

Laliny stratezi nimero 1 sa *Master Plan* i konsantre lo *health and human development*. Sa anglob 5 tenm. Premyerman, *prevention*. Dezyenmman, *drug depend treatment*.

Trwazyenm, *social support and reintegration*.

Katriyenm, *harm reduction*.

Senkyenm, access to control drugs for medical and scientific support.

Laliny stratezik nimero 2 i konsantre lo *supply reduction*. Sa i anglob 4 tenm. Premyerman *intelligent policing and collaboration*.

Dezyenm, *identify and explore link with other form of organized crime*.

Trwazyenm, *early identification of new psychoactive substance*.

Senkyenm, *improvement of national and international cooperation on drug related criminal*.

Laliny stratezik nimero 3 i konsantre lo *human rights and proportionate polices*. Sa i anglob 2 tenm.

Premyerman, *Human Rights, young people, woman and people in prison*.

Dezyenm, *proportionate, effective polices and response from the justice sector*.

E finalman laliny stratezik nimero 4 i konsantre lo *strategic information and coordination*.

Sa i anglob 3 tenm. Premyerman, *situation and trend monitoring*.

Dezyenm, *monitoring and evaluation*.

Trwazyenm, *coordination*.

Mr Speaker, ler ki mon pe table sa Mosyon pou diskisyon

e konsiderasyon, mon zis anvi demann bann koleg Onorab, pou evite servi bann tem ou parol negativ pou dekrir sa bann pasyan dan zot deliberasyon e dan zot lantervansyon. Sey adopte bann term ki *UNODC, United Nation Office on Drugs and Crime* pe ankouraz nou pou servi.

3 legzanz se nou pa dir adikt, me plito *people who use drugs, (PWDs)* Vedir dimoun ki itiliz drog. E *people who inject drugs, (IWDs)*, vedir dimoun ki enzekte drog.

Pa servi sa fraz 'bann adikt ki pe rekipere', me plito 'dimoun ki pe rekipere.' E sa i pran an kont e met an valer sa pti 3, Lartik 15 a 9. Prensipalman 2 Lartik enportan dan nou Konstitisyon. Sa se Lartik 27 nou Konstitisyon ki koz lo *rights to equal protection of the law*, ki kapab ganny interprete koman drwa pou annan menm proteksyon anba Lalwa ki koz drwa kont okenn form diskriminasyon.

E Lartik 29 ki koz lo *right to health care* oubyen drwa pou swen lasante, ki koz lo proteksyon lasante e en standar dan son totalite fizik e mantal.

Mon osi anvi fer pledwari avek tou entervenan pou silvouple pa politiz sa Mosyon,

e ni denigre sa bann kliyan *DSAPTR*, me plito montre zot ki nou anvi rod sa ki meyer pou zot rekipere, e ki zot a kapab ed zot lekor e finalman ed lasosyete.

E sa ava donn lankourazman sa bann *staff* devotee ki pe ofer sa servis kot sa divizyon *DSAPTR*.

Mr Speaker, avek sa de mo, mon swete ki mon ganny lopinyon e sipor avek bann Manm ki la prezan dan Lasanble.

E dan mon konklizyon apre ki mon pou'n ekout tou sa ki pou'n entervenir e anmenn zot kontribisyon, mon pou donn en pti apersi ki nou koman sa Lasanble nou ti ava kontan Gouvernman i pran an kont ler zot pe reviz zot *National Drug Control Master Plan, (NDCMP)* ki byento pe al ver son lafen an 2023. E pou pran an konsiderasyon nou kontribisyon koman en Lasanble serye an term sipor ler pe revwar novo Polisi e stratezi anver reabilitasyon e tretman programm *rehabilitation* pou lit kont labi sibstans dan Sesel.

Mersi Mr Speaker, e mon met sa Mosyon devan Lasanble pou debat e fer zot kontribisyon.

(APPLAUSE)

MR SPEAKER

Mersi Onorab Labonte. Nou ava aprezan donn laparol Onorab Rosie Bistoquet.

HON ROSIE BISTOQUET

Mersi Mr Speaker. Mr Speaker, loter sa Mosyon in demande pou revwar Polisi e stratezi Divizyon pou labi Sibstans, Prevansyon, Tretman e Reabilitasyon sirtou lo bann ki lo programm labi sibstans.

Me avan mon komans Mr Speaker, mon ti a kontan avan mon fer mon lentervansyon, mon ti a kontan felisit tou bann atraver *APDAR*, bann osi ki'n fer *part time*, bann volonteer pou zot devosyon, sirtou bann ki'n pran zot retret, ki mon konnen zot in donn en koudmen, pou asire ki nou frer ek ser Seselwa ki malad i ganny swen neseser. Mon lev mon sa po avek zot.

Loter Mosyon in demann nou pou pa servi serten term, me selman sa bann terminolozi ki loter in anmennen i plizoumwen an Angle, e mwan laplipar ditan mon pou sanze petet servi li koman *IDUs, Injecting Drug Users*.

Mr Speaker, en letid *political economy analysis* ki ti ganny fer par *Global Initiative against transnational organized crime* an Zen 2021 avek tit

Evolisyon Drog Komers Ilegal dan was Losean Endyen. An Zen, sa rapor ti sorti an Zen 2021.

Sa rapor in fer sorti ki nou Sesel i en pei ki annan plis konsonmasyon drog, sirtou eroin dan lemonn ki environ, 5 poursan nou popilasyon. Sa poursantaz in ogmant plis dan lannen 2018.

Dapre sa rapor, APDAR ti raporte ki an 2011 ziska 2018 konsonmasyon drog Sesel ti 4 fwa plis. Sorti 1200 pou vin 4300. Menm UNODC ek WHO ti konfirm sa sif an 2019. Lakantite dimoun ki konsonm drog sirtou eroin in akselere pou vin 6000 dimoun. Sa i verdir ki poursantaz in sorti 5 poursan e ti vin 10 poursan. Sa i nou lafors travayer zis pandan sa 1an. Sa levidans ki Sesel in vin pli o popilasyon *per capita* ki konsonm drog dan lemonn antye.

Mr Speaker, en letid ki ti ganny fer Sesel apele *Integrated Biological and Behavioural survey on Heroin Users* an 2017 fer par konsiltan Benjamin Vel, kot 400 IDUs eroin, 15an an montan ti pran par ladan.

Son konklizyon i montre leta degoutan e brital sityasyon drog dan nou pei Sesel. Rezulta i konm swivan;- Laplipar bann zenn konsonmater eroin ti

zom ki pa travay ant 20 ant a 29an.

Lanmwatye bann partisipan ti single parent. 63 poursan ti lekol ziska Form 5 ouswa S5. Dan sa 36 poursan ki ti pike, 18 poursan ti aze ant 15 a 19an. Zot ankor tre zenn.

93poursan ti pike toulezour, sa i enkyetan. 31 poursan ti admet ki zot partaz swa zegwir ouswa sereng, zot servi ek kanmarad.

19 poursan ki'n angaz zot dan travay sex, fanm ou zom parey nou dir. Bann zom ou fanm devi, pou ganny larzan pou aste drog.

44poursan ti dir ki zot pa'n servi kapot ler zot vann zot lekor pou sex. 13 poursan ti afekte ek SIDA e 76 poursan ti afekte avek Hepatit C.

Mr Speaker, adiksyon i en maladi konpleks ki kapab afekte diferan part lavi en dimoun.

An 2017 UNODC avek WHO ti estimen ki i annan 20.7 milyon Ameriken ki bezwen tretman pou maladi sibstans. Menm sa, zis 2.5milyon ti ganny tretman spesyalize pou sa maladi.

Adiksyon i bezwen tretman endividyalite. Nou pa kapab tret tou dimoun ki annan adisyon eroin parey.

Sak group i bezwen en modalite ki pou adres son sentonm avek sirtou bann *IDUs* avek lakoz sa maladi, ki sa *IDU* i prezant avek e osi nou bezwen pran an kont bann konsekans ki sa maladi i kapab annan dan diferan parti sistem e lavi en endividé.

Par egzanp, kwa ki'n fer sa endividé pran drog ?

Eski sa endividé i annan lezot maladi parey *SIDA*, Epatit, Kanser, Tansyon, Dyabet ou depresyon ?

Eski i travay?

Eski i ankor pe lekol?

Eski i en kondannen?

Ki son sityasyon ekonomik? Son sityasyon sosyal? Son sityasyon mantal?. Son sityasyon spirityel e osi son sityasyon lafanmir? Sa i zis detrwa legzanp.

Alors baze lo gravite kondisyon ki en adikt i prezant avek. Ki sa Lazans medikal responsab pou kapab fer en desizyon ki terapi e ki sa lenstitisyon i annan pli meyer pou adiktivman tret son adisyon, pou rekiper pli vit.

Mr Speaker, malgré ki Sesel in met an plas diferan Lalwa e Polisi pou konbat e zer sityasyon drog dan nou pei, sirtou Polisi i annan lapros debaz pou redwir lakantite

konsonmasyon drog parmi nou popilasyon.

Enkli met an plas en programm nasyonal ki apele *MAT*, ki an Angle i dir *Medicated Assisted Therapy*. Tretman asiste par meditasyon.

MAT i en tretman souvan pou tou bann *IDUs* e sirtou bann ki servi *Opioid* nou dir sirtou eroin. E osi preskripsyon ou latizann pou douler ki annan en konponan *opiates*.

Pli gran proporsyon tretman *MAT* i enkli *counselling* ouswa konsey e osi diferan form terapi, pou sanz konportman e ed pasyan pou sirmont son tandans adiksyon.

Mr Speaker, sa programm *MAT* ti etabli an desanm 2008 par Minister Lasante anba seksyon Lasante Mantal ki ti komans kot North East Point *Rehab Center*. Sa programm ti ganny fer anba direksyon Dokter Malulu, *Senior Psikyat ansarz* pou lasante mantal kot Minister Lasante.

Sa programm ti ganny gide par *National Mental Health Policy for Seychelles 2014*. Kot bann *IDUs* ti ganny meyer swen medikal anba sipervizyon strik bann profesyonnel lasante mantal.

Mr Speaker, resers in montre ki kontinyasyon medikaman e terapi, i en sikse

pou tret maladi adiksyon *opiate*. Sirtou bann ki vwar difisil pou sorti dan sa adiksyon.

Benefis *MAT* pou tretman labi sibstans i *comme swivan* ;- I fasilit *withdraw* san danze, kot i soulaz sentom parey douler e kontrol lanvi pou pran drog.

Dezyenm, i redwir risk lanmor lie ek *overdose*.

Trwazyenm, i ogmant retansyon pasyan lo tretman e i annan plis bon kontrol lo medikaman an sekirite.

Katriyenm, i redwir konsonmasyon drog ilegal sirtou bann danze potansyel e osi bann konsekans legal e osi bann konsekans legal.

Mr Speaker, avek zefor pou redwi konsonmasyon drog dan Sesel, Gouvernman in fer en gran reform kot 2 Lalwa ti ganny entrodwi. Enn, sa i ti *Misuse of Drugs Act, MODA* an 2016 ki ti ganny entrodwir.

Lot se Lazans pou Prevansyon pou drog, labi kont drog ki *APDAR* i ti ganny entrodwi osi an 2017. Sa Lalwa ti ganny entrodwi an 2017.

MODA li i ti ganny entrodwi ki Gouvernman i mazinen pou redwi konsepsyon drog ilegal par kontrol lenportasyon e trafik drog.

Mr Speaker, sa Lalwa ti ganny plis pouvwar pou Sesel

lager kont trafik drog, e osi met an plas en bann striktir enportan pou promot prevansyon, tretman, ledikasyon, reabilitasyon, pou asir rekiperasyon e lentegrasyon sosyal pou nou bann *IDUs* ek zot fanmir.

Sa Lalwa ti osi donn pouvwar pou met an plas bann fasilite medikal pou teste drog ; fer evalyasyon pou dimoun ki depan lo drog ; fer provizyon pou tretman pou bann *outpatients*.

Provizyon in osi ganny donnen pou fer enplimant servis e programm pou redwir risk parey kapot e osi lesanz sereng.

Sa Lalwa in osi donn permisyon pou annan en Lenstitisyon ou fasilite lasante rezidansyel, pou admet pasyan pou tretman e reabilitasyon parey bann ki ganny fer *detox* e lezot programm, pou fer sir ki en *IDUs* i kapab swiv bann programm sosyal pou ganny en re lentegrasyon dan nou sisyete.

Mr Speaker, sa reform avek lentrodiksyon sa 2 Lalwa, ti en preparasyon pou entrodwi en novo lalyans ki nou ti dir pli boner, sa *Act APDAR* pou lit kont drog dan Sesel.

E dapre sa Lazans zot programm ti baze lo en programm *Portuguese based policy*. En model kot drog in ganny dekriminalize pou asir akse ek tretman.

Sa model portige kont labi drog ti ganny devlope e enplimante an *Portugal* an lannen 2000. Sa model in adopte en lapros ki konsantre lo sante piblik pou bann *IDUs*, me pa en lapros priyorer pou lord piblik.

Sa i vedir drog i ganny decriminalize, me servi drog e posesyon drog, en serten kantite drog i legal pou konsonmasyon san rezon medikal.

Sa Polisi i fer konpran ki konsonmasyon drog i legal an *Portugal*. Olye fer fas avek kondannasyon kriminel pou dimoun ki servi drog, sa bann *IDUs* i ganny refer avek en Komisyon pou Adiksyon pou adres zot problem lasante.

Mr Speaker, dapre bann reser, malgre sa Polisi Portige in ganny permet ki bann *IDUs* pou ganny akse avek tretman, redwir lenfeksyon opportunistic parey Epatit C e SIDA e osi *murder* ou mert, ti ganny ogmante par 41 poursan pandan sa dernyen 5an e trafik drog ti'n ogmante *Portugal*.

Menm si *Portugal* in reisi aboli penalti krim pou konsonmasyon e posesyon tou kalite drog, zot pa'n kapab redwir konsepsyon drog parmi popilasyon dan sa pei.

Bann pei parey *Brazil*, *Mexico*, *USA*, Lanmerik, Kolonbi pa'n zanmen adopte sa Polisi *Portugal*, me nou Sesel nou'n adopte.

Mr Speaker, eski sa model portige in marse isi Sesel? Eski in annan en letid kot in annan levidans ki plis Seselwa in sorti lo drog?

Ou eski laplipar nou *IDUs* in rekipere e pe travay e pe donn koudmen devlop lekonomi Sesel? Eski bann fanmir kase in ganny repare, eski lakantite preskripsyon *methadone* in redwir konsiderableman?

Eski trafik drog i mwens ou in disparet Sesel?

Mr Speaker, mon pou napa larepons pou sa bann kestyon ziska en letid konpreansiv i ganny fer.

Alors Mr Speaker, ziska ozordi *Portugal* i ankor pe struggle avek sa Polisi kot i annan tro bokou lanbigwite sorti dan vye sistenm.

Par egzanp konsonmasyon e posyon drog in ogmante parmi popilasyon e osi bann *cartel* in ogmante zot in ogmant zot larises.

Endividiyel avek faktor biologik pre dispoze pou adiksyon in fer leksperyans pou servi drog, akoz zot konnen ki zot pa pou ganny persekiter.

Fasilité tretman ki egziste pa'n kapab pran sa gran kantite milyon e de milyon nouvo adikt dan sistem legal.

Diskriminasyon in ogmante, demann pou drog lo semen akoz pri in desann.

An plis ki sa Mr Speaker, avan ler nou adopte en Polisi sorti dan enport ki pei, nou bezwen adapte li dan nou konteks baze lo nou topografi ekolozi, kiltir e osi sityasyon nou popilasyon.

Eski Sesel in get dan rezyon Losean Endyen ki parey Moris, *La Reunion*, Sid Afrik ki meyer Polisi zot in met an plas pou zot popilasyon, pou bann *IDUs*, sirtou ki sa bann pei i tonm dan kominate SADC e zot annan preski menm topografi parey Sesel.

Mr Speaker, loter sa mosyon in demann Gouvernman pou re vwar Polisi program pou adiksyon drog, avek reform ki Prezidan ti anonse lannen pase, ki vi ki Lazans APDAR in retourn anba Minister Lasante.

Pandan sa 1an ki Lazans APDAR ti la, in ganny etabli anba Sekretarya Minister

Lasante, sirtou anba divizyon Sekreter Prensipal e in ganny *rebrand* avek en nouvo non, Divizyon pou Labi sibstans, Prevansyon e Reabilitasyon.

Mr Speaker, baze lo tou sa bann pwen ki mon'n anmennen mon pou propoz sa bann rekomandasyon swivan dan Polisi ek stratezi, pou labi sibstans dan Sesel pou asir meyer akse avek servis efikas pou bann *IDUs* ek zot fanmir.

A kour term, mon pe fer referans lo rekomandasyon enn, fer en lodit dan sa divizyon, pou konn lakonplisman e defi ki i a donn lenformasyon neseser pou amelyor zesyon e fasilit meyer desizyon, par tou parti konsernen avek responsabilite pou sipervize ou inisyé aksyon kolektif.

Dezyenm, revwar striktir sa divizyon *comme* swivan ; Etabli Unit Adiktolozi e tretman pou *methadone maintenance*. Sa programm anba *Health Care Agency* pou tretman dependans drog anba lasante mantal.

Sa i a permet asiste tou bann adikt ki pike, ouswa. *Sorry*, tou bann *IDUs* ki pike pou redwir zot konsonpsyon drog e osi frekans ki zot pike. Lot fason osi ki tou pasyan i a ganny evalye e ganny zere anba tretman medikal byen

kordinen, akoz sa endivid pou otomatikman ganny *withdrawal* e okenn konplikasyon i a ganny *deal* avek o pli vit posib.

Trwazyenmman, zot a ganny *deal* avek o pli vit posib. Trwazyenmman, zot a ganny swiv tre pros par en lekip spesyalize sirtou bann psikyat, psikolog kalifye, pou pasyan ki bezwen admet Lopital, en model ki ganny rekomannde pou fer programm tretman a kour term ou a long term.

E osi sa programm rezidansyel kot *Wellness Centre* i devret ganny re komanse. Sa i a permet pasyan ki bezwen admisyon Lopital kot *Wellness Centre* pou ganny swen anba sipervizyon ners ou psikyat ou psikolog e lezot *counsellors*. Akoz sa fasilite in rest fermen pandan sa 2an.

E osi Mr Speaker, sa i osi permet ki nou pasyan ou kliyan i annan ki annan lezot problemm lasante parey *SIDA*, Epatit, Dyabet, Tansyon e leta maladi kronik ankor i a kapab ganny swen neseser spesyalize e pli vit.

En lot fason ankor Mr Speaker, sa programm pou kliyan *outpatient* ki anba programm *Maintenance* i a osi ganny zot preskripsiun swivi par en lekip profesyonnel.

Psikyat, ners, *counsellor*, per educators, pou asire ki zot swiv protokol byen disiplinen.

E osi bann madanm ansent i pou ganny akse avek konsiltasyon spesyalize, pou sire ki zot baba i ne an bonn sante e osi pandan e apre ki zot in ganny baba, zot ganny swivi.

Mr Speaker, mon pe rekomannde osi a kour term ouswa imedya, revwar lobzektif e osi prosedir tretman kominoter, rezyonal, mobil pou methadone.

Vi ki sa programm in pas atraver diferan loptik, sirtou kalite servis. Pozisyonnman *hotspot* ki sa bann van dan rezyon nor, dan rezyon Mahe i annan bann gran, gran laliny e napa ase *staff* kalifye pou kapab rann servis.

Mon propoze ki tou tretman *methadone*, rezyonal pou *out patient* i ganny fer dan coupon kot i annan en sant lasante rezyonal anba sipervizyon profesyonnel kalifye. En kliyan ki lo *methadone* i pa bezwen ganny stigmatize ou ganny ridikil akoz i en *IDUs*.

Personn pa pou kapab montre ledwa lo li. I vin kot sa bann klinik rezyonal pou pran son tretman. Akoz klinik i ofer tou servis lasante kominoter e nou bann frer ek ser Seselwa i i

ganny zot dinyite komann en zonm ek fanm, ki ganny nenport ki maladi kronik parey tansyon, dyabet e lezot ankor.

Serten disiplin konportman i a osi ganny rekomannde.

Mon sizere osi Mr Speaker, ki sa bann fasilite i a *comme swivan*:-

Dan nor kot Klinik Beau Vallon,

Santral kot *Youth Centre*, Les kot Klinik Anse Aux Pins.

Kot Lopital Anse Royale dan sid.

Was kot Klinik Anse Boileau,

Praslin kot Lopital Baie Ste Anne e La Digue kot Lopital Logan.

Mr Speaker, mon lot rekomandasyon se etabli servis prevansyon e reabilitasyon anba Divizyon pou Labi Sibstans, Prevansyon, Tretman e Reabilitasyon akoz resours imen i tre limite. A kour term, sirtou imedya, mon pe rekomannde ki programm sansibilizasyon kominoter ouswa *outreach*, i a ganny sipor e motiv bann ki'n sorti lo programm tretman pou zot redwir zot risk pou pa servi drog. Sirtou bann ki partaz menm lekipman pou pike e osi

lezot maladi ki transmet par sex. Tel ki *SIDA* e lezot *STIs*.

I a siport bann ki servi drog pou re ganny reabilite. Sa i en prosesis pou ed bann *IDUs* ou endividé pou zot realiz zot fonksyon. Vin endependan e annan en kalite lavi ki neseser pou viv e travay pou ganny aksepte dan fanmir e dan kominote.

I a osi ammenn ledikasyon, rediksyon risk kot drog dan kominote, lo gento e dan fanmir.

Mon lot propozisyon Mr Speaker, pou mwayen term se devlop bann programm edikasyonnel, kominoter, sirtou lekol, landrwa travay e lezot group kot zot a kapab ganny edike, enformen pou redwir zot risk pou pa servi drog. Si zot osi kapab re etabli osi par programm apele *peer to peer educators* parmi bann dimoun ki bann ansyen *IDUs*, kot zot a kapab ede pou fer zot frer ek ser sorti dan sa drog, e sirtou dan adiksyon atraver zot eksperyans e *counseling*.

Zot a osi ede avek programm byen striktire, pou programm ledikasyon pou bann ki a risk pou servi drog. E osi zot bezwen revwar lakantite e kalite resours imen kalifye. Sirtou psikyat, psikolog,

counsellors, e osi management pou asir meyer swen ek servis.

A lonterm Mr Speaker, mon demande pou revwar polisi e stratezi nasyonal Divizyon pou *National Drug Control Master Plan* ki pe al expire an 2023 e pou sa i pou asire ki bann korperativ dan prevansyon drog, tretman e reabilitasyon nou frer ek ser ki'n tonn dan adiksyon drog isi Sesel, i ganny meyer fasilite ou meyer swen.

Fotespere ki sa plan i anmenn novo lapros baze lo levidans aktyel, e osi anmenn plis aksyon ki vize ver lapros milye sektoryel, pou fer si ki i amelyor byennet sekirite tou endividé, kominate e tou sitwayen ki pe viv Sesel.

Avek sa bann propozisyon Mr Speaker, mon pou esper ki loter Mosyon i a pran konsiderasyon mon bann rekomandasyon pou asire ki nou bann frer ek ser ki malad akoz adiksyon drog i ganny ase avek meyer servis pou siport zot ek zot fanmir.

E osi zot a re ganny en lavi normal san drog , re ganny zot dinyite koman en vre fanm ek zom Seselwa. Re senm lanmour ek lazwa dan lakour e kominate e pli enportan, kontribye pou devlopman nou pei Sesel.

E osi Mr Speaker, mon rekomannde pou dek ki sa Mosyon i ganny adopte, mon mazinen pou annan bon korperasyon ek zesyon asa divizyon par tou travayer e volonté, pou anmenn en sel vizyon atraver meyer swen servis lasante. Ansanm nou pou kapab fer.

Alors Mr Speaker, les mon asir loter Mosyon ki mon osi mon donn sa sipor total. Mersi.

(APPLAUSE)

MR SPEAKER

Mersi Onorab Bistoquet. Aprezan mon ava donn laparol Onorab Regina Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker, dan Sa transformasyon ki Gouvernman LDS pe anmennen depi in vin o pouwarr an Oktob 2020, sa Mosyon ki devan nou anmennen par Onorab Labonte i enn ki enportan, e tre apropiye pou sa letan.

E parey loter Mosyon in met devan nou, i pe demann Gouvernman pou revwar Polisi, e revwar stratezi, vizavi sa programm reabilitasyon, e tretman pou bann viktim ki depandan lo eroin. Sa i sa

program *methadone*, parey tou dimoun i apel li.

Pou komanse Mr Speaker, i bon fer resorti ki *methadone* dan li menm i en lot drog ki ganny servi pou tret adiksyon bann dimoun ki lo Eroin, e son lefe, i sipoze redwir lanvi ou *craving* pou bann adikt ki lo sa sibstans, bann pti *men lapoud* parey dimoun i kontan dekrir zot.

Me par kont, en keksoz ki popilasyon, pa ankor byen konpran se ki *methadone*, i zis retard sa lanvi pou en serten peryod letan, e son dirasyon i depan lo sa doz ki ganny administre. E mon panse ki sa dimoun i ganny son doz dapre dirasyon son tretman, kekfwa ler i komanse i lo en doz pli feb e apre gradyelman i monte.

Se pou sa ki dan lapratik, nou vvar kot bokou sa bann adikt, ler zot fini pran zot doz *methadone*, e sa *high* i sorti, zot retourn lo gento, pou zot al rod zot eroin, e sa adiksyon i kontinyen.

E la dan sa ka *methadone* pa vin efektiv, sirtou ler sa doz ki zot pe gannyen pa byen aziste, e zot lo sa ki apel sa *low threshold* program, e parfwa sa *methadone* pa ase pou siprimen sa lanvi eroin.

E son danze nou vvar kot sa adikt i reste lo tretman pou

plizyer lannen, e pli tar i vin pli difisil pou li menm *wean off* son lekor lo tou lede, e i annan zot ki krwar ki zot pa pou zanmen sorti lo la.

Mr Speaker, ler ou pou antre dan en konversasyon ek bann ki pli aze, bann granmoun dan 70an a 80an pou dir ou ‘mon piti ni eroin ni *methadone* pa’n zanmen dan nou vokabiler lontan, nou ti sik nou pris taba dipei.”

E bann grannwanr ti servi zot pip, e zot taba *Berdzay* ladan ziska dernyerman e i annan ki ankor pe pratik sa, e *Methadone* li in vin apre ki Eroin in vin en fleo e defi sosyal ou ekonomik mannyer nou kapab apel li’.

Programm *methadone* ti vin an fors an Zilyet 2017 e an 2018 ti annan environ 1500 dimoun lo sa program. E ver lafen 2021 ti annan environ 3,000, me sa ti akoz dan letan restriksyon lo mouvman, akoz *COVID* en kantite ti arete swiv sa tretman.

Lo son pik program *methadone* ti pe kouver a en moman 5,000 ou 6000 dimoun sorti dan tou kous sosyete, depi sa zenn delenkan ki’n tonm dan labi ziska sa biznesmenn ki ti pe pran son drog trankil la ater. Sa i enkli dimoun tou laz, zonm

koman fanm, dan tou kous sosyete.

Ozordi i annan environ 2000 adikt ki ankor lo programm *methadone* regilye, i annan ki ale vini, e lezot ki lo sa programm pou long term

Mr Speaker konversasyon Methadone pa kapab ganny koze san mansyon eroin. En keksoz ki Prezidan Ramkalawan ti koz for lo la se ki nou bezwen travay pou elimin drog dan nou pei, akoz i pe detri, nou lazernes e an menm tan detri nou lekonomi.

Akoz i pe afekte, nou *workforce parski* mazorite bann viktim, i dan zot laz 18 a 50an. Malgre ki i annan ki pe pike a laz depil5an parey nou'n ganny dir dan bann prezantasyon. Bann zonm e fanm for ki ti devret dan lanplwa, e pe kontribye anver sosyete. E i ti osi promet ki ler i vin o pouvwar, enn son priyorite sete pou lager pou met sa sityasyon drog anba kontrol.

E dan sa transformasyon ki sa nouvo Gouvernman in komanse antreprann Mr Speaker, nou vvar kot lager in komanse, e pe al dan en bon direksyon, me i demann bokou zefor e volonte lo sakenn de nou pou annan en reisit dan sa lalit.

E mon war li tre enportan Mr Speaker, pou mansyonnen ki sa lalit kont drog i enn ki bezwen kontinyen ziska ki nou reisi met li anba kontrol, e menm elimin li net. Akoz ofe otan ki annan drog sirtou Eroin lo *market*, nou pou bezwen *methadone*, pou tret bann ki vin adikt avek li.

E nou lalit prensipal i bezwen,

- 1) Pe lager pou elimin tou drog danzere lo market, par entersekte li lo *point of entry*, pou anpes li antre, e sa a koup lo *supply and demand*.
- 2) Elimin bann gento *black spot* dan bann distrik partou kot sa bann droger i rasanble pou zot aktivite.
- 3) Retir bann viktim lo *methadone* gradyelman e anpeste ki zot depandan lo la.
- 4) Ofer zot en plas travay, e loportinite pou sanz zot lavi, e gradyelman annan en programm swivi pou re entegre zot dan sosyete. E sa ki anvi al lo en programm *cold turkey*, ankouraz zot, e ofer sa facilite.

Mr Speaker, en parti sa mosyon pe demann Gouvernman atraver Minister

Lasante, anvi ki la aprezan sa ki ti oparavan *APDAR*, ki aprezan in vin *DSAPTR* i tonm anba Minister Lasante, pou revwar Polisi.

Kestyon. Polisi i la, me eski i ganny met an enplimantasyon? Oubyen ek letan ki'n pase fodre met li azour?

E i enportan pou revwar lezot stratezi reabilitasyon e programm tretman *methadone*. E sa i osi enn bann sizesyon ki mon ti fer resorti dan mon larepons *SONA*.

An menm tan nou pe demann Gouvernman pou revwar ler ek landrwa ki distribisyon i ganny fer, e mon pe sizere ki anvi ki la sa programm pe tonm direkteman anba Minister Lasante, ti pou bon regarde si pa kapab ofer sa servis pre avek en klinik.

E mon ti menm sizere pou reviz ler ki i ganny donnen, pou pa *clash* ou kre difikilte pou bann lezot aktivite e ki i pa met retar bann lezot programm ki ganny ofer.

Mr Speaker, mon oule osi fer en remark ki dan en programm lo televizyon, en *recovering addict* in osi partaz menm lide. Sa dan li menm, a fer ki bann landrwa kot tretman pe ganny ofer konmela, parey Biro Ladministrasyon

distrik e sant kominoter ava vin en pe pli lib. E kot a napa sa groupman apre tretman.

Parski i annan bokou konplent par piblik, ki sak fwa ki sa bann kliyan in fini pran zot tretman, zot groupe lanmenm e i menm annan *dealers* ki profite pou vin vann son drog lanmen.

I annan ki pike e sa i prodwir bann zimaz, ki pa zoli pou gete. En pe parey kot sant kominoter Beau Vallon, kot zot fer laliny lanmen devan larantre lotel, kot touris i vvar zot. Ki devan en lekol kot zanfan pe monte desan, e apre zot al lanmenm la deryer sant kominoter zot al pike.

En sityasyon ki souvan in ganny raporte avek lapolis e nou'n menm diskite lo *regional team*. Ki nou bezwen rod en solisyon, e mon swete ki dan sa reform sa osi a ganny adrese.

E la mon pou sezi sa lokasyon pou mwan felisit bann ki malgre zot lo *methadone*, zot dan lanplwa, e koman zot fini, zot al travay. Bann parey Julien. Me pou sa bann ki pale travay, pou bann ki swazir *cold turkey* parey Fabio avek Julio, felisitasyon.

Me pou bann ki pa zot letan dan pye dibwa dimoun e rekolte tou sa ki lezot i plante, zot bezwen avans devan e vin

rod led. Nou bezwen rod en lot stratezi lo ki mannyer pou ed zot, i pa zanmen tro tar.

Mr Speaker letan nou pe revwar sa programm, i pou osi neseser ki nou revwar diferan keksoz. La ki sa programm pe ganny reformen, i neseser ki nou vvar kote ki in annan sikse. Kote ki i pa'n vreman reisir.

Revwar son lobzektif e osi si neseser pou bezwen vvar nouvo fason enplimantasyon. Regard lefe sa *methadone* lo bann adikt ki deza lo sa programm pou en kantite letan, son lefikasite.

Eski nou pe ganny sa batay atraver *methadone*? Ki lezot keksoz ki nou ti a kapab ofer sa endividé ki lo sa programm reabilitasyon? Vwar ansanm ki sa endividé i anvi pou lavenir.

Par lefe ki in tonbe ler i redrese ki i anvi fer? Kestyon ki bokou piblik i demande, ziska ki tan Gouvernman, pou kontinyen ek sa programm?

I annan ki'n menm sizere ki ler ANB i sezi bann byen, ki sa larzan i ganny met dan en fon kot Minister Lasante, pou tret bann konplikasyon ki zot gannyen an rezulta drog, tel parey *Hepatitis B*, ki rezulta partaz sereng ek kanmarad.

I neseser ki i annan en programm pli konpreansiv anver zot reabilitasyon, e non pa zis kit zot lo sa *methadone* pou bann letan endefini.

Nou bezwen en stratezi pli konpreansiv pou bon *follow-up*, annan en bon swivi e sa i enkli annan en *file* konplet lo zot, ki ava enkli bann detay relye avek zot lasante.

Ozordi sa bann maladi parey tibi in re antre dan nou pei set akoz labi drogMe anmezir ki nou reflesir nou tonm lo konklizyon ki *methadone* i tret zis adiksyon eroin me bann lezot drog ki antre dan nou pei tel ki *Opium, crack cocaine*, tretman pou zot adiksyon i osi enportan.

Donk i neseser ranforsi bann zefor e kolaborasyon pou nou kapab anpes tou drog antre dan pei. Ler zot ava napa drog, zot ava ganny *withdrawal* detrwa zour, apre zot ava vreman kapab komanse lo en tretman medikal pou geri zot adiksyon. E ler zot napa akse ek drog zot tretman pou bokou pli efektiv.

APDAR ti sipoze travay kont drog me son *focus* in plis lo eroin. Eski nou vvar mouvman kont bann lezot drog? Wi eroin i annan bokou users, me nou osi pe fer fas avek lezot kalite drog ki napa

tretman. I osi enportan ki ler nou koz lo *APDAR* nou osi vwar lezot kalite *addiction* parey lalkol.

Problenm lalkol dan nou pei i pli pir ki zanmen. E pour en sibstans ki legal e *available* partou, nou bezwen pli byen edike lo son konsonmasyon. Mon espere ki atraver standar *SBS* ki'n fek ganny *validate*, nou ava war en rediksyon dan bann lalkol ki pa lo standar e ki pli dezoryant nou pep.

I osi annan dimoun ki pa servi ni eroin, ni lalkol, me i servi medikaman ki dan lanvironnman toulezour pour li ganny son lefe. Latizann ki annan *opioïd* osi ladan i a laverti. E avan ki i vin en lepidemi, fodre ki nou ganny byen edike lo son litilizasyon, benefis e dezavantaz ki i kapab annan lo nou lasante fizik e mantal.

Fodre ki nou osi get en kou nou sityasyon prizon, kot en endividé i antre byen an bonn sante e ler i sorti in fini adikt ek eroin. Fodre ki programm *DSAPTR* i osi *extend* dan prizon pou asire ki bann tel keksoz i arete.

Ozordi prizonnyen i lo methadone, en landrwa ki pa devret annan drog. Kestyon, eski programm *methadone* i efektiv dan prizon?

Parey Prezidan in mansyonnen dan son *press conference*, si 10 mil dimoun pe depan lo *methadone* e pa pe travay, sa se 10 mil kontribisyon ki pa antre. E sa i osi 10 mil dimoun ki pe ganny siporte par Leta, alors sa i 10mil depans an plis ki nou pe fer.

E nou konnen ki i annan plis dimoun ki pe depan lo eroin ki pa pe kontribye anver nou lekonomi.

E Mr Speaker, pou ed Gouvernman rekiper sa ta larzan ki i pe depanse, pou aste *methadone*, nou kapab sizere ki bann *addict* ti ki lo sa programm ti menm kapab antre lo en kontra ouswa *bond* avek sa lazans, ki zot pou ede pey zot latizann parey tou pasyan ki al kot dokter. Zot avar antre lo en programm travay e zot ganny en *allowance*, larzan latizann a tir lo sa *allowance*.

Eski Minister Lasante pou kapab travay pour retir sa bann dimoun lo sa sibstans e fer zot endepandan? Bann kestyon ki reste la, napa larepons. E osi vin bann dimoun ki demen zot kapab kontribye dan nou lekonomi?

I enportan note ki sa transformasyon i devret anmenn en lefe, en rediksyon dan lakantite dimoun ki pe depan lo *methadone* e eroin. E

sa an retour ava ed zot e ed nou lekonomi. E pou tousala arive fodre i osi annan en reform kot ANB, sa Lazans ki sipoze entersekte drog depi kot i pe vini.

Mr Speaker, avek sa detrwa mo mon pou donn mon sipor sa Mosyon. Mersi.

(APPLAUSE)

MR SPEAKER

Mersi Onorab Esparon. Mon a aprezan apel Onorab Michel Roucou pou son entervansyon.

HON MICHEL ROUCOU

Mersi Mr Speaker. Bonzour tou manm koleg Onorab. Bonzour spesyal pou bann zabitan Mont Fleuri. Mr Speaker, sa Mosyon ki Onorab Labonte pe anmennen i vreman enportan pou lepep Seselwa e osi pou mwan, mon pran li vreman enportan. Akoz an vi ki mon sorti dan en distrik kot nou napa pa mal bann problemm drog ki sa osi i vin ek son problemm sosyal.

Mr Speaker, ler mon ti aprann ki Onorab Labonte pe anmenn sa Mosyon, mon ti fer li mon devwar kot mon ti al kot lofis APDAR pou mwan zwenn ek bann profesyonnel laba. Mon bezwen dir bann

profesyonnel akoz zot ki pe travay avek sa bann kliyan, ki zot pe servi *methadone*.

Mon'n ganny sans pou mwan zwenn avek Dokter Low Wah ki in asize ek mwan, in eksplik mwan en pti pe ki zot annan en stratezi plan ki zot vin avek, ki al pou 4an oubyen 5an.

E la i dir mwan ki zot ti deza pe travay lo novo Polisi pou zot revwar, akoz ki lannen prosenn zot programm ki zot ti 'n travay lo al i fini.

E osi Mr Speaker, dan nou dyalog ki nou'n gannyen nou de Dokter Low Wah, in fer mwan ganny en konpran ki se ki souvandfwa zot vvar ki zot gannyen nouveau kliyan ki vini, ki zwenn, ki vin kot zot pou rod sa servis.

E pou mwan Mr Speaker, ler mon'n asize mon analize, mon vvar poudir se ki i pa en louvraz fasil akoz ou pe deal avek imen e sakenn i annan son mantalite avek li, son fason panse ou konnen poudir ler bann kliyan i lo drog e zot latitud enn ler i vin avek diferan kalite mantalite.

Mr Speaker, mon dan mon distrik annefe dan sa servis bann *methadone* i zis an deor mon lofis, kot mon ganny sans souvandfwa ler mon ganny en pti moman letan pou mwan al

deor ek sa bann kliyan, asize dyalog ek zot. Fer bann pti fars, ekout en pti pe bann difikilte ki zot pe zwenn.

E dan sa bann dyalog ki nou gannyen, souvandfwa ou pou vwar poudir i annan 2 group. Ler mon pe dir 2 group, savedir i annan ki zot pe servi *methadone*, me selman pare ki ler zot fini zot retourn lo gento apre. I annan ki ler zot vin pran Mr Speaker, zot tant pou retourn dan zot landrwa travay.

E dan dyalog ki mon'n gannyen avek zot, zot in enform mwan ki zot osi zot anvi re ganny back zot lasante. E la ti annan bann serten propozisyon ki zot ti pe met devan. E menm i annan enn ki ti pe dir mwan ki se ki i annan en pilil. Mon'n oubliy son non. I annan en pilil ki zot ti kapab al aste dan *pharmacy* pou zot kapab servi e sa ti re *booster* en pe zot lenerzi, ki sa ler zot pran zot ti kapab pa servi sa *methadone* e sa ti kapab tenir zot pou bokou letan. I fer zot travay, i fer zot aktiv.

Me selman zot in dir mwan konmela zot pa pe vwar sa pilil dan bann *pharmacy*. E zot ti menm dir mwan sey koz en Gouvernman, gete, mon ava rod sa non pli tar, mon ava fer gannyen Mr Speaker, pou gete

si sa i kapab re ganny anmennen dan bann *pharmacy*.

Akoz zot in pare pou zot aste sa zot menm. E i menm annan ki dir mwan zot ti pe aste sa zot menm zot ki sa ti ed zot pou zot re pran zot lavi pou zot vin dan kominote pou zot kontribye dan lekonomi pei Mr Speaker.

Mr Speaker, osi dan bann diskisyon ki mon'n gannyen avek sa bann kliyan, zot in fer mon ganny en konpran ki se ki zot annefe bann sityasyon lavi ki petet zot in pas ladan, ki petet ki fer zot antre net dan sa sityasyon.

Akoz souvandfwa zot vwar poudir zot ganny abandonnen par fanmir, kot zot napa landrwa reste e zot vwar zot pe vin dormi dan senmen sa landrwa kot sa aktivite pe deroule. E osi zot var zot pa pe ganny sipor dan en lot fason avek diferan Departman.

E mwan mon krwar dan sa revwar Polisi ki APDAR pe revwar, petet i devret re anmenn sa dyalog lo en lot nivo. Ler zot pe revwar zot Polisi, petet zot devret enkli la kominote ladan. Enkli lakominote kot nou vini, bann ki la avek sa bann kliyan.

Akoz laplipar nou dan nou fanmir nou annan en

manm fanmir ki petet i pe servi *methadone* e ki sa pe afekte zot.

E ki sa problem ki sa bann dimoun i pas ladan, s ai vin avek bokou problem sosyal. Enn se ki ou vwar ki zanfan i soufer, paran i soufer. Espesyalman bann zanfan ki vreman ptipti. Kot ou vwar papa i tonbe e souvandfwa nou vwar poudir i annan fanmir kot manman ek papa i ganny afekte ladan e ki menm manman ek papa i lo sibstans, ki sa zanfan li i bezwen sa lankourazman sorti kot lakominote ouswa avek bann Departman Sosyal ki sa pou ed zot.

Mr Speaker i annan en keksoz ki nou, nou bezwen fer kler avek bann kliyan, nou, nou pa zot lennmi nou. Nou, nou zot zanmi. Souvandfwa petet ler nou, nou pe sey dres zot pou met zot lo sa bon semen, zot panse poudir nou, nou pe kritik zot. Nou pa pe kritik zot nou. Nou anvi vwar zot, sa ki bon pou nou i osi bon pou zot. I pa vedir ki si nou, nou pa dan okenn sibstans i pa vedir ki nou pa vwar se ki zot bezwen sa led.

E nou, nou avi ki ler zot vwar nou vini, nou vin pou vin ed zot dan nenport ki fason zot pran li pozitiv. E osi Mr Speaker, letan mon ti pe koz ek enn de bann kliyan ki servi sa

servis an deor mon lofis, zot ti met dan mon latansyon poudir i annan zot ki ti pe dir, si an ka vreman ti annan sa opsyon pou zot servi zot lapay. En, servi zot lapay. Kanabis ki zot pe dir.

Sa zot ki ti dir Mr Speaker, i pa mwan. Ki petet sa ti pou tir zot latansyon pou zot al lo sa eroin oubyen lo nenport ki drog. bann drog ki pe andomaz zot.

Mr Speaker, mwan dan mon letan, ler mon ti pe grandi, mon'n grandi dan en landrwa kot ti annan bann dimoun otour mwan ki zot ti pe servi kanabis zot.

Me selman zot ti bann dimoun ki ti travayan. Zot ti bann dimoun ki ti leve bomaten, ou pa ti vwar zot pe *kick okenn* par, pe dormi okenn par ouswa pe depan lo larestan dimoun. E mwan selman mon ti pran mon desizyon pou mon pa al okenn dan sa bann aktivite, pou mwan pa al ladan,

Me selman annefe, mon pwen ki mon pe fer pase, se ki APDAR, ler zot pe revwar bann Polisi, espesyalman la ki zot Polisi pe fini. Menm enkli bann dimoun dan lakominote, get zot, pase. Demann zot *views* lo la e menm zwenn ek zot bann kliyan la deor, demande.

Akoz ler mon'n asiz avek bokou zot. Zot in montre mon poudir zot annan en lentere zot

osi pou zot repran zot lavi akoz zot vwar poudir sa pe afekte zot.

E osi Mr Speaker, mon'n ganny sans pou mwan fer zot kler poudir Gouvernman, pa toultan ki Gouvernman pou la. Ki pou zis vini donn *methadone*, akoz i koute sa. E nou pa kapab pe kit zot pou zistans bokou letan lo la.

Pou ariv en serten letan kot zot pou bezwen rod en *exit* lo la pou kapab, petet *cold turkey* ki'n ganny dir oparavan e petet rod bann lezot fason pou zot kapab retourn dan lasosyete e kontribye e ki sa demen i ava ed nou lekonomi.

E petet pou ed osi ek sa bann zafer kot nou annan bann dimoun ki pe *retire* pou zot pran plas sa bann dimoun.

Mr Speaker, kot mon lofis i annan apepre 66 bann kliyan ki vin pran *methadone* tou le bomaten Mont Fleuri e pou fer not se ki sa ki'n ganny en konpran poudir ou kapab, nenport landrwa kot ou ete kot i annan sa servis.

Parey enn ler dan bomaten mon zwenn bann zabitan ki lev granmaten, ki zot, zot al pran anvil akoz zot dir mwan ki sa i ed zot pou zot ariv dan zot travay a ler.

E sa osi i en lot propozisyon osi ki zot n mete, ki petet i devret i annan en lot

landrwa ki petet i ouver en pti pe poli granmaten, akoz Mont Fleuri i pas dan 9er, 9er edmi. Ki sa i ava ed zot akoz zot ganny bokou problem dan zot landrwa travay. Ki ler zot ariv an retar oubyen zot pe sorti pou zot al pran zot *methadone*.

E osi ti annan en propozisyon kot zot ti pe dir ki se ki i devret annan en landrwa aki petet i devret, pou zot ale. Akoz i annan zot Mr Speaker, ki pa anvi personn i konnen poudir ki zot lo sa program, akoz la deor i annan bann dimoun ki vreman *smart*, ki travay, ki annan bann bon pozisyon ki zot pe servi *methadone*.

Mr Speaker, mwan mon pou donn mon sipor sa Mosyon akoz koman en paran, mon osi mon annan mon zanfan. You never know demen kote ou zanfan i tonbe e kote i al arive ki demen personn, okenn paran nou pa anvi vwar nou zanfan pe depan o okenn bann lezot sibstans. Lo *methadone* oubyen lo lezot latizann ki zot pou bezwen bwar pou zot lavi diran.

E mwan ki mon pe dir, mon pou donn mon sipor Mosyon Onorab Labonte lo la e mon pe zis anvoy en lapel deor avek nou bann frer, nou bann ser, se ki enn ler i difisil ler ou

tande poudir annan en zenn ki petet ti lekol ek ou oubyen dan ou vwazinaz ki'n grandi ansanm avek ou la, ki ou tande poudir in mor swa in *overdose*.

E mwan mon'n vwar paran ki soufer. Akoz ler ou ganny en *call* ki dir ki poudir i ou zanfan in ganny anmase akoz petet i ti pe enzekte son lekor avek kek sibstans. Mersi Mr Speaker.

(APPLAUSE)

MR SPEAKER

Mersi Onorab Roucou, nou a pran *pause* la nou a re pran deba 11er.

(BREAK)

MR SPEAKER

Wi mon apel prosen entervenan dan deba. Onorab Naddy Zialor.

HON NADDY ZIALOR

Mersi Mr Speaker. Bonzour tou mon bann koleg Manm Onorab. Bonzour tou bann ki pe ekout nou osi bomaten an direk. En bonzour spesyal pou bann dimoun ki nou pe target direkteman pou sa Mosyon ki'n ganny table devan nou Lasanble ozordi.

Mr Speaker mon pran laparol bomaten avek bokou imilite dan lesans ki mon apresye ki a sak fwa en Mosyon i vin devan nou Lasanble, i permet nou koman bann dirizan pou vreman annan en konversasyon lo bann size ki pe afekte, ouswa ki annan en lefe direk lo nou bann dimoun ki nou dir labaz.

E sa Mosyon a mon *avis* i tous bann dimoun en serten group dimoun labaz, e bomaten in ganny dir avek nou ki annefe si nou onnet ek nou lekor dan nou kominote, parfwa menm dan sak fanmir ou pou annan enn ouswa de dimoun ki vin depandan lo drog, irespektiv si ou lo eroin. E annou osi pa oubliye parey mon dir toulstan lalkol osi i en drog.

Alors mon zwenn Onorab Labonte pou form parti sa konversasyon, pou form parti donn nide partaz lopinyon an sa ki konsern sa Mosyon. Me osi annan en serten direksyon lo kote nou'n ete vizavi reabilitasyon bann dimoun ki pe depan lo drog, petet annan en regar lo ki bann fo pa ki nou'n fer koman en pei, e ki bor nou anvi arive ver lavenir.

E si ou permet mwan, mon anvi fer referans direkteman avek *Manifesto Linyon Demokratik Seselwa*. Pou

mwan sa Manifesto in toulstan en *Manifesto* ki reste koman en konpa ki diriz nou koman en Gouvernman. E lo paz 27 i annan en paz ki mansyonn i fason ki nou, nou anvi adres sa sityasyon drog dan nou pei. E se sa baz ki mwan ozordi mon anvi aport mon kontribisyon.

Lo trwazyenm pwen i dir koumsa ki "LDS" in reste konsistan dan siport ek programm *methadone* e dan zefor pou anmenn en reabilitasyon e tretman e sa pou kontinyen.

Sepandan, sepandan fodre ki *methadone* i pa reste sa sel eleman me fodre ki i annan lezot eleman ki pou fer sa programm reabilitasyon efektiv. In dir ki nou pou bezwen annan en revizyon lo lafason ki nou *manage* e *supervizyon* medikal avek konbinasyon *counselling* e lezot terapi e programm reabilitasyon."

Mon ti ava envit nou osi pou les sa vin sa konpa pandan letan ki nou pe deliber lo sa Mosyon. Mr Speaker i annan bokou rekomandasyon ki'n ganny fer resorti atraver bann entervenan avan mwan, e mon anvi met serten lanfaz lo la.

E nou, nou reprezent en serten, nou reprezent piblik nou reprezent lawwa Lepep Seselwa. E si nou onnet ek nou

lekor, nou pou dir ki in annan differan lopinyon diversifye vizavi programm *methadone*. In annan bann lopinyon ki parfwa kontroversyel.

Me sa ki enportan e mwan a sak fwa ki mon ganny loportinite pou raport mon kontribisyon, enn mon bann prensip kardinal, se annou fer sir nou atrap lanmen sa ki pli feb e met li debout pou al ver en semen dwat e lavenir.

E *methadone*, programm reabilitasyon in enn bann pwen ki nou'n kategoriz sa group dimoun koman bann dimoun i vilnerab. E mon pou ankor enn fwa fer referans avek nou *Manifesto* e petet sa i ava enn bann rekomandasyon, letan mon'n tann Onorab Labonte dir ki sa plan stratezi i pe ariv a donn lafen. E atraver sa Mosyon nou pe osi don serten kontribisyon, mon panse ki fodre pa ki Minister Lasante i drafte en Polisi oubyen en stratezi lo li tousel, me annan en Komisyon, e Komisyon ki ava en *High Level Commission* pou an en stratezi kordinen kot ou ava annan *stakeholders* ki a vin ansanm e vreman annan en vizyon lo ki fason ki nou anvi dil avek sa sityasyon.

Mr Speaker pandan ki mon pe koze, mon ti a osi zwenn avek lezot mon bann koleg, pou

mon aport sipor bann *staff* ki'n travay e ki pe travay avek sa divizyon ozordi. Mon konnen ki i pa'n en latas fasil, parske la ou pe direkteman dil avek imen ki annan diferan karakteristik, differan mantalite, differan *behavior*.

E parfwa mon konnen ki atraver lopinyon piblik, i donn zot serten dekourazman. Me nou koman bann dirizan nou pou toulstan la pou donn zot sipor e regarde ki mannyer nou kapab travay ansanm.

Enn bann pwen ki mon ti fer resorti letan ki ti annan *the repeal of APDAR Act* isi devan nou Lasanble, e bomaten Onorab Espanon in tous sa Onorab Bistoquet in tous lo la, egalman Onorab Labonte.

Se ki la fason ki nou pe distribye *methadone* atraver pei. Letan i nou pe koz elev dinyite imen, letan ki nou pe koz tret tou dimoun dan en fason egal, dan en fason diny, mon santi, mon pa konnen si lezot Manm i ava partaz, bann lezot Manm osi pe partaz bann menm lopinyon.

Ki distribisyon *methadone* osi i enn bann stratezi ki bezwen ganny revwar a lavenir. Si nou pe fer *methadone* vin en preskripsyon klinikal, mon krwar in ariv sa moman pou nou bouz li dan en facilite

Lasante, kot sa manman - parske mwan menm mon a plizer repriz mon'n fer letour dan bann stasyon ki pe distribye *methadone*.

E mon'n vvar manman avek zanfan ki vin pran, ki pe debout dan en laliny ki'n regroupe. Mon'n vvar zenn ki tou sa la i en sel groupman ki deza ou pe anvoy en mesaz, deza popilasyon pe dir gete lala sa bann group dimoun ki lo *methadone*.

Me annou relev zot dinyite, donn sa dan en facilite lasante kot mwan si mon pe servi *methadone* tou le bomaten mon vini, parey nenport ki dimoun ki pe vin pran e latizann anba klinik, mon pran mon preskripsiyan, mon pran mon doz. E byensir tout an prenon konsiderasyon *staff*, *staffing*.

E mon krwar sa i ava enn bann premye letap pou montre poudir nou ladministrasyon i anvi e pou fer en keksoz differaman. Dezyenm pwen ankor lo en lot, nou en not pozitiv, e mon anvi Sesel i konpran sa byen, se ki nou annan pa mal dimoun ki pe kontribye.

E mon anvi tir mon sapo avek zot, ki pe kontribye dan lekonomi Sesel, ki leve tou le bomaten ki al travay e zot pe

pran zot latizann *methadone* dan bomaten, malgre i annan en pti group ki toulstan li i ganny dir i pa pe travay.

Me mwan mon konnen ki i annan dimoun ki pe viv en lavi kotidyen leve bomaten, pran zot latizann, al dan zot louvraz tenir zot fammir. Sa i bann lankourazman ki parfwa nou oubliye koz lo la, ouswa parfwa nou pa koz lo la e i donn sa lenpresyon ki pa pe marse.

Mwan mon krwar ki dan bann programm stratezi zot ti, mon rapel en moman donnez zot ti'n komanse dan bann programm stratezi lavenir, se tanzaot rod sa enn li ki i pe travay dan en fason pou ou ki pe travay ki i pe kontribye ki'n stabilize, me ki pe deservi sa divizyon, anmenn li devan i ava ankouraz sa enn ki li i pi feb i ava osi pe *mentor*.

Mon konnen i annan pe *mentor* dan en fason piblik sa enn ki nou, nou vvar li petet i pa pe travay, oubyen i zis form parey Onorab in dir taler i zis pran son latizann apre i retourne dan drog.

En konponan enportan ki fodre pa nou blyie se ki sa group i en group ki nou lafors travayer. E se pour sa rezon mon'n fer referans avek Konvansyon e avek premye, *sorry* avek *Manifesto* e premye

preanbil ki koz lo sa Commission.

Parske nou bezwen annan en sinerzi, en *willingness at political level* pou nou vreman anmenn sa sanzman *mindset*, an sa ki konsern *the whole program* e sityasyon drog Sesel.

E la mon anvi profit sa lokazyon pou nou *tackle root cause of* sa problem, osi lontan ki i annan *drug dealers*, nou pou kontinyen annan *supply and demands*.

So atraver sa Mosyon mon osi pe lans lapel avek Gouvernman, dayer mon felisit Gouvernman pou sa travay remarkab ki'n ganny fer pou bann *drug dealers*, pou nou idantifye zot e koup *supply*.

Me ou konnen, mwan i fatig mwan letan par egzanp mon dan bor semen e mon vvar piblik, *well insinuate* ki entel i en *drug dealer* e nou *praise* li, me solman sa viktim ki nou konnen i en viktim drog li nou kondann li. Sa *mindset of* i bezwen sanze Mr Speaker.

E bomaten mon'n apresye letan Onorab Esparon in dir ki kontan bann paran lontan, i dir ou ti napa eroin me ti annan taba dipei, me ti osi annan.

E la mon mazin en konversasyon ki mon'n annan avek enn bann dimoun i ti dan NYS, kot li i dir ou koumsa be

non ou konnen lontan nou ti servi nou pti kanabis, me ti napa vyolans, ti napa lager, ti napa *methadone*, nou ti ploy nou pti lapay nou i fimen e nou ti antre dan lakour.

Sa osi *unfortunately* i en konversasyon ki nou koman en pei nou pou bezwen annan a lavenir. I enportan ki nou konpran en keksoz, e mon retourn lo mon pwen orizinal i enportan ki nou konpran ki mon rol koman Dirizan. E sa mon ti fer resorti dan mon deba lo Mosyon Onorab Bastienne, nou rol se pa pou nou kondann nou sitwayen me pou nou donn sipor.

Mon osi anvi fer resorti ki letan nou get sa divizyon, annou pa regard li selman pou dil avek eroin, parske i annan bokou lezot adiksyon Sesel, bokou lezot adiksyon ki nou pe senpleman donn, nou bezwen balans nou resours e osi regard ek bann lezot *trend* ki pe komans rantre dan pei *as en form of addiction*.

Mr Speaker mon krwar dan lavenir Sesel. Mon krwar ki koman en pei si nou serye e si nou tyonbo sa bout ki neseser pou tyonbo, pou nou anmenn sa transformasyon letan nou koz lo transformasyon sa osi i enn bann landrwa ki merit

ganny regarde koman en priyorite.

E parey mon fer toulezour sak fwa mon koz lo en Mosyon, mon swe i se ki Gouvernman i ekout nou lavwa ki lavwa Lepep Seselwa, e ki bann rekomandasyon ki pou sorti ozordi i osi enkli rekomandasyon Lasanble Nasyonal Sesel.

Avek sa mon anvi dir avek Onorab labonte ki i kapab kont lo mon sipor. E mon anvi dir avek bann *staff* e Departman Minister Lasante ki zot kapab kont lo mon sipor. Mon anvi dir avek ou ki en viktim drog e adiksyon ki ou osi kapab kont lo mon sipor. Mersi Mr Speaker,

MR SPEAKER

Mersi Onorab Zialor. Mon apel Onorab Naidu.

HON SATHYA NAIDU

Bonzour Mr Speaker. Bonzour tou koleg Onorab e en bonzour spesyal pou zabitan St Louis ki a lekout e ki pe swiv sa sesyon. Mr Speaker i pa fer premye fwa kot nou pe adres sa size. In annan plizer Onorab ki'n fer resorti sa sityasyon dan zot diskour lo Leta nou Nasyon.

Nou'n depouy Bidze pou APDAR ki'n bouz anba Lasante ozordi a 2 repriz. In annan kestyon in annan repons, e apre

in osi annan sa *Bill* ki'n permet sa transformasyon arive, kot *APDAR* in sorti pou tonm dan Lasante. E dan sa deliberasyon ki nou ti'n fer koman bann Manm Lasanble Nasyonal nou ti'n fer resorti plizyer pwen.

E ozordi nou annan en lot loportinite atraver en Mosyon, pou fer resorti nou konsern ki an menm tan sey rod bann solisyon, pou kapab bouz de lavan pou fer sir ki nou adres sa sityasyon.

Nou tou nou okouran poudir ki *APDAR* in la depi 2017 e byensir, depi son legzistans in annan en Bidze apepre 970milyon, si non plis in ganny depanse lo sa programm.

E byensir sa *tax payer* i pou poz kestyion, sa dimoun ki pa konnen ki savedir adiksyon byen sir i pa pe fer okenn fas kot i annan en problem ki i annan enn son zanfan dan adiksyon e i pa konnen ki savedir problem sosyal lo en lanpler parey en bon pe zot pe fer fas avek ozordi, pou annan fristrasyon, e zot pou poz kestyion ki pe arive.

Espesyalman ler zot war en bis e ou war en group dimoun pe debout, ki kalite lendikasyon i leve pou nou koman en pei touristik, ler en touris pe debout e pe fer son lalis e apre i realize ki Sesel i

annan en lepidemi eroin. *The problem is staring right at our face.* E fodre ki nou fer fas avek sa problem, fodre i nou rekonnet sa problem.

E dan mon distrik St Louis problem i aparan, partou kote ou ale ou war li. E fodre ki nou kapab annan konfidans pou vin devan pou rekonnet sa problem sa osi pou met presyon lo bann Departman.

Mon konnen ki travay i pa fasil ditou pou bann *staff* dan sa domenn, me selman i enportan ki zot tou zot pe donn 100poursan e zot partaz menm vizyon.

E zot bezwen realize ki *methadone* i annan 2 fason ki sa programm i ganny distribye. Enn i ganny fer lo en baz *low threshold*, enn i ganny fer lo en baz *high threshold*. Laplipar bann dimoun ki lo sa programm pe pran lo *low threshold* savedir zot pe ganny akse avek eroin.

E i annan en bon pe zot ki pa pe kapab fer sa tranzisyon pou bouz lo *high threshold*. Pirman akoz ler sot in fini pran zot sipoze zot pa konnen ki bor pou le sertern zot, ouswa zot retournen ki bor zot in sorti e sa se lo gento.

E *Lim Nasyonal* gento li menm, pa pou adres sa problem. Fodre ki nou rod en mwayen pou ankadre zot apre

ler ki zot in pran *methadone*. Malerezman serten zot ou kapab met zefor pou sey met zot dan lanplwa. Me selman zot pa pe kapab tenir zot pa pe tenir sa pozisyon ki zot ladan pou en pe letan, akoz mantalman zot pa dan en leta lespri pou kapab antre dan travay.

Zot seye zot, i annan serten zot ki mon konnen ki'n seye, me malerezman i *relapse* e i bezwen revwar li pa pe antre dan lanplwa. E byensir i an diskriminasyon osi ki vini, ler i annan serten zot ki al travay. Me byen sir ler i annan serten ledikasyon ki zot osi zot pou bezwen fer pase atraver en programm, kot zot konnen ki mannyer zot pou reprezent zot ler zot al rod travay.

E byensir sa anplwayer pou war en dimoun ki byen prezantab pou li kapab pran li dan en lorganizasyon oubyen dan en biznes. So se la kot Departman Lanplwa i antre.

E nou tou nou konnen ki i en problemm sosyal osi, se la kot Departman Sosyal i antre.

Nou tou nou konnen ki sa bann endividé ki lo sibstans, zot pa'n ganny sa gidans. Laplipar zot, zot pa'n ganny gidans zot paran, ouswa zot paran pa'n fer le neseser dan serten lenstans, ouswa in annan moman kot paran in fer son mye, me

malerezman sa zanfan in war lezot keksoz koman en distraksyon e in sot lo la, in perdi direksyon.

E byensir lo sa kote i vin ledikasyon. Rezon mon'n mansyonn sa diferan Departman se akoz fodre ki i annan sen sinerzi ant tou bann Departman, tou bann *stakeholders* pou fer sir ki nou pou kapab adres sa problem.

This is not only a health issue, nou pou bezwen regarde lo en laspe bokou pli global. E ler nou pe koz lo ledikasyon a plizyer repriz, mon'n fer referans avek PSE, fodre ki nou kapab revwar sa *curriculum* dan en dele letan ki kourt e enplimant li osito posib, pou fer sir ki sa novo zenerasyon ki pe grandi, deswit zot pou ganny lenformasyon neseser lo *the harsher side to life* Mr Speaker.

E lo sa size ler nou pe regard adiksyon dan li menm, mon'n fek mansyonnen ki i annan en group zot ki pa konpran e alors zot en pe fristre. Nou bezwen realize ki i annan en ta dimoun la ater ki pe fer fas avek en kantite soufrans la par ler zot tonm dan sibstans, e zot pe viv dan en lot lemonn.

Zot pa dan menm lemonn avek nou e fodre ki lo kote lasante si zot santi i annan

mankman travayer al travay *ANHRD*; a de repriz nou'n poz kestyon lo *ANHRD* pou dir kwa ki zot pe fer, pou fer sir ki sa mankman mendev i ganny adrese lo nivo kot bann *scholarships* pe ganny donne, i spesifikman pou tel pozisyon, e nou pe ankouraz bann zenes pou pran sa bann karyer *paths*, pou nou kapab rezourd sa problem.

Mankman mendev akoz si nou pou napa ase psikolog, e ki mannyer eski nou pou adres problem lasante mantal sa bann endividé, ki'n pas atraver sa bann troma ki menm mwan mon pa pou kapab dekrir ki mannyer i ete.

I'm speechless. Ki mannyer zot ankor pe debout serten zot? E fodre ki nou kapab rod bann mwayen pou ankadre zot. So si nou kapab angaz dan bann relasyon bilateral, kot nou kapab ganny en pe, ek en dimoun spesyalize *at least* en douzenn zot, i a vin en komansman.

E byensir Prezidan li menm, ler in koz lo bann groupman ki i war partou kote, in fer resorti poudir akoz nou pa anvoy zot lo en zil?

Be sa pou mwan si personnelman ler mon pe dray partou kote mon dir be i annan rezon, be akoz eski nou pa pe

eksplwat sa loportinite la dan sa moman kot nou napa mwayen finansman pou kapab fer kek batiman pou ankadre zot?

Akoz eski nou pa fer le neseser, kot nou pran sa 139dimoun ki lo *high threshold* savedir zot pe pran zis *methadone*. Se la kot nou fer sa traze kot nou pou kapab tir sa bann endividé lo *methadone*.

E pou le moman nou napa s fasilité. *So let's try thinking outside the box.* E i enportan ki nou fer li akoz si non nou pou war en lot zenerasyon ki pou al pas dan bann zafer. Otan ki, parey Onorab Zialor pli boner ti'n fer resorti, zot dir i entel, entel, entel i en *drug dealer* dan distrik i ganny lenformasyon.

Be par ler mwan osi mon gannyen, e mon demande ki pe arive avek sa endividé. Me selman nou bezwen realize pou aksyon ganny pran fodre ki i an levidans e fodre ki nou kapab fer fas atraver bann *due process* pou nou kapab sey adres sa bann endividé ki ankor la dan distrik.

E mon pe lans en lapel avek zot pou arete silvouple akoz lavi i en serk visye. Demen ou pa ni konnen si ou zanfan pou tonm ladan. Alors reflesir byen avan ki ou angaz ou dan sa bann aktivite. Reflesir poudir

ki ou aksyon, tou bann aksyon ki ou fer ozordi i annan en konsekans demen. Demen ou pa pou la ou me selman eski ou'n kit sa landrwa dan en pli bon leta ki i ete?

E Mr Speaker lo size reabilitasyon, nou osi annan sant kominoter dan tou nou bann distrik, *it's dead*. Napa naryen ki pe vreman ganny fer, be akoz zot pa itiliz sa landrwa pou fer bann *support groups*. I annan en serten zot Mr Speaker serten sa bann endividé ki lo *methadone*.

Zot bokou pli entelizan ki mwan, me selman malerezman zot pa'n ganny sa gidans dan lavi dan en serten sans. E zot oule ki en dimoun i tyonbo zot lanmen. E alors lo en baz kominoter fodre ki kominate osi i angaz li.

I annan en ta zot laba deor ki annan en ta potansyel, zot annan en ta an term konesans, ouswa leksperyans ki zot anna dan lavi. Fodre ki zot vin devan pou kontribye e fodre ki sa Polisi i sey adres sa laspe, Mr Speaker. E pou mwan personnelman mon krwar i bezwen annan en irzans par deryer sa pou nou kapab adres sa sityasyon ankor en fwa pou tou.

E there needs to be lots of effort towards it e pou mwan

personnelman, eski sa pe ganny fer, non, lo kote *Lodge Street* pa lenstan vwar e kantite groupman ki pe arive, ziska preznan i pa'n ganny adrese, *Law and order also has to take its course* dan serten lenstans pou kapab fer le neseser.

Me si pa pe ganny fer be ki mannyer eski nou pou adres sa sityasyon? So i pa zis en problemm lasante parey mon'n fer resorti i annan bokou Lazans ki bezwen angaze pou kapab adres sa sityasyon. Sa i mon bann kontribisyon lo sa size Mr Speaker. Mersi.

MR SPEAKER

Mersi Onorab Naidu. Mon a pas laparol Onorab Sandy Arissol.

HON SANDY ARISSOL

Mersi Mr Speaker. Bonzour tou Manm e tou dimoun ki a lekout. Mr Speaker nou pe koz lo en Mosyon anmennen par Onorab Andy labonte ki pe demann avek Gouvernman, ki lir koumsa:

Prenon kont restriktirasyon kot APDAR in aprezan vin DSAPTR en divizyon anba Minister Lasante, sa Lasanble i demann Gouvernman pou revwar son Polisi e stratezi lo reabilitasyon e tretman programm, pou lit kont labi sibstans.

Mr Speaker en kantite keksoz in ganny dir an relasyon avek drog, e en kantite propozisyon in ganny fer.

I annan Onorab Naddy Zialor ki'n mansyonn en pe *Manifesto*. I annan bann lezot Manm ki'n koz dan montre respe pou bann adikt par sey kriy zot dan diferan non. Oubyen pa stigmatiz zot dan en fason be tret zot byen.

E mon anvi komans koumsa, mwan mon pou koz lo sa Mosyon mon pe don siper sa Mosyon, parske mon anvi retourn lo sa pwen ki zot in dir e zot bezwen tret sa bann zenn, bann dimoun, bann adilt bann adikt, parey nou apel zot ki ozordi nou pa olye apel zot bann adikt be i annan en lot non;- en pe pli profesyonnel ki mon'n tann mansyonnen nou apel zot, tret zot byen.

Be Mr Speaker mwan mon ganny dir, mwan mon aprann pou ou ganny trete byen, dan lavi fodre premyerman ou, pou pe reste ou lekor byen.

Akoz mon dir sa, ou konnen parske dan sa transformasyon ki pei i ladan mwan sa ki mon ti a kontan vwar ek sa bann restriktirasyon ek *APDAR* ek Minister Lasante, e sa ki mon ti a kontan vwar pou bann zenn, bann adilt,

bann dimoun ki ozordi pe swiv *methadone*.

So mon ti a kontan vwar poudir zot osi zot kapab ed zot lekor pou zot sorti dan sa sityasyon ki zot vwar zot ladan ozordi. Parske an gran disan letan nou pe viv, nou tou nou swiv en parkour lavi ki nou, nou anvi.

I annan zenn ki kontan pou al etidye ; i annan zenn ki kontan pou antre dan drog ; i annan zenn ki kontan pou swiv sport, me parfwa letan ou vwar pou dan sa ban sibstans granmoun i vire i dir avek son vwazen Sandy in ganny tape avek lavi parske Sandy i vwar li i dan drog e ozordi i pe swiv n tretman avek Minister Lasante ki nou, nou apel sa *methadone*.

Be ler Sandy in ganny tape avek lavi, Sandy in bezwen konpran poudir in ganny tape avek lavi e ler ou tonbe dan lavi ou pa kapab reste anba. Ou bezwen monte dan lavi, ou bezwen sorti kot ou'n tonbe e redres ou parske i ankor annan en kantite letan pou ou viv.

E pou ou fer sa Mr Speaker ou bezwen siper la kominote, ou bezwen siper ou paran, ou bezwen siper ou fanmir, e ou bezwen siper pei an zeneral pou fer sa.

Be ki mannyer pei vwazen, fanmir pou siport, ou si ou

premyerman ou pa siport ou lekor? Ki mannyer sa dimoun pa siport son lekor? Eski ozordi si Sandy Arissol pe pran, i lo drog, i en adikt parey nou dir e pe swiv en tretman *methadone*, Sandy i bezwen mars sal tou leres son lavi? Non!

Sandy i lo drog in ganny tape avek lavi, ozordi i pe swiv en tretman, Sandy i kapab kontinyelman mars prop, sanze parey tou leres dimoun dan pei i sanze. Eski si Sandy in ganny tape avek lavi, i vwar li dan en sityasyon drog ozordi, e i pe pran *methadone*, eski Sandy i bezwen kontinyelman kas papay tou bann dimoun ki i vwar dan distrik?

Eski Sandy i bezwen kontinyen vol son paran me son manman paran son ek met dan dip, take avek lakle pou li kapab dormi byen aswar? Eski sa ki Sandy i bezwen fer pou li ganny sipor fanmir, lemonn, distrik avek pei ki anvi ed li? Non Mr Speaker.

Si Sandy i anvi bouze dan lavi i pou bezwen konpran poudir lavi in tap mwan koman en zenn, mon anvi refer me mon bezwen ganny sipor tou leres dimoun.

E alor premyerman i bezwen koman avek mon menm. Mon bezwen konn savwar viv, savwar fer e mon

pou bezwen levensman tre o ki'n fanmir ki'n donn mwan sipor ansanm tou sa lannen poudir, non. Mwan osi mon anvi sanze e mon bezwen siport zot.

Menm si mon'n ganny tape ek lavi mon pe swiv en tretman *methadone*, mon kapab leve sey tap laport kot lanplwa, sey rod en landrwa travay zisteman pou mon kapab fer en kontribisyon dan lakour kot mon pe reste.

Pa akoz Sandy i koz lo drog ki Sandy i bezwen pa travay, siz i desann tou le 6er bomaten dan distrik dan nor i fer kot sant kominoter Beau Vallon i asize 8er, i pran son tretman *methadone then* pou li lazournen i lib.

I kapab monte desann dan semen i kapab demann tou dimoun ki vin dan laboutik Beau Vallon en R5, en R10, i kapab senpleman ozordi pas anvil en kou demann en dimoun larzan. E si sa dimoun pa donn li alor i kapab zoure; i kapab ankoler ek ou i kapab ofanse.

Non Mr Speaker, e sa transformasyon ki mwan mon anvi war pa sa ki mon anvi war pou Sandy. Me mwan mon anvi war poudir si Sandy in ganny tape avek lavi in vwar li dan en sityasyon drog, parey i kapab

arive avek nenport ki dimoun, parey i kapab arive avek nenport ki zanfan, li osi i kapab anvoy en lanmen demann en led pou lasosyete kapab ed li.

Me premyerman i bezwen komans avek li. I annan en kantite manman ozordi deor ki'n plere, i an en kantite papa ki'n plere parske in perdi en zanfan dan drog. Nou annan en kantite manman ozordi ki'n depans en kantite larzan, kantite papa,, kantite fanmir ki'n depans kantite larzan pou anvoy son zanfan trete aletranze.

Me kestyon ki nou bezwen demande, eski sa zanfan ti anvi al trete aletranze pou sa kantite larzan ki ou'n al depanse? Sa sete swa son manman ek son papa, me ler i retournen i retourn ankorr dan menm sityasyon. E sa i montre ou poudir ki pa li ki ti anvi. Me paran ti anvi ed zon zanfan, me son zanfan pa ti anvi ed son leko.

Mr Speaker mon'n komans koumsa parske mon krwar i enportan letan nou pe koz lo drog, an menm tan fodre pa nou vin tro senpatik an relasyon avek sa size. I en size serye, i en size ki pe afekte nou lekonomi, i en size ki tous tou dimoun e nou tou nou pa kontan pou annan enn nou

zanfan kot nou ki pe angaz li dan drog. Personn pa pou oule sa.

Me par kont drog in ariv dan nou kominote, in ariv dan nou pei e nou bezwen dil avek li sey nou dil avek ou sityasyon. Se pou sa rezon nou koman en Lasanble e mwan koman en Manm Lasanble mon fer li, mon devwar tou-le-zan pou mwan vote, pou asire ki tou nou bann zenn ki ganny afekte avek drog zot pe swiv zot tretman zot ganny zot tretman Mr Speaker. Nou fer sir nou vote sa.

Parske nou anvi siport sa bann zenn an menm tan nou pa anvi zis siport zot e apre nou war zot zis retourn koman en bann delenkan. Nou anvi konnen Lasanble serye si nou pe vot larzan nou pe siport zot fodre zot osi zot bezwen montre sipor pou pei.

Zot bezwen kapab montre poudir zot pe sipor zot lekor e zot konpran e zot pe aksepte led ki lakominote e pei pe depanse avek zot.

E ozordi parey mon ti fer referans, dan sa transformasyon ki pei i ladan, mwan mon ti a kontan vvar plizyer nou bann zonm sirtou, mon akoz pou zonm, annan plizyer nou bann zonm tou le lafen di mwan pe met laliny kot labank.

Akoz? Parske in travay, in prodwi pe al rekolte en saler tou le mwan ki mon war mazorite nou bann zomn pe met laliny zis pou li kapab resevwar sa tretman *methadone*.

Sa i a fer ki Mr Speaker i ava pe travay pou la kominate, pou lasosyete pou pei, pou li kapab asiste son zanfan avek son fanmir.

Dezyenmman pou li kapab fer kontribisyon dan Fon Sekirite Sosyal.

Trwazyenmman pou li kapab fer en fon, met en kontribisyon dan Fon Pansyon. Pour ki demen li osi parey tou lot Seselwa, i a kapab rezouir en keksoz letan i ava'n ariv son laz pou li pran son retret.

Lot pwen ki mon ti a kontan koz lo la Mr Speaker se kwa ki mon pe mazinen - bann propozisyon ki mon ti a swete i ava annan pou sa bann zenn. Toultan mon pou koz lo la se lokasyon kot bann tretman i ganny sonnen.

Sa toultan nou demande be Minister Lasante in eksplik nou avek mwens resours ki zot annan, avek facilite zot pe travay lo en stratezi lo en keksoz pou nou kapab donn sa bann zenn zot *full dinyite*.

Parey zot koman bann imen, pou zot kapab pran zot tretman byen kot en facilite

Minister Lasante, kot zot pa pe ganny mouye dan lapli pa dan soley, be zot a fer li bye apre tou lezot bann pasyan oubyen bann dimoun ki servi bann sant Minister Lasante an relasyon avek zot preskripsiyan. Lokasyon i premye pwen.

Dezyenm pwen Mr Speaker an relasyon avek sa, se kalite tretman ki nou don nou ban zenn. Eski *methadone* ozordi i sel tretman ki nou kapab donn bann zenn ki'n tonbe dan lavi an relasyon avek drog pou nou ed zot retournen.

Sa ki mon ti pe mazinen se ki akoz nou donn zot *methadone*, dan en lanmok koman likid pou zot servi, olye donn zot koman en pilil byen preskrir pou zot vin serse kot farmasi pou zot al avek dan lakour pou zot servi.

Be letan mon'n koz avek bann eksper, zot in eksplik mwan poudir dan lepase, sa dan lepase zot in seye, me sa ki arrive se ki parfwa bann zenn, pa neseserman zot tou, parfwa bann zenn letan ou pou fer li dan sa fason i annan ki zot ti fer, zot pran zot revann. Swa zot met pilil dan labous zot pa anvale ler zot sorti zot re vann avek en lot dimoun.

Menm letan ou donn li sa likid *methadone* i kit dan son labous i re al vid dan en boutey,

oubyen dan en lanmok i pa servi.

So sa i bann rezon pour ki akoz ozordi nou pe servi *methadone* e letan ou donn li son doz sa dimoun ki donn li son doz Mr Speaker, i menn koz avek li i demann li son nouvel pou li kapab zisteman anvale pou ki konnen poudir wi, finalman in pran sa doz.

So tousala i bann fason ki Minister atraver *APDAR* ti pe fer sa letan pou asire ki nou bann zenn zot pe swiv sa. Be alor i retourn lo mon premye pwen Mr Speaker.

Eski si vreman ou anvi sorti, ou anvi ed ou lekor parey nou, nou'n peye, asire ki ou ganny sa tretman pou ou kapab servi ou tretman byen oubyen en dimoun pe vey ou, menm nou'n donn ou pou naryen nou bezwen debout vey ou koz ek ou pou asire ki ou'n pran sa tretman. Tousala i bann ledikasyon dousman, dousman ki nou bezwen.

Alor mon dezyenm pwen an relasyon avek sa sisyete eski *methadone* i zis sel tretman ki nou annan pou le moman pou ed nou bann zenn sa mon ava kit avek Minister Lasante pou nou revwar ansanm dan pli bon fason ki mannyer nou kapab asiste bann zenn dan relasyon avek zot tretman.

Mon trwazyenm pwen e mon dernyen pwen lo la Mr Speaker ki, mon ti a kontan propoze se lanplwa. Letan mon get bann dimoun, bann zenn, bann zomn ek fanm ki vin pran zot *methadone*, pran zot tretman ou ge zot se bann dimoun ki gran, for, kapab konpran ki i pe fer.

Mon pa ganny en konpran akoz nou pa kapab ansanm, Minister Lasante ansanm avek Minister Lanplwa, organiz en sesyon avek zot zisteman parey Onorab Regina ti pe dir, pou nou kapab met zot dan lanplwa, swiv zot, gete kwa ki zot kapab.

E mon pe dir sa Mr Speaker, akoz mon asire parmi bann zenn ki nou annan ozordi ki pe swiv en tretman i annan zot ki deza annan zot kalifikasyon, zot ti deza dan en karyer, zot deza ti dan en profesyon, sot ti deza bann dimoun byen doue, byen kalifye dan lasosyete.

Mon krwar la i le moman letan avek transformasyon ki nou pe koz lo la, i enportan pou nou rekalibre zot, rode kwa ki zot kapab fer pou lasosyete, pour ki sa persepsyon ki Seselwa i annan lo zot poudir zot pa kontribye naryen dan lasosyete, me zis zot pran *methadone* apre zot lazournen pou zot i ava sorti.

Sa i ava ede ki letan nou'n kontribye atraver *tax payers money* pou donn zot sa tretman nou a ganny, nou ava vwar poudir zot osi zot in ganny plase dan bann landrwa pe far serten kontribisyon pou ki zot osi zot pe rann lasosyete sa ki lasosyete in donn zot.

Alor Mr Speaker mon pou donn Onorab Andy Labonte mon *full* sipor pou Gouvernman dan sa restriktirasyon vwar tou bann mwayen enportan, fasil pou nou kapab asiste nou ban zenn ki bezwen lasistans.

E an menm tan letan nou pe asiste bann zenn ki bezwen lasistans, nou anvi dir avek bann zenn ki nou pe asiste zot pou zot osi kapab asiste zot lekor. Sa i a fer li zot ava pe kontribye dan lekonomi pei, zot ava pe kontribye anver zot fanmir, pour ki nou ava trouv sa transformasyon Mr Speaker ki nou tou nou pe rode.

Alors avek sa detrwa mo mon ti a kontan siport Mosyon Onorab Andy e demande ki Minister Lasante atraver sa restriktirasyon i rod tou mwayen, tou fatalite posib, pou nou asiste bann zenn pou zot osi kapab asiste zot lekor e pou zot sorti lo sibstans pou zot vin bann sitwayen responsab ki pei pe rod ozordi san sa nouveau transformasyon.

Avek sa detrwa mo mon ti a kontan dir ou mersi Mr Speaker.

MR SPEAKER

Mersi Onorab Arissol. Mon a donn laparol Onorab Norbert Loizeau.

MR SPEAKER

Mersi Onorab Arissol mon a donn laparol Onorab Norbert Loizeau.

HON NORBERT LOIZEAU

Mersi Mr Speaker. Bonzour tou Manm e tou dimoun, a lekout. Mr Speaker vi ki mon sorti dan en distrik laval, alors i mon devwar mon krwar pou siport mon frer, Andy. Onorab Labonte dan sa demars, pou son Mosyon.

Akoz lo kote laval nou en bann distrik, ki nou vwar tou sa bann keksoz. Onorab Naidu, in fer resorti pli boner. Nou vwar kot nou pase partou, nou vwar sa bann dimoun ki nou pe koz lo la ozordi. Bann *drug addicts* ek bann, ki pe servi *methadone*.

Mr Speaker alors mwan. Mon plito annan enn de pti kestyon, pou mwan demande ki pa tro kler pou dimoun deor. E serten dimoun in apros mwan, in dir mwan demann sa bann kestyon.

Sirtou *APDAR* ti ganny kree, e ozordi i apel *DSAPTR*. Eski zot pe marse, koman sa Departman ki pe *deal* ek sibstans reabilitasyon ozordi? Sa en kestyion ki bokou dimoun pe demande. Akoz mon pe demann sa Mr Speaker?

Mwan mon menm mwan mon'n vwar e yer dan mon pe asize ek detrwa, dimoun ti annan en lanmes, anler lo *court Bel Air*.

Apre dan mon sorti mon'n koz, ek serten dimoun ki mon'n dir li pou annan sa. In demann mwan enn de kestyion, si sa pe marse. Mr Speaker ozordi, pa kapab annan dimoun, depi ler *APDAR* ti ouver. Mon krwar an 2017, mon ti dan Lasamble. I annan dimoun ki'n lo programm *methadone*, 4an apre. Plis ki 4an mon krwar 2017 ziskan la, zot ankor lo *methadone*. Se pou sa rezon ki bokou dimoun deor, pe demande. Eski i pe marse sa, ouswa si ou vini ou pran *methadone*, ou ale, *business as usual*?

Eski i annan *success stories*? Ki annan ki zot kapab akont nou. Eski, sa bann dimoun ler zot in pran, ki pe pran *methadone*, i annan en swivi lo zot? Zot in antre dan en travay? Mr Speaker non. I annan petet ki'n antre pa

bokou. Me mazorite, i deor, pe fer zot biznes parey labitid.

Kot parey Onorab Arissol in dir, pe pran. Mon pa poudir vole, mon dir pran. Akoz ler ou dir zot pe vole, zot dir non pa pe vole zot pe pran. Zot pe pran bannann, tou sa ki zot vwar.

La dan distrik Bel Air, Mr Speaker nou pe ganny difikilte avek sa bann dimoun. Le rezon ki Bel Air, i annan en ta pye mang. En landrwa kot i annan plis mang lo Mahé, Bel Air, Saint Louis, Foret Noire, Mont Fleuri.

E nou koman, apre zot pran zot *methadone*, zot *go back* dan distrik, zot fer zot *business as usual*, zot kas mang. Transpor i pase, *windscreen* i ganny kraze. Ou ale ou fer en depans, zot pe vin rod en lot *deal*. Pou zot apre lo apre midi, ler zot pou ganny zot *craving* pou sa drog, pou zot kapab annan en larzan, pou zot tourn lo gento.

E la en lot kestyion Mr Speaker, mon anvi demande. E ki sa dimoun in dir mwan demande. En dimoun en pe aze. Ki i annan apre *methadone*? Eski i annan en lot ki zot pou bezwen pran apre *methadone*? Akoz ou pa kapab lo *methadone*, 10an. Be savedir plito ou servi eroin, i zis konmsi en drog menm.

Ki annan pou *methadone*? E ler ou pran sa *methadone*, eski i annan *counselling* ki ganny fer ek zot?

Mr Speaker mon pa tro krwar. Akoz mon vwar zot pran *methadone* apre zot *end up*, zot *end up*, o bor laboutik. E la in vin en *trend*.

Nou pran *methadone*, zot al fer bann aktivite, zot ganny aksidan, i vin en lot fardo. Ou vwar zot ek en bekir o bor laboutik. Mwan mon rapel lontan ou fer aksidan Mr Speaker, mon'n deza devir lipye, deklok lipye. Mon'n byen, eski konmela ou kas ou lipye ou kas ou zenou, ou mor lo en bekir?

Mr Speaker tousala i annan, in vin en *trend*. Bann dimoun, zot la zot pran *methadone* apre zot o bor laboutik, pou rod en larzan. Pou zot kapab aste en bwar ler sa *craving* i vini la. Pou zot al rod en labyer 18poursan, bann ki napa bon le mwayen, kantmenm zot pou al bwar Mr Speaker.

Tousala i annan, e kestyon, e se sa ki mon pe demann kestyon. Si i annan bann sikse ki'n ganny fer atraver, sa lorganizasyon la ki nou pe koz lo la.

E Mr Speaker eski *methadone* en lot kestyon, i annan pou fer ek tou lezot drog?

Ozordi i annan dimoun ki pe al pran *methadone*, pa pran zis eroin. Zot pe servi *cocaine*. Esaki sa, eski i annan en letid pou fer ki lefe i fer lo sa bann dimoun? Sa en kestyon ki mon ganny demande.

E ozordi, Mr Speaker, depi ler *APDAR*. Avan *APDAR*, ti ganny formen, ti annan en letid, ant 2011. En *study* ki ti fer lo, lo size drog. Sa letid mon ti pe koz ek Miss Rosie, ti en letid ki ti ganny fer enternasyonalman. Me selman ti ganny fer isi Sesel, par *Drugs and Alcohol Council* mon krwar - si mon byen miss Rosie, ou a koriz mwan.

Ti annan plizyer rekomandasyon, Mr Speaker mon dir ou 2011, *APDAR* ti ganny formen 2017. Rekomandasyon i la. E ozordi, Mr Speaker. Bann dimoun ki pe responsab sa *DS* sepa kwa. *DSAPTR* la, zot ti la kot Minister Lasante, mon pa pe akiz personn.

Zot ti la zot, ler sa bann *study* pe fer. Esaki zot pe vwar sa bann rekomandasyon la - la vi ki Gouvernman in sanze. Petet ler Gouvernman pa ti ankor sanze, zis rekomandasyon ti ganny fer, zis

pou fer krwar en keksoz pe ganny fer, apre i reste la.

La Gouvernman in sanze, eski sa bann rekomandasyon pe ganny tire dan tirwar pour nou kapab pas lo la. Pou nou vvar ki solisyon Mr Speaker. Akoz ozordi, en keksoz zot bezwen konpran, nou pe koz dimoun *cold turkey*. I annan dimoun i ale *cold turkey*.

Ler zot *cold turkey*, zot *end up* sorti koman en *drug addicts* zot vin en *alcoholic*. Le rezon ki mon pe dir sa Mr Speaker mon'n refer sa pwen pli boner, akoz ler zot ganny sa *cravings*, *methadone* pa pe donnent aswar, zot bezwen en keksoz for pou zot al lo la.

Lanmenm ler zot bwar bann *dry cherry*, bann pti ponm, bann labyer 18poursan. Zis pour zot kapab *sustain* zot lekor ler zot ganny sa *craving*, pou sa drog. E nou'n koz lo bann Dokter, ners pe travay *Healthcare Agency*, ki pe travay avek sa Lazans.

Eski Mr Speaker pa'n ler pou nou, pour sa Lazans kapab annan son prop Dokter, spesyalize ? Mon'n tande lot fwa Prezidan in koz en pe, lo ners osi spesyalize, si zot pou kapab fer zot kour spesyalize dan en domenn.

Eski pa in ler pou nou kapab annan sa, Mr Speaker?

Akoz nou'n vvar dan letan *COVID*, ki ti annan serten seksyon, serten Departman dan Lopital ki ti ganny neglize. Me selman apre, ler *COVID* ti vini. Prezan ki zot ti trouve ki sa seksyon i vreman enportan, i vreman enportan pou nou.

E la ki enportan ki sa Departman la, i vin en Departman lo li menm. Solid ki annan son keksoz. E dernyen fwa Mr Speaker, ler Mr Herminie ti pe rod en sant pou 500ekek dimoun, 500 ekek adikt. Nou ti sa kote latab, nou pa ti tro, tro kontan.

Nou ti annan en rezon akoz nou pa ti tro, tro kontan Mr Speaker, akoz nou ti panse sa msye li i kontan anler laba, dirize kontan ganny sa gro Bidze, zwe, zwe ladan akoz zot ki ti o pouvwar sa letan. Be la nou, nou, nou'n pran Gouvernman nou eski i annan nesesite pou annan sa ozordi?

Mon krwar ti annan en koze ki ti pe ganny diskite, ki pou annan en sant ki pou fer *somewhere*, Montagne Posée, laba anler. Anler kot Bonne Espoir. Eski nou dan sa laliny pou al ladan ? Kot Mr Speaker, parey Onorab Arissol in dir, sa bann dimoun zot, zot annan problem.

E ler ou'n donn zot *methadone*, apre zot sorti zot

ale. Eski nou'n rezourd zot problemm? Eski ler nou pou annan sa sant, eski nou pou kapab anmas zot? Donn zot, zot *methadone*. Donn zot en pti *counselling*, diriz zot enn pti gin. *Mentor* zot, pou zot kapab antre dan lanplwa.

Mon'n tann koz lo zil. Eski nou anvoy dimoun malad lo zil Mr Speaker. Kot ler 7er diswar, malad in leve Mr Glenny Savy i bezwen pran avyon depans sepa konbyen larzan desann ek zot Mahé?

Lo zil nou bezwen dimoun ki for mantalman, dimoun ki kapab travay, nou pa pou kapab anvoy dimoun lo zil. E atraver sa sant petet, nou ava kapab anmas zot. Anmas zot, met zot dan en bon leta pour zot kapab pourswiv zot karyer dan lavi apre ki zot in tonbe parey Onorab Arissol in dir.

E la Mr Speaker, le pwen ki Onorab i fer i en pwen enportan. Nou bezwen konnen mannyer nou, nou pou ed nou lekor. E ler ou ed ou lekor, ou ganny led apre Mr Speaker. E la kot mon pou revin lo sa pwen, responsabilite parmi Lepep Seselwa.

Nou bezwen retourne koman en pep responsab, parey nou ti ete avan. Kot paran ti koz ek zanfan. Diriz zot zanfan, parey nou dan sa Lasanble nou

pe seye. San fwa Mr Speaker, si ou napa responsabilite nou pa vin en pep responsab, tou sa bann keksoz ki nou pe koz lo la, la Mr Speaker, i pou vin pli grav.

E responsabilite, i en keksoz ki enportan pou nou koman en pep, si nou anvi vvar Sesel bouz pli devan, fer.

E la Mr Speaker mon dernyen pwen, mon ti a kontan, petet pas en mesaz ek bann *dealers*. Konmsi in ler pou arete non? Mr Speaker, i annan dimoun ki'n blende la deor. Zot annan, be ki kantite zot le? Donn sans nou bann zenn refer, epanouir. Ozordi nou pe konplent, nou pe dir tro bokou etranze dan Sesel. Akoz Mr Speaker? Napa zonm, napa zenn.

Ozordi bann madanm pe ganny problemm pou ganny en msye Sesel. I en fe Mr Speaker, i en fe. Tou nou zenn i lo gento dan drog, i dan lalkol, i annan in fer zanfan, kit madanm ek zanfan dan lakaz zot, zot dan bor semen dan drog, ek lalkol.

E sanmenm sa ki kree tou sa bann kalite problemm sosyal. Kot ozordi ou vvar, i annan etranze pe antre. Nou bann madanm Seselwa i kontan bann etranze, nou'n vvar. Mon pa pou nonmen ki nasyonalite.

En pe zot i vini, e parfwa ler nou vwar bann problem koumsa, sa bann dimoun ki antre nou pa konnen. I annan en ta kalite lezot *deal* ki ganny entegre, ankor atraver sa bann dimoun ki antre ankor.

I kapab annan bann ki, bann *dealer* drog, ki pe vini pe antre. Mr Speaker, mon krwar mon pou terminen. Mon kontan Onorab, Onorab Labonte ki enn mon koleg akote mwan la Riviere Anglaise in vin ek sa Mosyon. akoz mon santi ki vreman, nou bezwen fer keksoz pou nou kapab redres en pe. Mersi Mr Speaker.

(APPLAUSE)

MR SPEAKER

Mersi Onorab. Laparol i prezan pou Onorab Wavel Woodcock.

HON WAVEL WOODCOCK

Mersi Mr Speaker. Mon pou ase bref, par lefe ki bokou bann keksoz ki mon ti anvi dir, bann Onorab ki'n koz avan mwan in fini tous lamazorite sa ki mon ti anvi adrese.

Mr Speaker sa Mosyon ki devan nou i enn ki vreman enportan. I malere ki i en size ki tous nou popilasyon vreman profon ki ozordi, bann Manm lo lot kote latab pa la, pou adres

en size ase enportan. Ki annan lenplikasyon ase serye, lo nou sisyete.

Mr Speaker, Onorab Bistoquet ler in koze, in mansyonn sif ozordi, kantite Seselwa ozordi ki malerezman in *addict* avek bann drog. Sirtou bann drog, bann *hard drugs*, ki anviron 6000 dimoun ki apepre 10poursan nou *workforce* Sesel.

Ki ase sagrinan Mr Speaker, me selman nou bezwen olye toulstan vin avek en lespri, en latitud pou zis, kritike, pou zi *look down* lo sa bann - lo sirtou sa bann zenn. Nou bezwen parey Mosyon pe demande, rod bann fason, bann stratezi e Polisi ki mannyer nou kapab ed nou bann frer ek ser pou sorti, anba sa bann lenfliyans, anba sa fleo adiksyon bann drog, bann drog, sirtou bann *hard drugs*. Mr Speaker ozordi, sa fleo drog in anzandre dan nou pei.

E sirtou bann *hard drugs* parey mon'n dir eroin, ozordi ki, i malere zis en laliny, zis en laliny, ouswa zis en pike ou kapab vin *addict* avek. E malerezman i en drog ki ozordi, in annan, i pe met en presyon lo lasante piblik.

Par lefe ki nou Gouvernman i vwar li, pe fer fas avek bokou difikilte, pour ede,

travay, ankadre sa bann zenn, pou sirtou sey ed zot pou zot sorti anba sa bann, anba sa adiksyon.

Mr Speaker, me fodre note, ler nou pou tras en pe listwar drog Sesel, nou pou al bokou lannen pli avan, 20an pase, 15an pase. Nou ti napa sa problemm parey ozordi pei pe fer fas avek, ki ozordi nou Gouvernman, in erite nou pe sey *deal* avek.

Ti annan en letan Mr Speaker kot, mon mazin letan kot nou ti - E sa nou, tanzantan, nou'n mansyonnen bann letan kot ti annan bann *rasta men* dan montanny. Kot ti servi zot pti *marijuana* e zot pa ti afekte okenn dimoun, zot pa ti debourye, zot ti travay.

Me ti malere pandan en letan dan nou listwar, kot ti annan le fame *taskforce*, zot ti trenn sa bann *rasta men* dan bwa. Bat zot, koup zot seve, zot pa ti pe afekte personn, zot pa ti pe *disturb* personn, zot ti pe viv zot lavi normal.

Apre ki nou'n vvar se en lot kalite form drog ki'n ganny entrodwir dan nou pei anba Gouvernman avan, se sa se bann drog parey, eroin. E se eroin Mr Speaker, ki'n detri afekte nou pep, ki ozordi nou vvar nou pe fer fas ek sa bann keksoz.

Akoz *obviously* bann dimoun ki *addict* avek sa bann *hard drugs* ler zot pa gannyen. Zot fer toudsort bann kalite, aksyon menm enn ler kriminel, pou zot kapab ganny sa bann drog. Parey kas lakaz, vole ouswa fer lezot aksyon delenkan.

Dan bann lakour kot en manman i bezwen, met i annan ki bezwen met lasenn ek kadnan lo zot *fridge*. Akoz zot zanfan i pran tou keksoz i al vann. E sa bann keksoz i pe arive dan nou pei, Mr Speaker se akoz eroin i mons. Eroin i en bebet, pa zis eroin bann lezot *hard drugs*.

E ozordi i realite nou pei, ki nou Gouvernman pe sey fer tou mye, pour nou *deal* avek sa. I mal Mr Speaker ki, eroin sirtou Mr Speaker in pran lavi plizyer nou bann dimoun, ki nou konnen. Nou bann pros menm. Mwan mon'n perdi en kouzin avek sa drog. E plizyer zanmi ki mon'n grandi avek, bann ki mon'n konnen, ki mon'n vvar. Bokou menm bokou pli zenn ki mwan Mr Speaker. E nou konnen danze, ki drog i anmennen, pou lasante nou pep.

Mr Speaker, mon pou tous en pti pe sak i Naddy Zialor, Onorab Zialor eskiz mwan in mansyonnen, pli boner. Ki mon

santi, poudir sa i merit enn nou priyorite. Ou konnen i annan en saying ki dir *prevention is better than cure*. E Onorab Zialor in koz enn pti pe lo *supply and demand*.

Ki mwan mon krwar en fason pou nou *deal* ek sa sityasyon, Mr Speaker, se parey mon frer in dir se ki nou bezwen koup sours. Nou bezwen ferm sa tiyo. E erezman ki nou Gouvernman depi ler in vin o pouvwar, in met bokou lanfaz sirtou atraver, en partenarya ant Lapolis avek *Coast Guard* pou entersepte bann dav e dan sa dernyen lespas 17mwan. Nou'n vreman-

En gran travay in ganny fer pou entersepte bokou bann bato, dan nou lanmer. E bokou bann fame *drug dealers*, in ganny arete par Lotorite. Lotorite Lapolis, bann Lotorite lokal.

E sa i ankourazan ki i annan en lager ki nou Gouvernman ki nou pei. E Lepep Seselwa pe deklare kont sa bann dimoun ki pe anmenn sa bann drog, ki pe afekte nou zenn, nou kominate, Sesel. E i annan Onorab Loizeau in koz lo Mahé, ki mannyer sa pe afekte zot.

Me i pa zis Mahé, i Praslin, La Digue, Zil Pros. Nou pe ganny bokou afekte ek sa. E

nou, nou santi poudir in arriv sa letan pou nou, rod en fason. Non selman, pou nou *tackle*, e anmas sa bann dimoun ki pe fer sa bann keksoz, me osi pou ros en fason pou nou ed nou bann frer.

Onorab Arissol osi in tous en keksoz vreman enportan ki mon santi poudir - avan ler, nou travay avek sa bann zenn. I enportan osi ki nou pran kont zot entegrite. Nou bezwen, zot en imen parey nou, zot annan santiman, e nou bezwen rod en fason pou nou ed zot. E in koz enn pti pe lo, lo landrwa kot nou pe donn bann *addicts* zot *methadone*.

Annefe, ler mon pe koz lo la i fer mon mazin Praslin. En landrwa kot zot pe donn bann zenn ki lo sa bann ki anba lenfliyans. Bann *addicts*, zot pe donn *methadone* o bor en mini bazar. Bis i vini i park ladan, ler kot loto pe monte, desann.

Konmsi mon santi poudir i pa normal, kot dimoun pe desann bomaten, pe al travay. I vvar nou bann ek ser la o bor semen la, o bor en mini bazar kot zot pe pran zot *methadone*. Mwan mon santi poudir sa i pa byen.

Nou bezwen pran kont zot, entegrite, nou bezwen pran kont zot santiman osi. E mon santi poudir zot bezwen rod en

fason enn pti pe pli meyer pou ankadre zot pou donn zot, *methadone*. An menm tan, *obviously* ki annan lezot programm osi pou ed zot. E evantyelman sorti lo zot adiksyon.

E ed depandans lo *methadone* osi ki zot kapab, repran zot lavi.

Mr Speaker, Onorab Bistoquet osi, in koz bokou lo nesesite pou annan bann profesyonnel pou travay avek sa bann zenn.

E mwan mon santi ki ozordi, dan nou pei. E sa petet i lo kote osi *ANHRD* i annan sa responsabilite. Akoz *in fact* ler mon'n fer mon resers, mon'n vwar poudir ozordi nou napa ase *psychologist*, Sesel, *psychiatrist*, e bann dimoun pou travay avek bann zenn anba sa bann diferan adiksyon drog.

E i annan bann domenn ki mwan mon santi ki petet Minister Lasante, i merit annan en konversasyon avek *ANHRD*, pou diskit lo bann diferan kad, bann *training*, pou nou bann zenn, profesyonnel.

Ozordi nou napa ase, *addiction counsellors* pou travay. Bann *qualified counsellors*, i mank en pe sa bann profesyonnel, pou travay avek sa bann zenn.

Parey mon'n dir nou napa ase *psychiatrist*, nou napa ase *psychologist*, nou napa ase bann dimoun ki'n *train* dan sa bann domenn.

Annefe bokou ka, kot ou vwar en dimoun i tonm dan sa bann lenfliyans, se i kapab lakoz lasante mantal, ouswa lasante mantal, i annan en rol pou zwe. I enn bann rezon. Enn bann rezon osi, ki bokou fwa i annan dimoun ki tonm anba plizyer sa bann lenfliyans. Problem sosyal osi i zwe en rol.

I en nesesite osi pou nou *train* plis bann *social workers*. E osi en *area* ki mon santi no u bezwen konsantre lo la. Akoz i malere ki ozordi. Bokou bann *drug addicts* zot pe target nou bann zenn dan lekol.

E i malere i annan bann zenn anba laz, menm zanfan ki'n malerezman in komans servi sa bann diferan drog. Menm bann *hard drugs*. I annan bann konsern ennler ki arive, kot manrmay dan laklas pa kapab konsantre. Zot pe dormi dan laklas, zot pe, zot ganny bann *withdrawal* sentonm. E i sagrinan.

E mwan mon santi poudir i osi at *school level*, i annan en nesesite, pou annan bann *trained Peer counsellors*, pour travay avek bann zenn dan lekol. Primer ouswa segonder. E

pou ankouraz sa bann zenn e ed zot.

Ed sa bann zenn fer fas avek bann defi, lavi e zot devlop bann *coping mechanism*, donn zot lespwar. E zot pou pran bann bon desizyon, pou gid sa bann zenn, donn zot bagaz pou cope avek *peer pressure*.

Akoz o nivo lekol osi i annan bokou bann- *In fact*, ozordi i pe arive Mr Speaker kot bann *drug addicts*, zot anvoy bann zenn i annan bann zenn ki ganny *recruit*. I annan manrmay lekol ki ganny *recruit*, ki ganny anvoy dan lekol, dan lakour lekol pou ankouraz bann zenn pou komans servi drog.

Apre *obviously*, ler sa bann manrmay i vin depandan apre zot, zot *end up* devan laport sa bann *drug addicts*. E sa bann *drug addicts* zot benefisyé, zot pe fer larzan, zot pa pe *care about* lasante sa bann zenn. Ki lavi sa bann zenn pe ganny brize, pe ganny detrir.

Alor mon santi poudir sa nesesite pou nou, met en pe lanfaz lo edik, lo *train*, plis bann profesyonnel pou *deal* avek sa bann manrmay, ki zot konnen ki zot pe fer.

Zot annan sa bagaz, akoz sa mon. Parey mon'n dir en landrwa ki mon santi, nou bezwen get ladan. *ANHRD* i bezwen antre ladan, Minister

Lasante, i bezwen annan en koze avek *ANHRD*, pou nou.

In fact, ozordi parey mon'n dir nou napa, mon kapab kont lo mon ledwa kantite *psychologist* ki annan Sesel. E mwan mon santi poudir, sa i en *area* ki nou bezwen get ladan.

Avek sa de mo Mr Speaker, mon pou siport sa Mosyon ki Onorab Labonte in met devan dan Lasanble ozordi. Avek sa de mo, mon dir ou mersi Mr Speaker.

MR SPEAKER

Mersi Onorab. Mon a donn laparol Onorab Bernard Georges.

HON BERNARD GEORGES

Mersi Mr Speaker. Mr Speaker mon ti pe al, komanse an dizan mon fatige koz lo sa Mosyon. E mon fatige tann, koz lo Mosyon drog. *APDAR* eksetera. Me annefe, mon pa pou komans koumsa, akoz si nou ankor pe koz lo sa size ozordi; si nou ankor pe sey dekortik, sa fenomenn dan nou pei; si *LDS* in trouve dan son manifesto, ki i bezwen donn sa size drog en plas enportan pou sa ladministrasyon *deal* avek, se akoz sa size i en size preokipan.

E mon felisit donk Onorab, Labonte ek tou dimoun ki koz lo sa bann Mosyon. Akoz,

se kekfwa, se kekfwa keksoz pli enportan dan nou pei, ki nou bezwen fer fas avek. Malerezman, malerezman nou'n abitye avek sa zafer drog.

Nou'n abitye tann Lapolis tanzantan dir, tel ou tel dimoun in ganny arete, tel ou tel dimoun in ganny pas Ankour, in ganny *remand, bail* pa'n ganny aksepte, tel ou tel dimoun in al prizon pou tan lannen.

Oubyen *Coast Guard*, in entersepte en bato sezi tan kilo eroin. Oubyen, ki tel ou tel dimoun in mor. Mwan menm mwan mon'n anter detrwa dan mon distrik, e mon mazin spesyalman "Titin". Me i annan ankor lezot. Nou'n vin dan en serten sans *immune* avek sa problemm.

Akoz i toultour nou, e nou vwar li toulezour. Tanzantan i annan en, pti lalimyer lespwar dan distrik. Onorab Labonte li menm. In organiz en sesyon pou ekliersi en *black spot*. Nou'n vwar lotrozour lo televizyon, en lot *black spot* anba tanmaren dan en distrik Onorab Roucou.

E mwan menm mwan dan mon distrik, i annan plizyer *black spot*. Malerezman de ladan, se de *bus shelter*. Nou annan nou trwa *bus shelter* dan mon distrik, dan vilaz

Mamelles, vilaz Les Mamelles. Eskiz mwan.

E de ladan in fini ganny *conquer* par bann dimoun i fer sa pratik. Dan en fason ki bann, bann msye, bann madanm ki'n bennyen, sanze pou zot al travay. Pa kapab servi sa bann *bus shelter*. Akoz, sa bann manrmay, sa bann zanfan, sa bann zenn, sa bann kliyan in deside ki i pli apropriye pou zot vin fer zot komers dan sa bann landrwa.

Mr Speaker, sa ladministrasyon i en ladministrasyon ki pou rod rezulta. Se pa en ladministrasyon ki tourn an ron otour problemm. Me mon regrete pou mwan dir ki, lo sa enn size, i paret mwan ki nou pa ankor trouv en lankadreman;- nou pa ankor trouv en vizyon.

En sel loptik ki pei annan antye i kapab *focus* lo la, esey trouv en solisyon, oubyen anmenn en soulazman. Akoz mon krwar ki nou tou nou bezwen aksepte, ki solisyon nou pa pou trouve.

Napa en pei dan lemonn antye ki'n trouv en solisyon pou son fenomenn drog. E nou ekskiz mwan pou dir, nou pa pou sa pei ki pou prouve ki nou, nou kapab fer. Nou bezwen aksepte, tel parey lalkol ek

sigaret, ek lezot adiksyon avek nou, nou pou toultan annan en problemm drog, e sel keksoz ki nou krwar, ki nou bezwen fer. Se *tackle* li, met li anba kontrol.

Redwir li otan ki posib. Me nou pa pou zanmen kapab elimin li. Akoz imen i imen, e imen pou toultan anvi *chase the rainbow*.

Alor Mr Speaker, avek sa lentrodiksyon, e konesan ki nou isi dan sa Lasamble lo kote Gouvernman, nou bezwen ed Gouvernman pou trouv solisyon, annou regarde kisia sa bann solisyon, ki nou kapab anmennen.

Bokou in ganny mansyonnen, loter Mosyon li menm li in propoz detrwa. Onorab Bistoquet in propoz ankor. E plizyer Manm in azout serten, serten propozisyon.

An 2017, ler mon ti anmenn premye Mosyon dan sa Lasamble, lo sa size drog, ki evantyelman, ti donn nesans avek APDAR, mon ti dir klerman, e mon ankor annan sa lopinyon, ki sa problemm drog, i en problemm ki nou bezwen *tackle* dan en fason global. Dan en fason *holistic*. E pou en serten moman, APDAR ti sa solisyon.

E mon krwar ki, nou bezwen annan pou kapab *tackle* sa problemm. En *One-stop shop*

dan en serten sans. E dan sa loptik ferm APDAR. E transfer li avek Minister Lasante, i kapab ganny vwar koman en pa regresyon. Akoz lespri sete ki i annan en lenstitisyon, ki kapab anglob tou bann problemm. E trouv tou bann solisyon.

Dan en sel landrwa, olye eparpiy li. E ki sakenn sa bann, morso, sa bann laspe i ava travay *in silos*, dan en fason ki pa pou annan bann sinerzi. E sa problemm pa pou kapab ganny *tackle*.

Mon krwar, e mon *stand to be corrected*, mon ti a kontan ki mon ganny korize, e ki mon ganny dir, ki mon lenpresyon i fo. Me mon krwar ki tan ki nou kas sa problemm an plizyer morso, nou pa pou kapab arive, trouv sa solisyon ki nou anvi trouve.

Akoz Mr Speaker, e mon pou retourne lo en fenomenn ki mon'n aprann, mwan osi atraver sa letan ki mon'n pase dan APDAR. I annan trwa laspe pou *tackle* problemm drog.

Enn se *supply reduction*. Anpes drog antre dan pei. *Deal* avek bann trafiker, sa set en *problem law and order*, se en problemm Lapolis.

Dezyenm se *demand reduction*. Anpes dimoun anvi antre dan drog.

E annou pa blye, i annan en gran diferans ant fim en pti staf tanzantan ek pran *heroin*. Akoz ler ou annan 19an, e ou pran *heroin*, ler ou pou mor a laz 85an, si ou arriv 85an, ou pou *still* en adikt eroin. A mwens ki ou, ou'n kapab ou menm sorti lo la par lafors ou personnalite.

E *demand reduction*, donk pou anpes dimoun antre dan sa fleo. Fodre i vin en, ledikasyon, en prosesis ledikasyon lo plizyer zenerasyon.

Pour ki bann zenn ki pe antre dan lekol, malgre ki zot pe viv dan bann sosyete, kot zot vwar sa keksoz toultour zot, e zot in vin *immune* parey mon'n mansyonnen taler, i ava kapab avek en lyer leswarz, deside parey Onorab Roucou in fer nou rapel bomaten.

Pour pa antre dan sa fenomenn, pour *resist* sa fenomenn.

E trwazyenm vole, se sa vole *APDAR*, sa vole ki'n al prezan dan Minister Lasante. *Harm reduction*, anpes dimoun ki'n anpes bann kliyan, fer plis ditor avek zot lekor.

Avek sereng, ki zot partaze, avek bann keksoz ki zot al fer, vol pou zot, pa zis mang avek koko. E la mon bezwen dir ki, mwan mon enn sa bann dimoun ki annan en

morsso later, avek pye mang ek pye koko lo la, ki ler mon bezwen en mang, oubyen en koko, mon bezwen desann dan bazar Roche Caiman pou al aste enn.

Akoz sa ki, sa ki pli vit ki mwan i vin rekolte mon fri. Epi i vin revann mwan pli tar, ler mon bezwen. Tousala se bann keksoz ki vin dan sa vole *harm reduction* ki nou bezwen, ki nou bezwen *tackle*.

Si nou fer zis enn, Mr Speaker nou pa pou arive rezourd sa problem. Si nou fer de le trwa, nou pa pou arive rezourd sa problem. Fodre nou fer tou le trwa. E sa enn trwazyenm ki nou pe *focus* lo la ozordi.

Akoz se sa enn trwazyenm ki ti anba lanmen *APDAR*, e ki prezan in bouz anba Minister Lasante. Sa ki mwan mon pa ti anvi vwar, e sa ki mon konnen ki, tou bann, tou bann ki'n koz avan mwan in dir, nou pa kapab antre dan en sityasyon *same old, same old*.

Fer menm zafer ki'n ganny fer lannen passe, e ki'n ganny fer lannen avan. E ekspekte ki en zour problem pou rezourd, e nou sertennman, pa devret pe zis fer gran, gran deba. Tel parey nou fer ozordi, e apre dir be mon'n fer mon bout.

At least mon'n al koze dan Lasanble. Mon'n fer tande mon lavwa. Akoz sa osi pa pou anmenn okenn solisyon. Sa ki nou bezwen, se en pti parey Onorab Bistoquet in fer nou mazinen ozordi, se rod bann lide avek bann lezot pei, pa, pa adopte sa ki lezot in fer an krwayan ki pou marse isi. Akoz i pa pou.

Me *at least*, gete kisia ki zot, zot in fer. E esey anmenn li isi. E adapte li avek nou prop sirkonstans. Mr Speaker nou'n koz lo *Portugal, Portugal* li in deside fer en keksoz radikal. Legaliz eroin, e in marse. In marse, etandonnen ki ou nepli bezwen, al aste eroin prezan in konpletman legal.

Dimoun i al dan farmasi, zot aste zot *shot* eroin bomaten, zot pran li zot al travay. Tou keksoz i normal. Alor sa problemm in redwir bokou dan sa pei.

Mon pa tro sir, ki si nou adopte sa isi, koman en mezir, ki pou marse. Mon a dir akoz. I tre kler, ki tan ki nou pa *deal* avek bann trafiker isi. Ki koman ou pou tir eroin dan zot lanmen, e poudir zot.

Akoz ou pou'n legaliz eroin, si, si zanmen nou ti pou al dan sa direksyon. Sel keksoz ki zot, zot ti pou fer, zot ti pou vin en lot drog. Zot ti pou al lo,

kokain, oubyen zot ti pou al lo *meth and amphetamine*.

Bann lezot drog, ki napa en *methadone* pou zot. E problemm ti pou vin pir ankor. Alor nou bezwen, pas bokou letan, e met bokou lenerzi dan trouv bann solisyon. E solisyon mon krwar, ki sa Gouvernman i annan dan son lespri, e mon ti a kontan ki, mon annan rezon dan sa ki mon pe dir. Se ki atraver, sa *low methadone program*, ki evantelman nou ava kapab annan, kapasite e nou ava kapab annan sifizaman larzan, pou nou met dan sa programm. Pou fer sir ki nou fer li vin en programm swivi.

Tou dimoun ki'n koz avan mwan, in dir ki nou bezwen plis psikolog, nou bezwen plis landrwa, plis *Wellness Centre*, plis fasilité *detox* pour akonpanny bann kliyan. E fer zot sorti dan sa fenomenn ki zot ete.

E se la mon krwar, kot nou devret annan sa bann, nouvo linisyativ. Fer bann kliyan vin dimoun responsab, donn zot en gou, pou zot viv zot lavi.

Ankadre zot, dan en fason ki zot pa pou zis ale pran zot doz *methadone* bomaten. Epi retourn lo gento e kontinyen egzakteman parey zot ti ete avan. Se sa serk ki nou bezwen

kase. E se sa serk ki nou pe ekspekte, ki Minister Lasante avek son resours limite, i a kapab arive fer.

E mon pa konnen si zot pou kapab. E donk Mr Speaker mon ti a kontan olye repet tou sa bann keksoz ki'n ganny dir, depi bomaten. Olye sey ammenn lide, met lide la devan nou ankor. Akoz i annan ankor en kantite lezot lide, ki nou pa ankor mazin lo la.

Sa ki mwan mon ti ava swete, ki sorti atraver sa Mosyon bomaten, se en novo souf i ganny donnен.

E ki Minister Lasante, ki pe *apply* sa trwazyenm vole *harm reduction*. I kapab dan en letan ase bref, donn avek sa Lasanble, en apersi lo ki mannyer zot, zot in travay, ki diferans ki zot, zot in fer depi ki *APDAR* in fermen. E ki mannyer zot vvar sa sityasyon pe devlope. Mon krwar sa, set en keksoz ki nou bezwen annan.

Olye zis koze, epi sa Mosyon, i mor lanmenm. Sa ki mon ti ava demande bomaten, se ki loter Mosyon i fer en swivi avek Minister Lasante. E i demann avek Minister Lasante a en moman apropriye. Vin devan sa Lasanble, e vin fer deklarasyon lo travay ki sa Departman, in kapab fer.

Dan en fason ki, nou a kapab prezan demann zot sa bann kestyon. Met sa bann sizesyon devan zot. E gete ki mannyer ansanm, koman en pei - akoz sa problem, i tous nou tou.

Nou kapab trouv parey mon'n dir en lamelyorasyon dan problem, *rather than* esey rod en solisyon ki ankor tro lwen.

Alor Mr Speaker, mon'n pa ti anvi al pli lwen ki sa. Mon konnen ki loter Mosyon pou bezwen, *wrap-up*. Mon ava aret la. E mon ava dir avek Onorab Labonte, ou demann avek Onorab Labonte, ler i reponn *take up* sa sizesyon, pour li demann Minister Lasante, vin donn nou en kontrandi lo travay ki zot in fer. E zot travay ki zot pou, propoze pou fer dan sa detrwa lannen ki pe vini. Mersi Mr Speaker.

MR SPEAKER

Mersi Onorab Georges. Mon a prezan apel Onorab Labonte, pou fer *summing-up* lo deba.

HON ANDY LABONTE

Mersi Mr Speaker. Mr Speaker i annan bokou ki'n ganny dir bomaten. E mon lalis i vreman long. Me *LGB* mon krwar in senplifye sa konklizyon. Me avan tou, mon anvi dir mersi

mon koleg Onorab Rosie Bistoquet pou segonn mon Mosyon, e tou bann travayer, DSATPR ki pe fer sa travay vreman enpresyonnen dan sa divizyon.

Mon pou osi dir en gran mersi tou bann lezot koleg Onorab ki'n entervenir e annan zot kontribisyon pou sa Mosyon, ki pe demann Gouvernman pou revwar son Polisi e stratezi lo i reabilitasyon e tretman programm pou lit kont labi sibstans.

Mr Speaker apre ki mon'n ekout tou bann Manm entervenir lo tou lede kote, lo nou kote annefe, akoz lot kote i pa la - e ki i merit annan en revi lo Polisi e stratezi ki sa divizyon in merit pran, dan lafason ki reabilitasyon e tretman lo programm pou lit kont labi sibstans.

E sa i pou ede anmenn sa transformasyon dan lafason ki pep Seselwa i swete vwar sa servis ki DSAPTR pou donn son bann kliyan dan lavenir. Parey vizyon DSAPTR i dir, mon quote, “*to work towards achieving a drug safe and prosperous Seychelles.*”

E son misyon i dir, mon quote, “*have a drug safe country by implanting a coordinating evidence-based prevention and intervention strategy through a*

dynamic and responsive multisectoral approach.”

Mr Speaker DSAPTR pou annan 5 fonksyon unit. *Treatment Unit, Harm Reduction Unit, After Care Unit, Psychosocial Unit, Prevention and Educational Unit.*

Avek en Bidze total pou consolidate programm expenditure 2022, estimen pou en valer R57bilyon 86mil. E bann pwen swivan ki'n ganny fer resorti dan deba i konm swivan, e mon pou al an bref en pe, akoz i pou enportan pou mon pas lo la.

Premyerman mon pou dir ki mwan, mon ti a swete vwar. E mon premye pwen, mwan personnelman mon fortman krwar ki parey *methadone*, ki osi en drog kontrole, parey in ganny sorti par plizer bann Manm dan diskisyon ki kanabis ou *marijuana*, parey nou dir li i osi kapab ganny servi lo baz medikal, pou ede elimin bann hard *drugs* dan pei.

Mon osi krwar ki bann kliyan ki antre lo programm tretman, i merit ganny ankouraze pou antre dan en lanplwa formel e ganny swiv pou fer sir ki zot pa vin bann nwizans.

Sa pou fer lakominote aksepte zot e i pou ede ki kontribisyon pansyon, sekirite

sosyal e tax ki Gouvernman i ranmase pou ogmante. E osi redwir lakantite etranze ki vin travay Sesel e plis deviz etranzer pou reste dan nou lekonomi.

Mr Speaker mon osi krwar ki meditasyon pou la spirityalite i osi merit form parti sa programm reabilitasyon. Mon ti ava swete ki sa bann kliyan i ganny doz apropriye e bann ler rezonnab, e landrwa apropriye. Sa pou ed e ki apre ki zot in pran medikaman, zot pa pou bezwen al swa lo gento ou abiz lezot sibstans.

Me plito tenir zot sa lazournen travay. Bann ler ki permet zot arriv travay a ler e landrwa apropriye ki pou anpes viktimizasyon, oubyen pou *label* sa bann viktim.

Senkyenmman, vin prodiktiv. se sa ki nou anvi zot tou zot vini. Sansibiliz pep Seselwa, ki *DSAPTR* pa donn zis *methadone*. I enportan ki pep Seselwa i konnen sa. I pa selman *methadone* ki zot donnen, me i annan bann lezot medikaman ki osi ganny donnen. Akoz i souvandfwa krwar poudir zis *methadone* ki ganny donnen.

Mr Speaker prezan mon pou al en pe an bref lo bann lezot entervenan ki zot in dir;

Premyerman Onorab Bistoquet koman en profesyonnel dan Lasante, infer bann rekomandasyon swivan. A kourt term, imedya.

Fer en odit dan sa divizyon pou konn lakonplisman ek defi ki a donn lenformasyon neseser, pou amelyor zesyon e fasilit meyer desizyon pou tou parti konsernan, avek responsabilite pou superviz e itiliz aksyon korektiv.

E sa i konklizyon ki *LGB* in sorti avek;

Revwar striktir sa divizyon konm swivan, etablir *Unit Addictologie* e tretman ou *methadone maintenance*. E a kourt term revwar lobzekatif e osi prosedir tretman kominoter, rezyonal, mobiliz pou *methadone*.

Etablir servis Prevansyon, Reabilitasyon anba Divizyon pou Labi Sibstans, Prevansyon Tretman e Reabilitasyon. Akoz resours imen kalifye i limite. E a kour term imedya, programm sansibilizasyon kominoter, *outreach program*.

A lonterm revwar Polisi e stratezi nasyonal divizyon pou *National Drug Control Masterplan* ki byento pe al arriv son lafen. E sa i pou ed nou pou nou kapab pran en desizyon kolektiv lo la. I annan bokou ankor, ki Onorab

Bistoquet in fer propozisyon.
Me lalis i vreman long.

Mon pou pas lo dezyenm Onorab, Onorab Esparon, ki'n osi fer son kontribisyon. In fer konpran ki *cold turkey* i osi merit vin en opsyon. E sa ki'n pli enportan ladan, se ki in fer konpran poudir, ki nou anvi, se ki sa bann dimoun zot vin responsab e zot kontribye dan lasosyete.

Onorab Roucou in osi fer son kontribisyon, in merit osi kapab ganny ofer pa previ, me dan en lankadreman. E in fer konpran poudir lafanmir osi i merit zwe en rol ladan.

E i osi in fer sorti ki i krwar i poudir i merit annan en diskisyon lo itilizasyon kanabis dan nou pei.

Onorab Zialor in fer konpran tre byen. Poudir ki dan nou Manifesto, paz 27, nou'n deza adres lo sipor *methadone* e reabilitasyon e tretman dan nou pei. E Onorab Zialor in osi dir ki i enportan ki nou annan *mentorship*. E in osi fer resorti ki nou merit annan en konversasyon lo itilizasyon kanabis.

Onorab Naidu; Onorab Naidu in fer klerman pou ki nou mank bann profesyonnel e nou merit annan en dyalog avek *ANHRD*, pou nou kapab ganny ban travayer pli kalifye. E in osi

fer konpran poudir ler nou pe reabilit serten sa bann dimoun ki itiliz drog, nou kapab itiliz serten nou bann zil. Me selman petet li in koz lo *threshold*.

Me i plizoumwen bann ki in sorti lo tretman pou plis ki 3 mwan. E zot in ganny vwar poudir zot pa pe servi sibstans. E *Chief Whip* Onorab Arissol, in fer konpran ki mon totalman dakor ankor, ki i enportan ki sa bann kliyan ki lo sa bann programm, zot osi vin responsab e zot pran zot responsabilite.

E koumsa pei e zot fanmir i a kapab respekte zot e zot kapab osi kontribye lo en nivo nasyonal dan Fon Pansyon e Sekirite Sosyal. E rod bann lezot tretman osi. Akoz pa zis tretman *methadone*. E edik nou zenn.

Minister Lasante ek Lanplwa, i merit travay ansanm pou met sa bann adikt, sa bann dimoun ki itiliz drog dan en lanplwa formel.

E Onorab Loizeau in demann plizyer kestyon. Par egzanp enn son bann kestyon in demande ki *APDAR* ti ganny kree, e la konmela in sanz son non, si i pe marse. E se pou se la rezon ozordi ki i annan sa diskisyon.

E dan konklizyon, parey *LGB* in dir, se ki i enportan ki nou pou apel sa Lazans pou zot

donn nou en kontrandi lo sa ki zot in fer e kote zot pe mazin pou ale.

I annan bokou lezot plizyer kestyon, ki'n ganny demande. Eski i annan *counselling?* E in demann konsernan en sant reabilitasyon. E ler mon pe get sa programm ki ti deza la avan, ti annan sa donasyon R59milyon 570mil 932.5 ki ti pou en donasyon par en Pei Zanmi.

Sa i ti sipoze pou finans konstriksyon sa batiman ki nou pe demande. E Onorab Woodcock in osi fer sorti ki lontan nou bann dimoun ti itiliz kanabis, e ti napa vreman sa kantite eroin dan nou pei.

E in fer sorti osi ki i annan en *lack of professyonnal* dan sa bann *fields* apropriye. E i enportan ki *ANHRD* i travay ansanm avek Minister, pou kapab ankouraz plis pou pran sa bann karyer pou kapab ed nou pei.

E finalman, *LGB* Onorab Bernard Georges in fer plizyer rekomandasyon. E i kler ki nou konklizyon final, se ki lo *harm reduction*, nou pe demande ki *DSAPTR* i vin devan, devan Lasanble Nasyonal, pou li kapab rann nou en kontrandi lo son travay ki in fer pandan sa

bann dernyen lannen. E ki i pe mazin pou fer dan lefitir.

Avek sa 2 mo, mon pou demann sipor Lasanble, pou vot an faver sa Mosyon e demann Legzekitiv pou pran kont sa ki nou pe demande e ki nou pe fer sorti dan nou Mosyon.

Mon pou bezwen dir ki le 29 Septanm 2021, zis bann Manm *LDS* ki ti vot an faver pou *repeal* sa *Bill APDAR*. E 6 Manm *US* ti vot kont. E ozordi le 30 Mars 2022, 6 mwan apre, nou war zot, zot in *walk out* e ki montre nou poudir zot pa serye, e zot pa pare pou donn sipor sa group dimoun. Pou nou ed zot pou sorti kot zot ete.

Me plito zot pe pran keksoz lo en lot nivo. E mon ti a kontan lans en lapel avek piblik la deor, pou war vreman kwa ki nou anvi fer pou zot. Akoz nou avi ed zot pou retir zot dan sa sityasyon.

Mr Speaker, mon pou demann tou Manm Lasanble ki la preznan ki lo nou kote latab, ki mon asire ki mon pou ganny zot sipor, pou siport sa Mosyon. Sa Mosyon ki ti lir koumsa ;

Prenon kont restriktirasyon kot *APDAR* in preznan vin *DSAPTR*, en divizyon anba Minister Lasante, sa Lasanble i demann Gouvernman pou revwar son Polisi e stratezi lo reabilitasyon

e tretman programm pou lit kont labi sibstans. E ki Bondye Papa tou pwisan i sov nou pei kont sa bann fleo e negativite. Mersi Mr Speaker.

(APPLAUSE)

MR SPEAKER

Mersi Onorab Labonte. Mon ava apel bann Manm pou vot lo sa Mosyon. Bann ki an faver lev lanmen silvoupled? Mersi. Lo kestyion ki lir,

Prenon kont restriktirasyon kot *APDAR* in prezan vin *DSAPTR*, en divizyon anba Minister Lasante, sa Lasanble i demann Gouvernman pou revwar son Polisi e stratezi lo reabilitasyon e tretman programm pou lit kont labi sibstans, 22 Manm in vot pour, 0 kont e 0 abstansyon.

Alor sa Mosyon in aprouve par Lasanble. Mersi bann manm pou zot partisipasyon dan sa Mosyon, dan sa deba. Mon konnen i annan komite ki pe zwenn dan letan *lunch time*. E i annan osi *Assembly Business Committee* ki pou zwenn 1er kar. So mon fer zot rapel sa. Alor nou ava prolongz retour Lasanble par en demi erdtan, e nou a retourn 2er edmi. Nou ava pran *pause* la.

(BREAK)

MR SPEAKER

Bonn apre midi tou manm, bann *staff* e ankor nou piblik. Bon nou'n arriv lo nou dezyenm Mosyon pou lazournen. E sa i Mosyon Onorab Gervais Henrie. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, Mosyon ki mon pe prezante devan Lasanble ozordi i lir koumsa;

Sa Lasanble i demann lendistri Kiltirel Lokal pou fer moutya vin vivan koman parti nou divertisman, e pou mentenir son stati koman patrimwann mondial.

Alor sa i Mosyon e mon ti ava kontan ki i ganny segonde avan ki mon pas lo mon prezantasyon.

MR SPEAKER

Nou apel pou *secondment*, Onorab William wi.

HON WAVEN WILLIAM

Mr Speaker mon annan gran plezir pou segonn sa Mosyon. Mersi.

MR SPEAKER

Mersi. Mon a pas laparol *back Onorab Henrie* pou adres ou Mosyon.

HON GERVAIS HENRIE

Mersi Mr Speaker. Ankor enn fwa bonn apre midi tou dimoun. Sirtou bann dimoun Mont Buxton.

I annan en pe letan ki nou napa en moutya dan distrik, dan bann landrwa parey anba la kot Devin, dan lakour Tisyon.

Menm anler kot Villa Karoutsou, tanzantan zot ti fer. Be i annan en pe letan ki moutya pa rezonnen dan kanton, nou konpran *COVID* in vini e nou pa'n kapab regroupe.

Me selman dan moman ki nou pa'n kapab regroupe, i annan en keksoz enteresan ki'n arive avek moutya, ki'n ganny rekonnet koman en patrimwann mondyal. Sa ti le 15 Desanm lannen pase.

Me kestyon ki vini, se ki depi le 15 Desanm lannen pase, apre ki'n arive? Dan *COVID*, pa ti dwatet en leskiz pou nou pa fer nanryen o tour moutya.

Akoz malgre nou pa ti kapab regroupe, tir mas e sante, e moutya koman ou pou sante, sa kalite fason ki ou sant li, ou pou kras dan figir en dimoun si i pre avek ou. Ki pa ti pou bon pou zafer *COVID*. Me selman nou ti kapab fer serten

keksoz. E alor sa Mosyon ozordi se pou nou zisteman eksplor sa size.

Bomaten nou'n koz lo eroin, *methadone*, i byen fer resorti ki dan moutya napa eroin, napa *methadone*. Akoz depi lepok ki in la, nou bann zanset pa ti fer sa bann zafer.

Donk mon war sa 2 keksoz i ale ansanm, alor pou nou kapab repran nou souf koman en Nasyon ki alors en zour ti napa sa bann move vis dan nou sosyete.

Mr Speaker premyerman bann dimoun ki pe ekout mwan, e bann Manm Onorab, a remarke ki dan sa Mosyon, napa okenn par ki'n mansyonn mo Gouvernman.

Atraver Lasanble, mon pe demande ki Lendistri Kiltirel ;- mon repete Lendistri Kiltirel pou azir e fer moutya vin vivan.

Dabor lekel ki form parti Lendistri Kiltirel? Sa i byensir bann *stakeholders*. I bann dimoun ki travay ouswa ganny zot lavi atraver Lendistri Kiltirel ouswa Biznes Lar, Kiltir e osi Leritaz. Lekel zot?

I annan bann artis, ouswa bann pratikan Lar zot menm. Ouswa i annan bann kliyan, ouswa konsonmater sa bann prodwi, bann akademik.

Bann dimoun ki fer resers dan sa bann size. Bann

donater, bann *sponsors*, Managers ki zer sa bann pratikan lar, i annan bann reprezantan Sosyete Sivil ki oule ede promouvwar lar, kiltir, leritaz, bann keksoz koumsa.

I menm annan bann pratikan medya ki kouver sa bann size koman parti zot travay, san oubliy travayer servis piblik e nou menm nou politisyen, ki souvandfwa senpatiz ouswa nou spesyaliz dan promosyon lar, kiltir e leritaz.

Alor pou fer moutya vin vivan, nou bezwen dabor dir avek nou lekor poudir nou bezwen enspir popilasyon Seselwa, pou apresye e valoriz sa zanr lanmizik.

Nou bezwen apresye e promouvwar moutya koman sa lafyerte nasyonal ki i dwatet ete. En keksoz inik ki nou Sesel e Seselwa nou annan e ki enpakte, e ki son lenpak i kapab annan lo nou lendistri kiltirel si nou fer li byen, tourizm e lekonomi pei an zeneral.

Avan mon al pli lwen, i paditou mon lentansyon pou mwan fer krwar ki moutya i kapab annan menm lenpak ki lanmizik *reggae* in annan lo lemonn pandan sa dernyen 65an.

Akoz i en legzanp ki i ava fasil pou nou dir, sey fer konparezon. Enn son bann dezavantaz i se ki *reggae* i sant an Angle, ki i en langaz pli koni dan lemonn.

Kan nou pou fer moutya an Angle pou bann dimoun an deor Sesel konpran? Donk vwala zis son bann limitasyon.

Me solman son *uniqueness* avek Sesel i dwatet deza kree ase leksitasyon pou dimoun vin dan sa pti kwen lemonn dan milye Losean Endyen, e pou dekouver sa bote ki apel moutya.

Lo lot kote, tandis ki li *reggae* in promouvwar lanmour, viv an armoni avek lanatir, bann konsep parey lape, pardon, rekonsilyasyon.

Moutya li orizinalman i lanmizik ki'n partaz la soufrans nou bann gran pye. Zot bann lapenn, asosye avek sor lesklavaz ki dabor sa bann lesklav in anmenn isi atraver ladans e lanmizik.

Mr Speaker, dapre listwar moutya i orizinalman sorti dan en rezyon *Mozambique* ki apel *Nampula*. Sorti en popilasyon 15 an 1779 pou arriv 6638 lesklav isi Sesel an 1781.

Sa bann lesklav ti ganny derasinen zot lanmen vid. Selman avek memwar, ranpli avek sagren. Alor sel fason pou

eksprim zot soufrans ti zis atraver lanmizik e sanson ki form parti sa ki zot ete, zot nanm.

Akoz zot soufrans e travay dir ki swa dan plantasyon koko, plantasyon zepis, ouswa lo lanmer, zot ti bezwen defoule kan in ariv aswar. E moutya alor, in permet zot pou eksprim sa ki zot ti pe santi.

E sa zanr lanmizik li menm in pas dan sa moman difisil dan nou listwar. Kot ziska 1813 bann lesklav ti bezwen perform li an sekre.

Pou bann ki'n tann nonm fame *Code Noir*, son Lartik12 ki ti definir- Kod Nwar li i ti en kod ki ti definir kondisyon bann lesklav dan lanpir kolonyal Franse.

Ti anpes bann lesklav regroupe, e par konsekans detann zot lekor. En lord anba Kod Penal pibliye le 9 Out 1935 ti *ban* moutya. Bann dimoun pa ti annan drwa bat tanbour e soufle lansiv en serten zistans otour lavil Victoria, Anse Royale, Baie Sainte Anne Praslin, Grand Anse Praslin e La Passe La Digue.

Sa *ban* ti akoz legliz ti war ladans moutya koman en ladans tro vilger e i ti deranz trankilate bann gran blan.

Ti pran 83an pou retir sa regilasyon, atraver S.I 57 2018

pibliye le 3 Septanm 2018 ki ti *repeal "the drums regulations 1935."*

La mon oule salye zefor tou dimoun dan Lotorite Mr Speaker, ki'n milite enn fwa ki sa, koman en zes senbolik. Sa S.I ti ganny pase, ti annan en group dimoun ki'n vin ansanm.

E milite atraver zefor kordonen pou asire ki moutya i ganny rekonnet par UNESCO koman en leritaz kiltirel mondyal.

Soumisyon Sesel
orizinalman ti fer an 2019 e in pran 3 fwa, akoz ti mank, mank lenformasyon avan ki nou'n reisi konvenk UNESCO ki vreman moutya i merit sa stati e *recognition*.

Alor felisitasyon bann dimoun ki'n fer sa parkour. E nou apresye sa zefor pou zot donn Sesel en lot keksoz apar son sit UNESCO Vallée de Mai avek Aldabra.

La aprezan ki nou'n akonplir sa sikse, ki pou arive? *What's next konmsi Angle?* E alor se dan sa lespri ki sa Mosyon i oule regarde ozordi.

Depi le 15 Desanm 2021, ki'n arive? Kwa ki'n ganny fer pou promouvwar moutya dan Sesel? Mon anvi ki nou eksplor sa ozordi e regard lavenir.

Pou fer moutya vin vivan, mon sizer sa bann lide swivan.

E parey mon'n dir, nou pe demann Lendistri Kiltirel Lokal, bann akter, bann *stakeholders*, se zot pou pran sa bann linisyativ.

E Gouvernman koman fasilitater, li i ava ed zot kot i kapab atraver bann resours ki a son dispozisyon. I enportan ki bann akter dan Lendistri Lokal i vin ansanm.

Par egzanp pou lans en festival moutya anyel. Bokou nou i a rapel ki detrwa lannen pase, dan Dimans 1 fwa par mwan apepre, ti annan sa ki zot ti apel Dimans Moutya.

I ti en gran levensmann ki ti fer letour - mwan mon enn sa dimoun ki'n swiv sa levensmann en pe partou, akoz mon ti kontan al tir portre sa levensmann.

Beau Vallon in fer, Anse Royale in fer, dan diferan kwen dan Sesel. E i anmenn en kantite dimoun ansanm, kominate ekspatriye ki pe reste isi, bann etranze ki tann tou sa bann komosyon.

E zis pou vwar sa Seselwa vin ansanm, pe selebre, anmiz dan en moman, ti vreman gou pou regard sa. E pou kwa pa alor, sa i kapab ganny retournen. In arete akoz problem finansman.

I ti pe kout zot apepre R150mil pou organiz enn sa bann levensmann.

E vwala, boner mon'n mansyonnen, poudir enn bann akter ki nou pe koz lo la, se bann dimoun ki *sponsor*, bann gran lakonpannyen par egzanp ki prodwir bann prodwir alkolize, Takamaka Bay, Seybrew, Levasseur.

This is where zot kapab met zot larzan, e ede promouwwar zot bann prodwir, tout an dir avek bann konsonmater, "drink responsible."

Me selman i en fason ki zot ti kapab ede. En festival i non selman benefisye, bann partisipan; bann partisipan setadir mizisyen ou santer, me i ankouraz bann diferan lendistri ki kapab benefisye e grosi otour en festival.

Drayver taxi, lotel, guest house, laboutik, bann media houses ki fer bann prodiksyon. Sa ki prodwi lalkol, delo, sa ki kwi manze, fer snack. Lalis i long.

So en festival ki kapab ganny par egzanp en kwen lo kalandriye, pou bann dimoun ki pe voyaze. Plizy whole gran festival mizikal otour lemonn i annan, e dimoun i *look forward* pou ale.

Zot kwensid li avek vizit sa pei, me an menm ta partisip e *witness* sa levennman. Donk Sesel i kapab, nou annan leksperyans Festival Kreol, alor mon pa krwar poudir nou napa lekspertiz e konesans pou nou kapab fer en levennman parey.

Si nou dir ki moutya i annan en popilarite atraver diferan group laz. Koman tanbour i komans bate, irespektiv ki laz ou ete dan Sesel ouswa stati ekonomik, i rezonnen avek ou.

Alor pou fer sa kalite lanmizik, i anmenn en deboursman pou bann artis, pou zot vin popiler, pou zot kapab vann zot prodwi e i en keksoz ki zot merit envestir ladan.

Sa zanr lanmizik i dwatet ankouraz plis kreativite parmi nou bann kominote artis. Petet le moman in arive pou bann levennman *Music Award* ki fer lokalman, pou kree en kategori spesifik pou rekompans bann santer e konpoziter moutya.

Ozordi lo radyo mon tann *Paradise FM Music Award*. Nou tann *Cable Tune Music Award*. En moman ti osi annan *Airtel Music Award*, ki en pe letan mon pa tann nonm li.

So sa 3 levennman zot menm, zot kapab kree en kategori pou ankouraz nou

bann artis, pou kree lanmizik moutya e pou zot ganny rekonnet. Me nesesite i la pou valoriz sa lar lanmizik, alor zot bezwen regard pros Mr Speaker.

Mon osi an faver lentrodiksyon moutya dan programm laprantisaz lekol, sirtou lekol Leta. Parski ki mannyer, annou demann nou lekor.

Nou pou ankouraz bann ki pli zenn pou kontan e apresye a zanr lanmizik. Si depi ptipti nou pa pe ekspos zot avek, fer zot familyariz zot avek.

Alor Mr Speaker, mon pe propoze ki atraver lesyon lanmizik lekol, zanfan i aprann dans moutya, sant moutya e zwe moutya.

Dan menm lespri konservater lanmizik, ladans ek teat ki dan Lenstiti Kiltir Leritaz ek Lar, i dwatet, par egzanp i ansenny laklas bat tanbour moutya. I annan son teknik sa.

Nou'n tann Patrick Victor dan tanzantan, dan bann programm televizyon, eksplike. Donk si nou anvi kree en group mizisyen ki talante dan sa kalite zanr lanmizik, nou bezwen ekspos zot avek *training* neseser.

Dan menm loptik, Konsey Nasyonal pou Lar ek Artizanal i dwatet pe organiz bann latelye

pou fabrik tanbour moutya. Pa nenport ki, ki kapab fer sa.

Ou bezwen ankor bann teknik spesyalize e bann dimoun i bezwen ganny led avek bann dimoun ki byen konnen.

Si lide pou rekonnert bann santer ki kree moutya, dan en kategori dan en *Music Award* i pa al ase lwen, *what about* en konpetisyon sanson ki target moutya?

Alors en zour ti annan konpetisyon sanson pou Festival Kreol ki ti promouvwar kiltir Kreol atraver sanson, ti fer tou le-z-an, e apre in agrandi pou vin tou le de 2an.

Ki zot ti menm envit bann artis enternasyonal pou partisipe, sa osi i en *area* kot nou kapab eksplor pou fer moutya, sirtou dan rezyon Losean Endyen. Parski *La Reunion* avek *Maurice*, zot annan osi en zanr moutya.

Parski sa bann lesklav ti al dan tou sa bann zil. E alor i pou enteresan pou nou eksplor e sirtou pou nou kapab agrandi *spectrum* sa zanr lanmizik. Parske ozordi sega i zwe dan tou sa bann zil. Moutya osi tou alor i kapab annan.

E nou'n tann osi sa zafer sege, mouge, *reggae* i ava ede osi pou anmenn nou bann zil ansanm, e pou fer bann lesanz

kiltirel antre bann frer, kouzen ou kouzin dan Losean Endyen.

Mr Speaker pou ede fer moutya vin vivan koman parti nou divertisman, e mentenir son stati koman en patrimwann mondyal, i enportan ki dan lekritir, ouswa dan bann prodiksyon medya, nou konserv sa ki'n deza ganny fer.

E nou konnen poudir i annan en kantite moutya ki'n ganny sante. Me ozordi si par egzanp mon ti pou zis ganny akse avek en piblikasyon ki annan parol sa bann sanson, i tre difisil pou gannyen.

Sa i en lot landrwa kot kelken i bezwen mazinen parey mon pe dir, i bann akter dan Lendistri Kiltirel. Pa en zafer Gouvernman sa.

Kelken i bezwen ale rode, fer resers, pibliye. Ki mannyer Leta pou antre, akoz konmela i annan bann *Grant, Culture Fund, Heritage Fund* ou *apply* konman en pou en proze, pou a ganny larzan peye par *tax payers money*. E ou a kapab met sa bann keksoz.

Sa i osi ver re anrezistre bann moutya ki nou bann granmoun ti sante, parski i annan en moman zot pou'n ale, e si nou pa sezi sa bann sanson, son parol, son lanmizik, dan bann keksoz ki nou kapab rikorde, nou pou perdi li.

Donk i annan en nesesite depi yer, avek lavites pou nou fer sa. Prezerv sa ki nou pe apel en patrimwann mondyal.

Donk Mr Speaker, pou mwan mon war li i osi senp pou nou fer sa bann zafer. Solman nou bezwen volonte, volonte, bann *stakeholders*. E mon'n anmenn sa Mosyon ozordi akoz mon anvi zot konnen poudir nou koman bann Manm Lasanble Nasyonal, nou anvi vwar sa bann keksoz pe ganny fer.

Akoz nou pe koz *cultural tourism*, nou pe koz nou anvi vwar touris vini, pa reste zis dan lotel, me vin dan nou kominote. Ki *tourism earning* i kapab dekoul dan kominote.

Alors si nou promouvwar en laspe nou kiltir, i ava ede pou bouz keksoz. Koman aktivite kiltirel, aktivite tourizm e retonbe ekonomik pei an zeneral ava benefisyé.

Mon pa pou kapab terminen san salye tou sa bann Seselwa, ki'n ede prezerv moutya koman enn nou bann leritaz kiltirel.

Dan mon prezantasyon boner mon'n koz lo ki mannyer moutya ti ganny *ban*.

Akoz orizinalman moutya sa ki zot ti apel moutya otantik, sa bann lesklav ti bezwen al dan bann bwa lwen pou zot sante,

danse ler sa *ban* in antre, apre in annan en keksoz ki'n arive, in ganny afekte, enpakte negativman, kot in perdi serten son laspe otan sitye.

E apre in vin sa ki zot apel moutya modern. E *from* moutya modern, i annan kantite dimoun ki i ava tro bokou pou nonm non.

Me selman lefet ki mon *MNA* Mont Buxton, Mr Speaker, mon pa pou kapab mank, rat sa sans pou nonm non Mr Norville Ernesta.

Avek group 'Fek Arive', ki vreman letan zot ti fer en *CD* avek sanson 'Madeleine', sa ti kas lakle menm sennla. Konmsi in anmenn, in reviv sa zanr lanmizik.

Malgre in annan santer, par egzanp Jean Marc Volcy, 'Bakeyaya' ti pres avek moutya, en pe tre modern ki ti ganny pri aletranze avek.

Nou ansyen koleg Jany De Letourdie osi in fer en pe sa zanr lanmizik. Joseph Sinon, Serge Camille, bann ki mon kapab mazinen, ki'n annan moutya ki'n popiler atraver radyo.

E mon aprann poudir i annan bann zenn osi, parey Sandra, Elijah, Clive Camille, ki pe pran en pe sa zanr lanmizik.

Resaman lo televizyon mon'n war en *video* Ras Ricky,

son komansman ek son finisyon i annan en bout moutya e i pe danse.

Me zis mazinen demen bomaten en group artis popiler ozordi ki zenn, mon kapab nonm detrwa non, par egzanp Ras Ricky, *Auspicious*, Mersener, sa ki sante a ek Clive Camille, sa ki sant avek Relation Band, Travis, Julia, nou fek war li dan video la pe regroup bann dimoun lo Praslin.

Sa bann dimoun i popiler, *imagine* demen bomaten sa group zenn i deside dir *ok* nou pou fer en album, en seleksyon moutya sante par sa bann zenn popiler, ki mannyer zot kapab fer pei en gran dibyen, par entrodwir moutya avek popilasyon zenn ki ankor pe monte, e ki pa ti ankor ganny ekspoze avek sa lanmizik.

Imagine zot ogmant bann *stakeholder*, bann akter dan sa lendistri, ki gran servis zot kapab rann zot pei.

Donk konsider sa seryezman. E sa i bann lide Mr Speaker ki mon ti oule met ater e ki mon ti ava envit mon bann koleg *MNA* pou zot osi rakomod li, fer li pou menm parey moutya, nou azout bann bout anmezir ki nou pe ale, keksoz i sofe.

E ki alor pei an zeneral i ava benefisyé. Akoz son lenportans se pou elev nou kiltir, devlop en prodwir tourizm.

Me lenportans se larzan, i pou annan en retonbe ekonomik, ki a lafen defen, tou dimoun i kapab benefisyé. Mersi bokou Mr Speaker.

(APPLAUSE)

MR SPEAKER

Mersi Onorab Henrie. Onorab William ou pou pran laparol la? Yes Onorab. *Carry on.*

HON WAVEN WILLIAM

Mersi Mr Speaker. Mr Speaker mon'n segonn Mosyon e mon pou dir 2 pti mo. Premyerman mon a dir ki mon siport tou sa bann largiman e bann pwennvi ki loter Mosyon in avans devan.

In vreman enteresan pou ekout li prezant sa bann pwen. Mr Speaker mon pou komanse par remersye tou sa bann artis, mon pa pou nonm non.

Tou bann dimoun ki depi des années zot pe lager pou kapab fer moutya ganny rekonnet. E zot dezir in ganny akonpli. I en travay ki nou salye zot zefor lo la.

Nou pa ti pe ekspekte. Konmdir Seselwa, kan e keler,

me selman in arive. La Mr Speaker mon konmans antre dan moutya la, kan e keler.

E Mr Speaker mon pou osi, letan mon pe koz lo sa Mosyon, fer sorti en pwen kot i konsern lerozyon kiltirel ki pe arive dan lemonn.

E atraver sa Mosyon e sa ki sa Mosyon pe demande, mon krwar si Sesel nou kapab reviv moutya, dan en fason ki pou donn valer azoute nou prodwir touristik e dan lendistri, mon krwar i pou en gran *plus* pou nou.

Mr Speaker, me mon ti a kontan osi refer avek en fraz ki dan Manifesto, ki ou Mr Speaker konman Prezidan Parti ou ti fer sorti dan ou vizyon. Kot ou ti dir ki letan en keksoz i pou ou, ou pran ka avek, ou protez li.

E ou fer li vin pli meyer posib letan sa keksoz i pou ou. E mon krwar si tou Seselwa ozordi ki pran konsyan sa size ki nou pe koz lo la, sirtou bann artis, i enportan ki nou revaloriz nou moutya. E fer bann viziter ki vin vizit nou pei osi apresye.

Mr Speaker mon osi konpran ki menm si nou pe demann Lendistri Kiltirel pou fer zefor, me mon santi poudir en zefor konpreansiv, e la mon dakor avek loter Mosyon, ki depi lekol, sa size i bezwen

ganny aborde. Akoz ozordi si ou al lekol ouswa ou pe ekout bann zanfan, zot ofe avek bann sanson ki'n sorti, ou tann zot pe sante.

E alor si sa i ganny mete a zot dispozisyon, e zot kapab aprann e devlop ladan, mon krwar ki nou ava al lo bon semen lo kote prezerv sa laspe moutya.

Mr Speaker mon vwar osi ki Departman Lazenes i bezwen zwe en rol. Mon vwar osi ki Gouvernman Lokal osi i devret zwe en rol koman fasilitater.

Mr Speaker mon dakor osi ki i bezwen annan bann konkour moutya. E sa dan li menm li i ava pe ogmant vizibilite.

E mon konnen poudir la pou le moman, avek sityasyon *COVID* nou pa kapab fer tro bokou keksoz. Me parey loter Mosyon in dir, sa pa devret anpes nou pou nou pou sa size pli devan.

Mr Speaker ler ou regard sa size moutya, mon ti a kontan ki letan nou pe koz *gender*, mon ti a kontan ki nou ankouraz tou lede parti.

Akoz si ou pe pran zis en kote, ou pa pe pran lot kote, i pa donn sa kouler, sa gou letan sa sanson moutya pe ganny sante. Akoz ou kapab, i pa vedir

poudir bann zom pa kapab fer li byen.

Me selman ler bann madanm pe reponn, bann osi pe sante, i donn li sa kouler Kreol. E mon santi poudir nou bezwen fer sir ki i annan sa *gender parity* letan nou pe promot moutya.

Mr Speaker mon pa anvi repet, fer bann repetisyon. Me parey mon dir, se ki mon pou siport sa Mosyon. E mon santi poudir le moman in arive.

Akoz Sesel koman en pti pei ki an konpetisyon avek bann lezot pei, sirtou dan Lendistri Tourizm, e letan mon'n ekout, mon pou dir la, leokri ki Minis *Tourism* pe fer vizavi valoriz nou prodwir touristik.

So mon santi poudir sa, sa enn size i ava osi pe donn valer sa prodwir touristik. Mr Speaker me selman, letan nou fini diskit sa Mosyon, parey bomaten, ki mon pou dakor avek Onorab Georges, nou'n fini diskit lo sa Mosyon.

E nou'n ganny dir poudir Mosyon i annan en dokiman ki ganny anvoye kot Egzekitiv. Me i pou enportan ki si vreman Lasanble i anvi vwar epanouisman sa diskisyon ki nou'n fer lo sa size, ki mannyer Lasanble nou kapab devlop

serten mekanizm pou nou kapab fer swivi.

Akoz mon leksperyans lepase avek konmela, nou koz lo bokou keksoz, Lasanble i fer son bout, me selman mon santi poudir i annan en lot bout, ki petet nou, mon pa pou dir nou pe neglize, akoz nou annan bokou travay pou fer.

Me sa swivi, sa swivi pou angaz bann *stakeholders* enportan pou zot vreman delivre. I annan en mekanizm nou kapab swivre e mezire poudir be wi, vwala ki bor nou'n komanse, wi moutya in ganny rekonnet koman en patrimwann mondyal.

Be epi kwa, ki nou fer avek? Eski i pa devret annan bann swivi, pou nou kapab fer sir ki tou parti prenon pe vreman zwe sa rol enportan, pou fer sir ki nou *attend* sa lobzektif.

So mwan mon ti ava propoze ki letan nou fini debat lo sa Mosyon, letan sa rapor i ganny anvoye, ki,

Enn, nou kapab annan bann rankont avek bann diferan parti prenon.

E la mon pe mazin Mer Lavil, mon pe mazin Departman Tourizm pou fer sir avek bann artis byensir. Pou vwar ki fason Mr Speaker nou kapab pou

demann ki sa Mosyon pe met devan nou.

Mr Speaker mon pou dir ou mersi, e ankor enn fwa mon pou donn mon sipor sa Mosyon.

MR SPEAKER

Mersi Onorab. Mon pa'n disteng lord ki Manm in lev lanmen. Alor mon pou prosed dapre lord ki mon'n etablir. Mon apel Onorab Porice.

HON DOYACE PORICE

Mersi Mr Speaker. Bonn apre midi tou mon bann koleg MNAs e osi en bonn apre midi pou tou dimoun.

Mr Speaker Mosyon anmennen par Onorab Henrie i en Mosyon ki vreman valab. Kot nou santi kot moutya i en aktivite kiltirel in anmenn bokou fanmir, zanmi e lepep Seselwa ansanm.

Atraver sa transformasyon ki nou Gouvernman pe anmennen, i pou ede osi lo nou aktivite kiltirel lontan ki ti pe perdi dan nou pei. Erezman nou'n arive remet li lo son lipye e vin pli vivan.

Ler nou koz moutya nou pe koz en aktivite kiltirel ki byen lontan in la, menm avan lezot aktivite kiltirel ki nou pe vwar ozordi. I en kiltirel ki nou pe vwar ozordi. I en kiltir nou bann zanset kot zot ti byen

aktiv ladan. E ti form par zot aktivite sosyalize dan zot letan.

Mr Speaker moutya i en kiltir ti vreman enteresan, kot menm san sanson ti ganny konpoze sirplas. Kot zot pe bat zot tanbour.

Nou zanset pa ti bezwen pran letan pou konpoze. Menm pa ti bezwen al dan en studio pou rikorde parey nou pe vwar ozordi.

E menm pa ti bezwen fer dan en lasal kot lezot aktivite i fer. Sa letan ti ganny fer kot zot vwazen antre zot zabitan dan lakanpanny kot nou dir dan nou sou-distrik. Zot ti fer laranzman antre zot zabitan konman en pti rankont tou le mwan.

Mr Speaker parey lo nou zil Praslin, i annan nou zenn ki'n vreman prezerv sa morso kiltir, kot i konsern moutya. E la i fer mwan mazin mon zanmi Jerry ek son group Mangliye, e Ralph ek son group Latanyen, ki nou'n vwar zot dan plizyer aktivite pe animen.

E bokou Pralinwa Pralinwaz in vreman apresye zot. Pa neseserman i parey lontan. Me zot in gard sa morso kiltir vivan pou pa perdi net. Me Jerry avek Ralph, i dir ki zot vreman kontan zot kiltir tradisyonnell.

E bokou lotel avan sa ti siport zot pou zwe pou bann touris. Me Minis Speaker, zot dir ki zot pa pe ganny kriye par sa bann lotel - bann tel lotel. Vi ki sa Mosyon pe dir lendistri kiltir lokal pou fer moutya vin vivan konman parti nou divertisman, e pou mentenir son statik konman patrimwann mondyal, alor mon pou rekonmande ki nou lendistri touris i bezwen get sa morso kiltir ki nou pe koz nou moutya i reganny rekonnnet dan bann lotel, sirtou lo Praslin.

Nou bann *management* lotel i bezwen santi ki kiltir Seselwa i vreman enportan pour touris dan nou pei. E mon pou sipliy avek sa ki responsab, pou organiz aktivite kiltirel dan zot landrwa touristik pou remet moutya dan zot programm, kot zot konn tre byen ki zot pa pou regrete.

Mr Speaker avek sa Mosyon, i pou ede ki moutya i ava vin pli vivan e osi annan plis group ki ava vin an plas. Moutya pou osi anmenn zabitan dan sou-distrik ansanm e vvar lavi familyal parey lontan ki nou ava kapab tir sa bann lanmertim ki annan dan nou vwazinaz ozordi. Menm si i pou pran letan, me nou a seye.

Nou konnen ki nou kiltir moutya i ganny apresye par lorganizasyon enternasyonal. Alor annou met li premye konman en aktivite kiltirel pli enportan dan nou pei.

Mr Speaker sel aktivite kiltirel ki pou fer en diferans dan lavi nou bann zenn ozordi. Akoz mon dir sa? Set akoz moutya pou anmenn nou zenn dan en fason viv, zis parey nou zanset ti ete lontan.

Par fer bokou resers avek zot, zot paran, zot ava vvar ki fason zot ti viv oparavan. Fodre nou anmenn moutya dan en fason pou sanz nou lavi dan vwazinaz, kot nou dir sou-distrik e anmenn sa larmoni respe pou kanmarad dan nou pep ankor, kot nou vreman pe perdi.

Mr Speaker atraver moutya lavi nou bann zanset lontan vin vreman gou e enteresan. Kantmenm parfwa zot in annan en pti bagar, zot ti efes li par konpozisyon en pti sanson moutya dan zot pti aktivite vwazinaz.

E sa i ti fer zot oubliy sa ki'n pase. E return zanmi ankor pou kontiny sa lavi ansanm.

Mon santi ki sa i manke dan nou lavi vwazinaz. Bokou nou bann aktivite kiltirel lontan in perdi dan nou pei. E sa ki pe

fer nou zenn ozordi pa konn nanryen ki'n pase lontan.

Petet la Mr Speaker nou a demann nou bann dimoun aze ouswa bann ki eksper, ki konn byen sa bann zistwar moutya, pou vin devan e asiste nou bann zenn e zanfan dan tou distrik. Par organiz bann pti sesyon kiltirel sirtou nou moutya pou aprann bat son tanbour, aprann danse e osi pou konpoz sanson.

Avek sa de mo mon pou siport sa Mosyon akoz mwan konman en Manm Proporsyonnel, mon pare pou ede atraver annan sa bann tel aktivite dan distrik sirtou moutya. Mersi.

(APPLAUSE)

MR SPEAKER

Mersi, mersi Onorab. Nou ava pas laparol avek Onorab Labrosse.

HON RICHARD LABROSSE

Ok mersi Mr Speaker pou donn mwan laparol pou mon dekok en kou tanbour moutya. Dabor avan mon konmanse mon a dir bonn apre midi ou menm Mr Speaker, e en bonn apre midi tou mon bann koleg isi, e ou dan lakour ki pe ekout nou.

Sa Lasanble i demann lendistri kiltirel lokal, pou fer moutya vin vivan, konman parti nou divertisman e pou mentenir son stati konman en patrimwann mondyal.

Mr Speaker Mosyon devan nou pe anvoy nou al revwar en pe nou parkour kiltirel ;- andotmo reget fason ki nou mentenir nou bann aki kiltirel.

Le 15 Desanm 2021 i reste en zour istorik pou domenn kiltir Sesel. Apre ki UNESCO ti enkli moutya lo son lalis kiltirel entanzib, sa dan li menm i en travay tre byen re-konekte, ki montre fri travay bann ki lalit pou ki sa ladans i ganny prezerve e rekonnnet.

Dapre resers ki nou'n fer, moutya i en ladans ki ti ganny entrodwir Sesel par bann lesklav dapre *website the creole melting pot.com* - lesklav ti ariv Sesel boner 1770 e i ti konpri diferan dimoun, ki sorti dan kat kwen *L'Afrique*.

Ler sa bann dimoun ti arrive, zot ti napa nanryen parey nou dir. Zot ti vin de lanmen anpandan. Fason pou eksprim zot lekor a sa letan sete atraver bann sanson. Pou met bann lanbyans ek sa bann sanson, zot ti servi bann lobze pou fabrik tanbour.

Materyo konman letan ki zot ti servi konman pou fabrik sa tanbour sete lapo kabri.

Dan bann lannen 1813 an montan, moutya ti ganny konsidere konman en ladans ilegal. Sa in fer resorti pa loter Mosyon. Rezon prensipal pou sa Lalwa sete pou anpes bann lesklav groupe. Si mon'n konpran byen Mr Speaker dan sa resers dan sa bann menm lepok, ti annan en Lalwa ki ti ganny sorti espesyalman pou bann lesklav. Sa Lalwa ti apel *Code Noir*. Si bann lesklav i ganny atrape pe kas da bann Lalwa la bann pinisyon sever ti ganny aplike.

Parfwa zot ti menm ganny abize seksyelman. E sa ti enkli ganny fwete ek fwet. E sa dan li menm ti fer ki moutya ti souvandfwa ganny pratike an sekre.

Mr Speaker mon demann mon lekor ki mannyer en tel ladans in kapab ganny pratike an sekre, sirtou ler ou tann sa lapo kabri kot pe dekoke dan granmaten?

Mr Speaker le 9 pou 1935 ankor nou fer sorti par loter Mosyon, en Lalwa ti ganny sorti konsernen en limitasyon lo ler ki tanbour moutya ti merit ganny zwe.

Touzour dapre resers lo sa website Mr Speaker ki byen

enteresan, i fer resorti ki vre rezon par deryer sa limitasyon lo ler, se ki parfwa sa bann rasanbleman moutya ti kapab ale ziska kok sante parey nou dir an Kreol.

E touzour dapre sa menm lartik sa bann aksyon pa ti ganny siporte par bann Komite Legliz parey in ganny resorti parey avan.

E sa letan moutya ti ganny osi konsidere konman en ladans vilger. I menm annan zistwar kot ti menm annan Pret ki ti sey al aret moutya. Me ler i ti ariv laba Mr Speaker li osi i ti tonm dan ta.

Mr Speaker ler nou koz moutya byensir, nou mazin bann santer parey Patrick Victor, Jean-Marc Volcy, Norville Ernesta, Brian Matombe e san oubliy nou santez Jany De Letourdie ki'n toulstan fer zot mye posib pou enkli sa kalite tenmpo dan zot bann stil lanmizik.

E sa in ganny apresye par bokou dimoun. Me solman keksoz ki mon vwar i drol, se ki akoz nek ant 2018 ki nou'n pran sa pa, pou nou *repeal* sa Lalwa konsernan ler pou zwe tanbour moutya? Petet sa i en kestyion ki ava ganny adrese pli tar.

Mr Speaker loter Mosyon pe demande ki lendistri kiltirel

lokal i fer moutya vin vivan konman en parti divertisman. Mon totalman dakor avek sa. E mon krwar nou devret al pli lwen ki sa Mosyon pe dir. E rod fason pou elev sa lanbyans menm lo nivo enternasyonal, mon panse ki bann Lotorite konsernen tel ki Minister Touris ek Zafer Etranzer, osi kapab ede parmi zot bann *campaign* promosyon lo Sesel ki zot pe fer, ki zot kapab enkorpor moutya dan zot bann promosyon.

Sa ki mon soulaze se ki i annan bann zenn, ki pe met valer lo sa ladans. La mon mazin Mr Christopher ek son group ki ti'n plan en premye Bal Lalin en sware moutya ki ti pou fer *L'Intendance*, e ki pa ti ganny lotorizasyon pou rezon *COVID*. Me selman Mr Speaker ler nou get sa ladans byen i annan *social distancing* ladan, akoz rarman sa bann dimoun ki pe danse i pres ek kanmarad konpare ek bann lezot ladans tel ki *slow dance*.

Pou retour lo sa pwen ki mon ti pe fer resorti mon kontan pou vvar ki i annan zenn ki kontan sa ladans. E nou priye ek lagras Bondye keksoz i ava amelyore, kot nou a kapab reorganiz en sware moutya oplenner, e kot nou ava dekoke dan lalin kler ; nou a fer

lapo kabri kriye ziska granmaten.

La mon pou osi salye sa group ki vibran dan bazar labrin dan Merkredi, ki sa dan li menm in egey bann kliyan e osi lokal e sa ki'n al rann lapel Beau Vallon da Merkredi.

Mr Speaker, ler nou pe koz mentenir bann stati konman en patrimwann mondyal, mon krwar nou bezwen osi fer sir nou ganny en landrwa kot nou kapab bat nou tanbour, kot nou pa vvar nou isi dan Lasanble kot nou bezwen anmenn en Lalwa tapaz. Akoz ler mon pe gete pli ale osi landrwa pou defoule i vin pli limite.

Mr Speaker pou terminen, mon ti ava kontan sizere ki Departman Kiltir i travay plis, plis pre avek distrik pou ganny en dyalog lo ki mannyer nou kapab enkli plis aktivite kiltirel dan nou distrik.

Parfwa aktivite kiltirel, i pa neseserman zis bann ki fer tapaz. Annou rewwar bann diferan aktivite ki nou zanset ti fer e ki mannyer nou kapab elev sa bann aktivite.

Dan mon letan ki mon ti pe grandi Belvédère mon'n grandi dan en latmosfer kiltirel kot bal ti ganny donnez dan Sanmdi, sirtou ler Ken ek Paquerette ti'n tap zot de.

La, lakominote antye ti zwenn, sa bann tel aktivite in disparet. E sa ti en fason viv ki'n disparet. Me eski in fini tro tar pou nou fer retourn sa fason viv? Sa i en kestyon mon poz la.

Mr Speaker konman en dimoun ki siport tou fason deversman lokal e sirtou bann artis lokal. Mon totalman donn sipor sa Mosyon anmennen par Manm Elekte pour Mont Buxton. Mersi.

(APPLAUSE)

MR SPEAKER

Mersi Onorab. Mon aprezan donn laparol Onorab Naddy Zialor.

HON NADDY ZIALOR

Mersi Mr Speaker. Bonn apre midi. Mon pe kalkile si nou'n ariv kot Ma Josephine oubyen si Madanm Jean anmas Lorenza pou sa apre midi, me selman mon ti a kontan aport mon kontribisyon, an ver sa Mosyon san ki mon fer mon deliberasyon long. Parske deza bann entervenan ki'n koze in tous pwen fondamantal e rezondet sa Mosyon.

Apre midi mon apresye nou pe koz lo enn nou bann leritaz. Nou bann leritaz ki donn nou, nou idantite konman en Seselwa. E mwan konman

sa zenn zenerasyon, mon rekonforte ki konmsi ou a krwar nou pe redonn Sesel son valer, nou pe donn Seselwa son idantite.

Parske sa bann tel konversasyon ki nou pe fer la, probableman nou ti pou tann li dan mwan Oktob letan ki nou ti pe selebre Festival Kreol.

Onorab Henrie mon ti ava kontan remersi ou pou anmenn sa topik sa Mosyon devan nou, pou nou koz lo la. Senpleman akoz i annan en keksoz ki atraver ou Mr Speaker Onorab Labrosse in koz lo la fortman, se ki mannyer nou dan nou komite sa sans lazwa de viv.

En tel Mosyon parey loter Mosyon in dir, napa mansyon Gouvernman. E mon krwar sa ki fer li enteresan. Parske i donn tou kou sosyete, en sans lapartenans.

Mwan mon enn bann zenn ki kontan lanmizik, e mon mazinen lontan letan ou ti tann en pti aktivite dan kominate o bor lanmer lo lans, nou ti vwar sa fey koko ki pe konmans alimen e sa tanbour lapo kabri pe sofe taler dan pti 10er zafer ti pou'n bon.

Alors nou, nou anvi reviv sa bann letan. E i enportan - i enportan ki sa ki mwan mon'n sezi dan sa Mosyon, se ki nou

bezwen gard nou idantite konman en Seselwa.

Me parfwa avek bann modernizasyon ki neseser - ki neseser ki form parti devlopman, nou pa anvi vwar nou konman en Nasyon perdi nou *DNA*; perdi nou idantite. E mwan mon pou siport bann rekomandasyon ki'n anmennen par loter Mosyon.

Mon pou menm al en pti pe pli lwen, letan ki bann zafer restriksyon *COVID e COVID* in ale, e nou pe regran *ownership* bann aktivite *outdoor* dan nou kominote, ki nou swete i arive byento, nou konmans reviv sa bann moman dan nou pti kominote.

La i fer mon mazin distrik Anse Boileau kot Onorab Phillip Arissol la dan bor semen, lontan ler ou ti pase ou ti vwar en pti group ki a pe tap sa tanbour avek zot ravann ou park en pti kou. Konmsi ti annan sa lavi se sa ki nou pe rode.

Lafyerte konman en Nasyon. Nou'n koz ki mannyer nou kapab servi moutya konman en idantite dan nou *marketing tourism*. Be mwan mon pou menm dir ki nou osi bezwen par egzanz letan nou fer bann programm ofisyel, ler nou pe fer bann pti *entertainment*, enkorpor en pti

gin osi en pti ladans moutya pou ki ava donn son relevans.

Ou konnen en keksoz ki mwan mon'n aprann letan bann entervenan avan mwan in koze, se ki moutya ti en fason lekspresyon, kot nou bann zanset ti eksprim zot lekor atraver konpozisyon ; ti plenny zot douler, ti pas zot mesaz. E sa i enportan.

I enportan ki nou pa zis reentrodwir oubyen redinamiz, re sant bann moutya ki ti sante. Me i osi enportan ki nou konmans konpoz bann novo konpozisyon moutya an relevans avek modernizasyon ozordi. Alors i enportan.

Sa ki enportan se ki nou gard nou leritaz, nou patrimwann nou idantite. E wi mon siport sa propozisyon ki nou anmenn moutya labaz skoler, petet ganny montre dan *curriculum* lekol dan *Music*. Mon krwar primer i annan en *timetable Music*, konmans la. Konmsi prezan ler ou santi lekol ou pe konmans sant "Madam Zan, Madam Zan." Ou konpran ?

So i konmanse sa. Sa i bann keksoz ki dir si letan mon zanfan i ne, e zenerasyon ki pe vini apre nou, nou pa bezwen al get dan Arsiv Nasyonal pou nou konnen poudir ti annan moutya Sesel. Ti fer koumsa. Ti annan.

Me nou bezwen dir i annan moutya Sesel, e se pou sa rezon ki ozordi in ariv a nivo UNESCO

Me zis a nivo UNESCO pa pou gard sa idantite, fodre nou konman Seselwa nou kit moutya vivan Mr Speaker.

Avek sa de pti mo mon pe aport mon siport e mon remersi zot pou zot latansyon. Mersi.

(APPLAUSE)

MR SPEAKER

Mersi Onorab Zialor. Mon aprezan pas laparol Onorab Samynadin.

HON KELLY SAMYNADIN

Mersi Mr Speaker. Bonn apre midi tou mon bann koleg Onorab e tou dimoun a lekout.

Mr Speaker mon pou konmans en lentervansyon lo sa Mosyon, ki pe demande pou fer moutya vin vivan konman parti nou divertisman, e pou mentenir sa stati konman patrimwann mondyal par sit Mr David Andre, nouveau Sekreter Zeneral Lenstiti pour Kiltir Leritaz ek Lar. I ti dir le 16 Desanm 2021 e mon sit li "Rezon pou ki nou ladans tradisyonnal in ariv lo lalis pou leritaz kiltirel entanzib pou limanite, i demonstre ki kantite valer nou leritaz i annan. E la nou bezwen travay dir pou asire

ki nou moutya i ganny son plas ki i merite spesyalman parmi bann zenn, pou ki i ava kapab ganny zourir pandan plizyer lannen a lavenir." Fen sitasyon."

Mr Speaker moutya i en ladans ki ti ganny kree par bann lesklav environ 200an pase. I enportan pou note ki sa bann letan, ti napa en *platform* ki zot ti kapab servi pou plenny zot sor. E se de la ki zot ti deside sant zot soufrans.

Sa pratik ti ganny fer dan gran bwar, lwen avek Grannkaz pangar Gran Msye i ava tann zot. I menm annan en moman kot moutya ti ganny enterdi akoz bann lesklav ti ganny trouve konman bann rebel. Parey Onorab Henrie in mansyonnen oparavan.

Dapre sit web UNESCO orizinelman ladans moutya ti en konfront psikolozik kont bann difikilte, lapovrete e en mwayen pou reziste laservitud ensi ki bann lenzistis sosyal. En ladans sansyel avek en keografi senp.

Sa ki enteresan avek sa kalite ladans, se ki pa *gender based* e i en enplik msye, madanm ek zanfan anfen tou dimoun. Tou dimoun i ganny sans partisipe. Nou moutya i form parti nou lidantite. Ki fodre pa nou les li perdi. Akoz i

enn nou bann reprezantasyon ki ed nou ganny idantifye konman en Nasyon. Tou dimoun i kapab fer zot par e ede pou promouvwar li.

Mr Speaker konman en zenn, mon rekonnnet ki moutya i pa vreman sitan popiler parmi nou bann zenn konmela. E mon sant ki wi nou tou nou bezwen met lanmen ansanm pou nou ede relev li. Pandan mon lanfans mon kapab dir ki lenfliyans ki moutya in annan lo mwan, i ankor ase *vivid* dan mon lespri.

Ki swa atraver medya oubyen atraver bann aktivite kiltirel ki ti ganny organize e ki mon'n ganny sans asiste. Mr Speaker mon santi ki nou tou nou bann parti prenan entegral dan promosyon e valorizasyon nou ladans moutya ki en sous nou kiltir e leritaz.

Dan en lartik lo sit web *The Seychelles News Agency* date le 16 Desanm 2021, kot Prezidan Wavel Ramkalawan ti dir ki,

"Sesel pe aprezan partaz son leritaz kiltirel avek lemonn antye. E sa i en moman lafyerte e en moman lazwa pou tou Seselwa. Moutya i apartenir a tou pep e Nasyonalite akoz in ganny rekonnnet konman en ladans ki annan bokou

signifikan kiltirel ensi ki rezonans global." Fen sitasyon.

Dan sa laliny mon santi ki pou nou partaz moutya konman larises kiltirel, i enportan ki nou pa bliy nou bann veteran ki'n mir dan sa domenn.

Ti ava en bon loportinite pou zot ed nou bann zenn akerir teknik sa ladans, ki mon santi i pa sitan difisil.

I ava en sans osi pou nou rekonnnet zefor e kontribisyon ki sa bann defander nou leritaz in anmennen, pou ede fer ladans moutya ganny rekonnnet.

La mon mazin mon ansyen koleg Jany Letourdie avek son sanson 'Tanbour', Mr Jean-Marc Volcy avek' Vandredi Sen', Dr Patrick Victor li osi avek son sanson 'Tanbour Moutya', e byensir pa bliy Mr Joseph Sinon ki fer nou bouze avek 'Kedora.'

Sa i detrwa parmi bann melodi moutya ki'n rezonnen dan mon zorey pandan ki mon ti pe grandi.

Me byensir i annan ankor plizer sirtou bann zenn artis ki pe leve, ki zot osi zot pe fer zot kontribisyon. Mon santi ki Minister Ledikasyon an partenarya avek Lenstiti pour Kiltir, Leritaz ek Lar, i kapab osi zwen en rol dan lakizisyon nou bann ladans tradisyonnal kot

nou bann zanfan ava kapab ganny sans eksplor e viv ladans moutya parey ou bann zenn ti ganny sans oparavan. I kapab vin swa atraver bann aktivite ekstraskoler apre lekol oubyen dan vakans.

Pou ki nou moutya i reste vivan nou bezwen fer sir ki nou bann zenn i ganny sa sans pou zouir li, e etabli semen pou pas li ek nou bann zenerasyon ki pe monte.

Mon osi santi ki o nivo distrik nou bann *MNAs*, *DAs* bann group kiltirel, bann regroupman trwazyenm-az byensir an partenarya avek Lenstiti pour Kiltir Leritaz ek Lar, avek Departman Tourizm pou kapab travay ansanm avek nou bann *constituents* ki annan konesans ladans moutya, pou organiz bann latelye kiltirel.

Kot pa zin nou bann zenn me osi lezot dimoun ki annan lentera dan ladans moutya enkli touris, zot ava kapab ganny sans pou depouy e viv sa ladans.

Pou kwa pa dan konteks ki i ti ganny enplimante orizinalman ou trouv en dife an plenn lannwit avek son tanbour e leokri bann melanz lavwa zom ek fanm ?

Vwala en nouveau linisyativ pou nou fame bazar Au Cap.

Mr Speaker, mon kapab dir pou ki nou moutya i kapab reganny son plas ki i merite, i devret osi pe ganny promote enternasyonalman. Moutya i devret enn parmi bann rezon pou lakel viziter i rann vizit nou pei. Non pa zis pou nou zoli peizaz.

Nou idantite kiltirel i leker nou Nasyon. Alors nou bezwen met tou nou zefor an ver son valorizasyon e proteksyon.

Pou konklir Mr Speaker, pou ki tou dimoun pe enport sa nasyonalite i kapab konpran e apresye nou moutya ensi ki nou kiltir an zeneral, i bezwen kapab annan en koneksyon. E mon santi ki sa i kapab byen ganny resorti, an vi ki sa ladans pe plizoumwen fer resorti soufrans e opresyon ki en serten group minoriter ti pe pas atraver.

E sa byensir par mesaz ki pe ganny pase dan son bann parol. Mr Speaker Marcus Gavey ti dir e mon site “En pep san konesans son listwar, lorizin e kiltir, i parey en pye dibwa san son rasin.” Se pou sa rezon ki mon pe aport mon sipor anver sa Mosyon, akoz konman en sitwayen Sesel i mon devwar e mon responsabilite, pou ede relev e promot nou kiltir e leritaz pou ki mon zanfan, e nou zanfan osi

i kapab ganny sans zourir li pou plizer lannen lavenir. Mersi Mr Speaker.

(APPLAUSE)

MR SPEAKER

Mersi Onorab. E dan sa kote la ti annan en dimoun ki ti'n lev lanmen ti Onorab Roucou apre Onorab Woodcock wi Onorab Roucou ou annan laparol.

HON MICHEL ROUCOU

Mersi Mr Speaker. Bonn apre midi tou bann koleg Onorab. Bonn apre midi spesyal bann zabitan Mont Fleuri.

Mr Speaker ozordi Mosyon anmennen par MNA Mont Buxton Onorab Gervais Henrie. I en Mosyon ki vreman enportan sirtou pou nou bann zanfan e bann zenerasyon ki pou vin apre nou.

Mr Speaker ler mon get sa Mosyon i fer mon mazin ler nou ti fek ganny *allocate* dan nou lakaz anler Kan Tobourk sakenn ti ganny son *unit*.

E nou ti pran li ou kapab dir en manda pou nou tanzantan kree bann pti aktivite dan nou kominate.

Moutya ti enn, akoz nou ti annan bann group dimoun ki zot osi zot ti'n vin reste dan sa

landrwa ek bann ki ti deza la dan sa kominate, kot nou ti zwenn ansanm tanzantan dan Sanmdi kot nou ti met nou dife, e anmenn nou tanbour lapo moutya lapo kabri sofe pou nou kapab krak en pti moutya.

E sa ti anmenn bokou dimoun dan nou vwazinaz kot zot ti vini zot partisipe.

Mr Speaker sa Mosyon li menm li in ariv plis ki ler kot nou ti pou bezwen koz lo la. akoz mon pe dir nou ti pe bezwen koz lo la? akoz si le 15 Desanm lannen pase, nou pa ti anmenn li lo nivo enternasyonal, nou pa ti anmenn li lo nivo mondal li menm li, e petet i t pou'n disparte.

Mr Speaker i enportan ki nou zanset ki ti la avan nou ti fer pase bann mesaz dan moutya. E ozordi ler ou pe get moutya, ankor moutya nou'n kapab sov li Mr Speaker. me nou ankor bann lezot ankor annou mazin nou tinge, nou sokwe sa osi tou i enn ki apre ki nou'n fini etabli byen menm nou moutya dan bann kominate parey nou pe dir ek nou bann zabitan annou pran li *ownership* nou pou bezwen sov sa de lezot ankor danse ki apel tinge avek sokwe, nou de lanmizik.

Mr Speaker mwan mon annan en gran lanmour pour nou lanmizik moutya akoz mon'n ganny sa loportinite an gran disan pou mon kapab partisipe e menm mon'n menm organize moutya.

Kot la nou annan bann dimoun parey nou ansyen *DA ki'n move English River* ki osi tou i ti annan sa lanmour ki tanzantan nou ti anmenn sa, ansanm avek bann dimoun parey Elvis, Odile, ki tanzantan lot fwa ler mon pe get en pti *advert* lo televizyon lo kote moutya. I montre ou sa moutya ki nou ti fer anler kot Terence lo kot pon Rochon ki savedir i anmenn ankor plis sa ankourazman pou nou dan Mont Fleuri pou nou relev sa moutya.

Mr Speaker ozordi ler mon pe ekout nou bann zenn artis parey ler mon pe ekout Rico i fek sorti en sanson moutya. Clive Camille li osi tou i pe konmans sant lo moutya, Joseph Sinon e nou annan bann vedet ladan parey Jean-Marc Volcy, Patrick Victor nou ansyen koleg Janny osi tou ki zot in anmenn sa dan nou e mon dir poudir ou mon osi lagrandisman kot mon'n santi sa lanmour ki zot in angaze donn mon pou nou moutya.

Nou bann zenn annefe si ki in ariv en letan kot Minister Ledikasyon li menm li i pou bezwen anmenn sa dan nou bann lekol. Ler mon pe dir dan lekol i kapab anmenn dan lekol prive osi tou, pa zis lekol Gouvernman.

Mr Speaker mon'n ganny enformen poudir i annan en *teacher* dan lekol primer Beau Vallon i apel Magrette Vel ki li i travay lekol primer laba in pran sa konman in pran *ownership* sa ki pe anmenn sa dan son lekol.

E akoz nou pa anmenn li dan bann larestan lekol kot i annan en *teacher* ki kapab nou vini petet nou ava ouver en laklas pou kiltir.

E osi dan mon distrik Mont Fleuri nou pe kree bann Komite. Zis parey la nou fek fini kree nou Komite Spor e la nou pe al kree nou Komite Kiltir ki pou nou kapab angaz nou plis dan bann tel lanmizik parey moutya, lezot ankor kanmtole ankor Mr Speaker.

Mr Speaker i enportan ki nou Nasyon Seselwa i pran *ownership* nou moutya, akoz nou vwar poudir bann dimoun dan lepase ki ti servi lapo kabri pou fer moutya laplipar zot pe ale.

E la mon'n ganny enformen poudir i annan bann

dimoun ankor, bann nouveau zenerasyon ki enterese ki zot pe vini pou zot aprann pou zot fer tanbour moutya avek lapo kabri.

Nou'n sanse kot nou'n kapab sov nou moutya akoz ler ti napa personn pou fer li nou ti annan sa tanbour moutya ki mon'n ganny dir i ti ganny fer avek en plastik spesyal, ki sa ti ede pou nou kapab kit nou moutya vivan.

E i enportan ki nou konman en pti Nasyon otour lemonn kot viziter pe kontinyen vin vizit nou e ozordi Minister Touris pe koz avek nou pou nou anmenn bann touris dan kominote fer zot konn nou kiltir, e la ankor nou kapab angaz nou moutya.

E montre zot ki mannyer nou Seselwa ki mannyer lontan nou bann zanset ti kapab pas nou mesaz atraver moutya Mr Speaker.

Mr Speaker mwan mon pou donn mon sipor sa Mosyon ki Onorab Henrie in anmennen akoz mon santi poudir moutya i en fason osi ki nou kapab detann nou e osi son fason fer son fason ki ou kapab angaz ou ladan i pa parey lezot aktivite lanmizik. I annan lanmizik ou vini ou servi en DJ. E li moutya ou vwar ou pli angaz ou ki vin parey en form lar pou spor li

menm li kot ou la ou pe partisipe e nou Mont Fleuri nou'n fer sa plizer fwa nou bann kanton. Nou'n fer sa Kan Tobourk. Tanzantan nou ti fer li nou'n fer li Corgate Estate detrwa fwa e osi Rochon.

E mon garanti ou osi la nou pa ti dan letan *COVID* petet nou ti pou annan plis aktivite, i ti pou annan pou fer avek ti pou annan moutya ladan.

Mr Speaker sa Mosyon pou mwan mon pou donn mon *full* sipor, akoz mon santi poudir se ki in ariv ler la pou nou Seselwa parey bokou in dir pou nou fer nou idantite, pou nou montre nou kiltir e mwan mon dir ek Seselwa annou *take ownership* annou *take ownership* moutya , annou relev li dan bann kominote i en keksoz ki sitan fasil ou pa bezwen al rod nanryen pou savoye petet ou ava zis rod en fey dibwa fey koko e ou annan ou tanbour la avek ou.

Mon pou donn Onorab Henrie mon *full* sipor. Mon dir mersi Mr Speaker.

(APPLAUSE)

MR SPEAKER

Mersi Onorab. Mon ava pas laparol Onorab Woodcock.

HON WAVEL WOODCOCK

Mersi Mr Speaker. Mr Speaker, mon pran laparol ozordi lo Mosyon Onorab Henrie, akoz mon santi mon osi ki Moutya i en form lanmizik vreman enportan pou nou pei, pou nou Nasyon. E par lefe ki ozordi in vin en patrimwann mondyal, i montre valer ki sa ladans, ki sa kalite lanmizik i annan pou Sesel e mondyalman.

Mr Speaker, sanmenm sa ki ozordi i enportan pou nou promouwar nou moutya e menm servi li koman en valer azoute. E zisteman parey mon ser Onorab Porice in dir pli boner. Ler nou pe koz lo moutya ozordi, lo sa ladans, lo sa form lekspresyon artistik atraver *chant* e atraver ladans.

Mon mazin enn de nou bann frer Praslin, annefe nou bann frer ek ser Praslin. Sirtou 2 group ase popiler. La mon mazin on zwer Jerry ek son group Manglier e mon mazin osi Ralph ek son group Latanier.

E a plizyer repriz zot in anim plizyer bann aktivite ki'n ganny fer dan distrik. Sirtou parey dan bann lokazyon. Parey lazournen nasyonal, Festival Kreol, bann lafet lanmizik e plizyer bann aktive ki'n ganny fer dan bann distrik, dan bann kominote. Zot in al pou anime.

E menm dan bann lezot aktivite ki'n ganny organize, bann aktivite prive e zot in vreman anim bann dimoun, lodyans ki la e zot vreman, vreman fantastik Mr Speaker. Petet en zour ou ganny sa loportinite pou tann zot.

E zot in osi egey bann lafet relizyez parey St Mathieu e lezot aktivite. Ste Anne osi. E lezot aktivite.

E sa bann group Moutya Mr Speaker, zot met en lagam. An menm tan parey nou dir ki moutya ti en fason ki dan letan lesklavaz bann lesklav ti eksprim zot lekor, zot ti defoule, tir presyon, plenny zot sor. Me ti osi en fason pou *entertain* zot lekor e *rejuvenate*. E ankouraz kanmarad.

E menm Mr Speaker, lo Praslin, mwan annefe mon'n deza atenn en aktivite ki Onorab Porice la obor mwan ti fer e mon ti vini, kot Jerry ti la, i ti animen. Ti vreman fantastik e mon ti byen danse sa zour. Sa ti ava *COVID* ti tape.

E mWAn menm, mon osi mon'n deza organiz en aktivite Grand Anse, kot Jerry menm ki ti vini, ti *entertain* e fransman moutya i en- Mwan mon en dimoun ki kontan lanmizik, mon kontan lar, mon kontan lanmizik, mon kontan ladans. Mon kontan mon moutya, mon

kontan on sega. Mon kontan bann pli modern, *reggaeton*.

Konmsi nou *enjoy* lanmizik. Seselwa an zeneral nou kontan lanmizik, nou pasyonnen avek lanmizik. Praslin nou, nou en zil ki kontan *band*, ki nou kontan sa bann keksoz koumsa.

E ozordi vi ki Minis, nou Gouvernman, sirtou Minis *Tourism* - Minister *Tourism* pe met bokou lanfaz lo *cultural tourism* pou promouvwar nou kiltir. Mon santi ki moutya i form parti e i form parti nou kiltir. I enportan marye kiltir ansanm avek *tourism* parey mon'n dir koman en valer azoute.

E annefe i malere ozordi Mr Speaker, sa i en konsern ki mon'n tandé, menm bann letablisman touristik in fer resorti e menm bann touris ki mon menm mon'n rankontre ouswa en pe konsern ki'n ganny souleve lo Praslin, se ki touris ozordi i konplent ki i mank en pe lanbyans, i mank en pe *entertainment*, i mank landrwa pou zot ale, pou zot ganny sa. Egey zot lekor, ganny sa pti *entertainment*.

E napa bokou landrwa ozordi kot en touris i kapab ale pou kapab ekout en lanmizik lokal. Regard en group moutya pe animen. I mank en pe sa.

E mon santi *entertainment* i form parti nou kiltir e i en fason osi ki pou parey mon'n dir, anmenn en valer azoute ; ki ankouraz kliyan osi pou vin Sesel ler zot pe eksperyans nou kiltir, nou tradisyon. *Ok?*

Akoz nou kiltir i vin dan plizer laspe. I vin sa laspe ladans, sa laspe lanmizik, nou lar, nou manze. Tousala i en portan ler nou pe koz nou Lendistri *Tourism*. Sanmenm sa i enportan osi ki nou annan sa maryaz *tourism* ansanm avek nou kiltir.

E sanmenm sa Mr Speaker, mwan koman Manm elekte pou Grand Anse Praslin mon santi poudir Praslin i mank nou en pe sa, i mank nou en landrwa kot touris i kapab vini e zot kapab eksperyans nou kiltir dan tou son lanpler.

Annefe koman *MNA* pou Grand Anse Praslin mon'n propoz en vilaz artizanal e *tourism* ki mon annan *backing* zabitant Grand Anse Praslin, e zot anvi trouv sa. Zot in demann sa pou plizer lannen.

En vilaz artizanal ek tourizm vizavi erport Amitié, kot *ex STC warehouse*. E mon annan siport Gouvernman lo sa proze e annefe en konsep in fini ganny drafte.

Kot en landrwa kot bann touris, pa zis touris. Sesselwa, nou bann zanfan, nou trwazyenm-az, nou bann zenn, *middle age*. Nenport dimoun i kapab vini, enkli touris. Zot kapab vin eksperyans sa lavi Kreol.

I en landrwa kot touris i kapab vini, i kapab parey mon'n dir eksperyans nou moutya. En group pe sant moutya apre soulye kouse. Annefe nou kapab get sa *sunset*. Enn bann pli zoli *sunset* ki ou pou vvar par lao Cousin ek Cousine. E kot ou kapab *enjoy* en group moutya pe sante, pe animen, pe bat tanbour. En *bonfire* in ganny mete.

E dimoun i kapab vin eksperyans sa, eksperyans nou kiltir. An menm tan i annan bann *kiosk* kot nou pe vann nou bann prodwi artistik, nou lar, nou bann *craft*. E nou annan bann lezot *band* osi ki vini, ki animen.

Konmsi en landrwa kot ou kapab vini eksperyans Sesel dan son totalite, kot ou kapab vini gout bann manze tradisyonnal, nou ladob, nou konfitir lokal.

Konmsi mon santi poudir sa i en keksoz ki nou bezwen, nou bezwen re anmennen dan nou kiltir, ki enkli nou bann ladans, sirtou nou moutya ki

ozordi i en patrimwann nasyonal.

I malere ki *COVID* in tape, me selman *COVID* pa pou la pou touzour. E zisteman ozordi lemonn pe aprann viv avek *COVID*, lemonn pe re ouver e Sesel nou pei li menm li pandan sa dernyen 2an, lemonn antye enkli Sesel nou'n fermen, nou'n napa *entertainment*. Lanmizik in ganny kennsel.

E lepep Seselwa i anvi *still* vvar sa bann keksoz. Parey mon'n dir, keksoz in larg en pe, nou fer li dan en fason byen, dan en fason annord.

Me selman i enportan pou annan sa bann keksoz. Pou enn, kot Seselwa i kapab ganny sa loportinite pou li defoule, tir en pe presyon. Zisteman i fer mon mazin lo sa lensidan ki'n arive Praslin, kot mon bezwen dir Mr Speaker, bann Praslinois pa ti desann, akoz zot ti anvi fer dezord, akoz nou bann dimoun konpran nou. Nou pa bann dimoun ki anvi fer dezord.

Me selman ler ou tann lanmizik, kot i annan lanmizik dimoun i zis anvi antann sa lanmizik, zot anvi tir presyon ozordi ki - Ou konnen ozordi parey mon pe dir, sa pei in fermen pou 2an e zot ti anvi lev moral en pti git. E ou konnen pandan letan moutya, pandan letan lesklavaz moutya ti en

fason ki dimoun, ti ed dimoun tir sa presyon.

Parey mon'n dir, plenn zot sor, solider ansanm. Lev en pe moral.

Akoz Mr Speaker, annefe i sa ki lanmizik i fer. Lanmizik i ed dimoun pou tir presyon, pou defoule, pou egey dimoun. Zis atraver ekout lanmizik i annan en lefe psikolozik lo en dimoun ki ed ou en pe tir bann presyon ki ou annan.

E sa ki lanmizik i fer, i depan ki kalite lanmizik. I donn leswarz moutya, sega, *reggaeton*, mouke. Nenport form lanmizik sa i sa ki lanmizik i fer e sanmenm sa ki nou pei Sesel, nou Seselwa nou kontan nou lanmizik. Nou kontan. E nou ere ki ozordi Moutya in vin en patrimwann mondyal.

E se pour sa rezon ki ozordi Mr Speaker mon pou siport sa Mosyon ki Onorab Gervais in anmennen pou nou promouvwar sa kalite form ladans e lanmizik dan nou pei. E osi koman en valer azoute pou ed nou Lendistri Tourizm. Avek sa de mo Mr Speaker, mon dir ou mersi.

(APPLAUSE)

MR SPEAKER

Mersi Onorab. Onorab Sandy Arrisol.

HON SANDY ARISSOL

Mersi Mr Speaker. Bonn apre midi tou dimoun. Mr Speaker, mwan mon ti a kontan servi Mosyon Onorab Henrie pou nou al dan en lot direksyon.

Ou konnen, *COVID* in tap nou pei preski 2an e nou tou dan en fason ou en lot nou'n ganny afekte e bann santer, mizisyen, tou bann ki fer lar zot osi zot in ganny afekte avek *COVID*.

Nou'n tann, tann plizyer mirmirasyon. Nou'n tann plizyer kritik e ozordi mon krwar Mosyon anmennen par Onorab Henrie, i pou donn nou sa posibilite pou nou si kapab pa zis get moutya ki en form lar, me get osi bann artis. Bann santer ki sant moutya, sa enn ki desinen, sa enn ki sant *classic*, sa enn ki fer lot par, lezot form lar.

Parske mon asire i ava annan dimoun i a dir, kantite problemm ki nou annan ozordi, Lasanble pe anmenn en Mosyon an relasyon avek moutya.

Me zisteman Mr Speaker, an relasyon avek moutya sa Mosyon pe donn nou posibilite ozordi zis pou nou kapab get osi bann artis ki egziste laba

deor. Artis in ganny tape dan tou differan fason e mon krwar sa Mosyon anmennen par Onorab Henrie, zisteman i ava kapab tras en semen pou nou bann artis ki pe ekout nou.

Mon kontan letan tou bann Manm in mansyonn sakenn bann artis dan nou distrik, ki sanson i sante. Me kestyon i bezwen reste, letan sa Mosyon i fini, ki bann artis i gannyen atraver sa Mosyon ki nou pe anmennen ?

Ki bann artis pe espekte avek Mosyon anmennen par Onorab Henrie? Zis nou mansyonn zot non dan Lasanble Nasional, zot in sant zoli sanson. Zot dan rikord, in ariv UNESCO?

Nou pou bezwen annan bann rekomandasyon for pou ki nou Gouvernman laba deor avek sa novo Lenstiti Lar, Kiltir ki'n fek ganny formen, pou nou zisteman konnen ki zot, zot kapab fer oubyen ki zot, zot pou fer.

Mr Speaker, i annan plizyer fason pou nou menm nou koman bann endividé, nou tou nou en mizisyen, oubyen nou en artis dan nou menm. Parski anmezir nou'n grandi, nou'n bezwen aprann sante. Nou'n bezwen aprann ekrir, nou'n fer poenm dan lekol e nou tou nou'n fer nou bout lar.

Me selman kestyon, kontan letan par egzanz letan mon'n tann Onorab Michel Roucou mansyonn non Miss Margaret Vel Beau Vallon. Miss Margaret Vel Beau Vallon in fer sa profesyon pandan plizyer lannen, e in menm partisip lo nivo enternasyonal an relasyon avek nou kiltir ;- pou al promot nou ladans dan bann pei.

Sak fwa en novo laliny pe antre Sesel, Miss Margaret avek lezot son koleg ki promot nou bann danse e promot nou kiltir.

Be kestyon se ki nou bezwen demande se ki Miss Margaret in gannyen avek sa? Larepons se naryen. Me par kont nou sa ki nou bezwen rode ozordi se ki mannyer nou bann artis, nou bann danser, tou nou bann dimoun ki enplike an relasyon avek kiltir Sesel, zot ganny serten rekognizyon, promote. Ganny en labours, ganny en keksoz, parske zot osi zot ede pou anmenn touris Sesel, pou ki nou lekonomi i bouze.

Letan mon lo sa pwen Mr Speaker, parfwa mon a size mon demann mon lekor, letan nou pe koz kiltir, nou pe koz moutya zisteman avek bann artis, kote touris, ki letan ti annan bann promosyon pe ganny fer pou amenn novo

laliny isi Sesel pou li vini. I ti ganny vwar moutya. Kot e i ale ozordi la dan en lotel, oubyen dan en landrwa, dan en lenstitisyon zisteman pou li dir, "Be letan mon ti laba, mon'n vin Sesel parske ti annan sa ladans la ki Miss Margaret avek lezot ti pe fer. Ler mon arive Sesel, be kote mon ale pou mon vwar sa. Kote dan pei ki egziste sa?" Napa.

Ozordi en touris i vin Sesel Mr Speaker, i anvi manz en bon satini papay, parey letan i get sa gran liv Sesel. I vwar en zoli satini papay, en pwason griye, bwar en git kalou. I annan en pti bouyon bred pti fey la par kote. Kote sa touris i ale dan nou pei ozordi la ler nou pe koze pou li ganny sa ? Napa, pa egziste !

Me pran kont, bann promosyon ki nou fer lo nou pei, nou enplik tousala. Me ozordi nou annan Vilaz Kreol. Be ki annan dan nou Vilaz Kreol? Eski i annan en Moutya dan *weekend* letan ti napa COVID?

Eski i annan en manze kreol dan nou Vilaz Kreol? Si mon anvi al rod en manze kreol. Mon pa anvi kwi manze ozordi, mon avi manz en bon kari koko poul. Eski dan vilaz kreol ki promot nou kiltir, mon pou

gannyen sa? Non, nou pa pou gannyen.

Eski dan vilaz kreol ler mon pe antre, bann dimoun ki pou resevwar mwan zot dan en kazak, zot dan zot penwar, zot dan zot zoli sape lapay. Parski sa i kiltir ki nou, *ESA*, Minister Touris, bann lezot Lazans zot al promote letan zot al aletranze. Eski nou pou vwar dan Vilaz Kreol? Non, napa.

Ouswa nou pou vwar sa dimoun ki vin resevwar ou, pe servi dan en lenz ki in aste *Thailand* oubyen in fer vini lo *eBay*. Oubyen in aste *Dubai*. Eski letan i annan en keksoz i tonbe dan Vilaz Kreol, nou vwar nou zoli balye koko, nou balye zepi ble, ki promot nou kiltir? Napa Mr Speaker. Me par kont ou pou vwar en balye fatak ki sorti *Thailand*!

Be sa ki mon pe dir, se sanmenm sa ki form par nou kiltir. Dan Sesel nou zis koz kiltir apre nou pa vwar li sa kiltir. Be mon krwar atraver sa Mosyon anmennen par Onorab Henrie, menm i pe koz lo Moutya, i pou enportan pou nou enkorpor tousala.

Nou bann santer, nou bann artis. Tou nou bann dimoun ki annan relasyon avek kiltir, kote zot sitye zot an relasyon ek sa Mosyon anmennen lo moutya.

Mon kontan letan Onorab Henrie Mr Speaker, in koz lo Norville Ernesta. Norville Ernesta i enn bann dimoun ki dan sak sa Lasamble mon'n kriy son non for. E letan son madanm i zwenn mwan, Inese Ernesta, byen koni koman Dada i riye, i kontan parski i konnen poudir mwan mon toultan fer sir dan en fason ou en lot, mon mansyonn Norville.

E Norville, i enn bann dimoun Mr Speaker ki letan moutya ti'n mor dan pei, li i ti vini ek *band* 'Fek Arive' parey Onorab Henrie in dir, in relev sa latmosfer moutya dan nou pei. E sa in fer ki se pour sa rezon ki mon krwar apre ti annan en lasosyasyon ki ti ganny formen, kot aprezan moutya ti ganny fer rezyonal e dan bann distrik e osi o nivo nasyonal.

Be kestyon ki nou bezwen demande ozordi, ozordi Mr Norville Ernesta ki'n ouver moutya, rezon lasante i pa tro byen. Be ki Norville in gannyen? Ki i gannyen an relasyon ek kot moutya in ariv ziska UNESCO ozordi! Tousala nou bezwen mazin lo la.

Nou bezwen letan nou ep koz rekognisyon. Eski nou fer zis ler ki sa dimoun in mor, apre nou fer son triko nou met son figir lo la. Nou fer programm lo li, nou fer dyalog an direk lo li.

Tousala i bann keksoz ki nou merit pe vvar dan sa Mosyon pou ki nou Gouvernman i tande laba deor ki nou pe koz lo la.

Mr Speaker, be i annan sa Serzan ki asi ozordi ou la. Sa Serzan ki la, li osi i en tirer moutya enorm. Li osi i annan en *band* e i konn tir en kantite. E tousala i bann keksoz pozitiv ki nou annan dan nou pei e nou bezwen promote.

Mr Speaker, mon dezyenm pwen lo sa Mosyon, se an relasyon avek sa nouveau Lenstiti Lar, Kiltir ek Leritaz. Fek formen, in ganny Bidze. Kestyon ki nou bezwen demande ozordi se ki sa Lenstiti pe fer? *COVID* pe fini, pe redwir. Dousman, dousman i re monte, retournen.

Mr Speaker, si nou bann artis in kapab al *Dubai* pou al *expo*, pou al sante, pou al danse dan en peryod *COVID*, mon mazinen Sesel la ki *COVID* pe redwir, karenm byento pou fini, kestyon ki mon anvi demann avek sa nouveau lenstiti kwa ki zot annan dan zot plan, zisteman pou ankadre nou bann santer, misyon, tou sa bann ki fer lar an relasyon avek Mosyon anmennen par Onorab Henrie?

Mon'n aprann ki zot in fek ganny en *nouvo Head of*

creative. Kestyon ki nou bezwen demande se eski bann pozisyon pou zis ganny kree, e apre nou pa tann naryen an relasyon avek sa.

I pou enportan pou Mr David Andre ki responsab sa lenstiti, pou li kapab asize ansanm avek tou bann akter, pou nou rode zisteman ki mannyer nou fer marse, nou fer bouze nou moutya, nou fer marse nou kiltir. An menm tan nou pe fer sir ki nou bann santer, mizisyen zot osi zot manze.

Alors, mon ti a kontan lanz en lapel avek novo lenstiti e Lasosyasyon Mizisynen.

Mon aprann ki bann mizisyen zot annan en lasosyasyon. Ki lasosyasyon pe fer pou zot zwenn avek novo lenstiti oubyen ki zot in fer zisteman pou zot kapab etal en plan travay konkret, direk e fran, pou nou konnen kote zot debout an relasyon avek bann aktivite ki byento mon mazinen ava demare avek bann restriksyon ki'n ganny tire.

Pou ki bann santer i benefisy, lavil i vin vivan. Bann distrik i komans demare avek nou bann aktivite pou ki nou tou nou lo menm paz ansanm avek kanmarad.

Alors Mr Speaker, mon ti a demande ki olye ki nou tou nou

asize nou mirmire, annou vin devan. Bann artis, bann mizisyen ki annan lasosyasyon vin devan, koste, koze avek novo lenstiti e fer Lasanble konnen ki zistans zot ete. Kwa ki zot anvi, ki zistans zot pe propoze.

En fason ki Desanm ler Bidze i vini pou nou konnen poudir si lenstiti pe demann sa, i an relasyon ek tel size, tel proze parske in ganny vin devan, e nou'n balanse, i annan en plan kler. La nou a kapab siport zot dan tou fason an relasyon avek sa ki zot anvi fer Mr Speaker.

Moutya i en size enteresan parey in ganny dir dan tou bann entervenan ki'n ganny fer. E mon santi poudir nou annan plezir bann dimoun ki'n ede dan en fason ou en lot pou zot elev Moutya pou ariv lo sa nivo parey Mosyon pe demande.

E letan nou pe koz moutya i toulstan fer referans avek bann lezot bout dan kiltir parey mon'n dir, par egzanp ladans tradisyonnal. Ladans tradisyonnal.

Ozordi kote ou ale si ou anvi aprann ladans tradisyonnal. Nou kanmtole. Mon rapel defen Marietta Matonbe ti fer li son devwar pou li toulstan fer bann laklas an

relasyon avek ladans tradisyonnelle.

Letan nou annan nou Festival Kreol ki nou ti fer tou le an, nou Festival Kreol ti balanse, i ti an relasyon avek ki Nou kiltir, nou sanson, nou fason pennyen. Nou fason reazir, nou fason konportman, oubyen ti'n zis vin en *business as usual*, zis nou fer laserenad dimoun i desann anvil. Sakenn i ganny en gro viena R25 e nou ganny en gro pet ki *Seybrew* i fer e nou *happy*.

Eski Festival Kreol pa en kiltir kot moutya i ganny promot oubyen lezot ladans, e nou bann artis i benefisye an relasyon avek sa.

E Bel Ombre Mr Speaker, mon annan Marcelin Monnaie, en santer ki'n egziste pandan plizyer lannen e li son sanson se "Bann Zennzan Katalog", pran legzant lo li'. E Marcelin Monnaie in en santer popiler.

Nou'n annan Rodolphin Marie-Thérèse, en Madanm ki sant byen moutya. Me pa neseserman in al lo sa nivo rikorde. E i en madanm ki dans byen moutya li osi.

E mon osi mazin defen Joachin Fanchette La Digue, avek son lekip ki toultan zot ti dan bann lotel. Zot in ale ziska aletranze, zisteman pou promot kiltir Sesel. E tousala se bann

zanfan Radegonde La Digue, e zot papa ti apel Pti Frer avek Manman Lucy. E zot ti annan sa koneksyon danse nou tradisyon e moutya an relasyon avek sa ki nou pe dir, Mr Speaker.

E mon krwar Mosyon Onorab Henrie in vin a en moman letan ekselan. Parey mon'n dir, *COVID* pe diminyen, karenm byento pou fini e mon pe demann tou bann Lazans konsernen pou zot vin devan avek bann program konkret.

Sa i Lasosyasyon Mizisyen, nouvo lenstiti pou Kiltir, Tourizm, Mer Lavil, *Local Government*, pou zot vin devan, pou zot travay ansanm, pou premyerman Mr Speaker, pou zot rode ki mannyer nou bann santer, nou bann mazisyen zot ganny ankadre dan tou laspe pou ki zot ganny en lasyet manze.

Swatraver lotel, swa dan lavil, swa dan bann aktivite ki kapab ganny fer byento.

Ki mannyer Minister Tourizm letan zot fer zot bann promosyon aletranze zot enkorpor bann promosyon ki apre tourizm letan i vin Sesel i ganny vwar zisteman parey mon'n koz lo Vilaz Kreol. Nou Vilaz Kreol bezwen vin en Vilaz Kreol, i pa kapab vin en vilaz

enporte. I bezwen vin reste Vilaz Kreol.

Alors Mr Speaker, mon pou donn Onorab *full* sipor an relasyon ek son Mosyon. Me selman an menm tan mon ti a kontan lans en lapel for deor pou li letan nou pe diskit sa Mosyon, nouveau lenstiti pou Lar, Kiltir zot osi zot pou bezwen zwe zot rol.

Zot pou bezwen annan en plan kler. E mon pe demann Lasosyasyon Mizisyen osi pou zot vin devan, eksprim sa ki zot santi, demande kwa ki zot ti ava kontan. Partaze, e tou bann lazans konsernen nou pou bezwen vin ansanm pou nou pa promot zis moutya, me pou nou promot nou bann santer ek mizisyen ek tou lezot laspe kiltir ki Sesel i annan, pou promot lo nivo nasyonal, swa lo nivo enternasyonal.

Avek sa Mr Speaker, mon pou dir avek Onorab Henri, mon pou donn ou *full* sipor e mon ti a kontan anvoy en meyer ve pou Mr Norville Ernesta ki mon aprann ki lasante pa tro, tro byen.

E mon ti a kontan dir tou bann lezot artis Mr Speaker felisitasyon pou sa travay ki zot in fer. Ki ou bater tanbour, ki ou danser moutya, felisitasyon pou kontinyen promot nou kiltir e anmenn nou pei lo en

nivo enternasyonal, zis parey moutya in arive lo nivo UNESCO. Ankor en fwa felisitasyon zot tou e mon ti a kontan remersi ou Mr Speaker.

(APPALUSE)

MR SPEAKER

Mersi. Eski mon pe tann en pti aplodisman pou Serzan pou son kontribisyen mizisyen.

(APPLAUSE)

MR SPEAKER

Mersi. Mon ava envit Onorab Henri pou fer rezimen lo deba lo son Mosyon.

HON GERVAIS HENRIE

Mersi Mr Speaker. Dabor mon ava dir mersi tou bann Manm Onorab ki'n entervenir lo sa Mosyon. Letan mon get bann rezyon ki zot in sorti, konmsi nou'n kouver tou rezyon. Malerezman La Digue zot lavwa pa'n rezonnen. Mersi Onorab *Chief Whip* ki ou'n mansyonn lafanmir Fanchette, Radegonde. Parski dan labsans Lopozisyon ozordi nou'n donn en pti bal, en pti moutya e nou'n fer li dan fason en konplo pou promouvwar moutya.

E kekfwa pou bann dimoun ki pe ekoute, ava dir be, ekout en kou, Dan en moman

kot nou pe fer fas avek COVID. Mon fek pe get bann statistik la, in mont en pti pe, sirtou lo Praslin apre ki zot in donn en pti bal. Dan letan kot lemonn pe fer fas avek en lager lo kontinan Lerop e pe enpakte lo pri komodite, pri lavi pe monte, akoz Lasanble pe koz lo moutya? Konmsi napa en keksoz pli enportan e irzan pou sa bann dimoun fer?

Me zisteman, nou panse krwar poudir sa konversasyon i pa zis kestyон divertisman. Dan bann komanter ki bann Manm ki'n koze, in dir poudir si nou regard sa propozisyon avek en lespri ouver, letan nou pe dir ki Lendistri Kiltirel i ede fer Moutya vin vivan koman parti nou divertisman e pou mentenir son stati koman en patrimwann mondyal, i pou annan en kantite retonbe pou bann endividé, pou bann fanmir, pou bann kominote e pei.

E alors nou pe regard li koman en *win-win situation* pou bann *stakeholders* ki dan sa Lendistri Lar, Kiltir avek leritaz e osi pei an zeneral.

Mr Speaker, mon kontan ou parol ki Onorab William ki'n segonn Mosyon in dir, ler in dir ler en keksoz i pou ou pran ka avek li. Ou protez li, ou prezerv li, ou valoriz li. E si nou fer sa

avek moutya i pou fer Sessel pli zoli, i pou fer Sessel pli sile. Mon pe pret parol sanson Jean Mark Volcy la.

E in annan bokou propozisyon apard bann ki mon'n fer. Bann manm ki'n koze in propoz en konkour moutya e sa i fer mon mazinen n epe dan lepok Festival Kreol, ti annan en konpetisyon ladans kanmtole. E bann distrik ti *look forward*, zot ti sanze tre byen. Zot ti dans tre byen. Mwan mon'n al get plizer sa bann konpetisyon. *Reef Hotel* pa ti ankor fermen.

Nou parwaze partou pou al gete. Mon ti ankor en zenn dyouk sa letan. I ti gou. Ti anmenn nou ansanm e ti vreman donn lavi dan nou pei.

So, nou pe sey demande pou sa retournen. Me pwen ki bokou Manm in dir, *what's next?* Ki pou arive? E zisteman mwan mon ti ava propoze ki letan nou fini sa Mosyon la, komite *Media, Youth, Culture Committee* i organiz, annou apel li en *symposium*.

A en moman rod en larzan. Lasanble i bezwen annan en larzan parla. Rod en lasal, kot Lakour i kapab pret nou. Anmenn bann *stakeholders* ansanm, annou kontiny sa diskisyon an deor Lasanble pou montre zot ki

mannyer nou enterese, apre nou ava fer en seri rekomandasyon koman en papye formel pou soumet avek sa lenstiti la.

E mon'n koz lo tou bann *stakeholders*, bann mizisyen, bann santer, bann *sponsors*, bann gran lakonpannyen ki kapab met larzan dan sa bann levennman. Minister Tourizm, Minister Ledikasyon pou regarde ki mannyer nou kapab met kiltir dan *curriculum*.

E ki alors i ava montre ki Lasanble nou enterese. Akoz sa retonbe pli tar e ki mannyer i pou ed pei. I annan manm ki'n koz lo bann lotel; bokou lotel ki bord ek lans. Mazinen en Vandredi apre midi, apre travay zot pe fer en Moutya *Night* ki komans byen boner letan soley pe kouse. Mon pe mazin Barbarons la, lepok ki mon ti pe al get Patrick Victor avek group Bwa Gayak fer son kabare. La i la, kabare.

Be ti pou vreman enteresan sa. E si ou pe fer sa, savedir bann lotel i kapab pran bann group dan kominote. Savedir i kapab annan bann kominote ki kapab met zot group ansanm, parey Onorab Roucou in dir nou. Nou selman sa bann group i ganny en debousman dan lotel, me i fer lavi dan kominote gou. Akoz

prezan zot kapab donn en moutya lo *carpark* Dominic Savio, apre i a ganny en pti kontra Barbarons. Donk mazin li koumsa, i annan en retonbe.

Dan en lepok Mr Speaker, dan nou listwar politik zis apre *one party state*, ti annan Biro Brans sa letan. Ziska kommela dimoun i dir Biro Ladministrasyon Distrik - Biro Brans. Tou Ladministrasyon Distrik sa lepok ti annan en group kiltirel. Letan mon ti NYS, toulstan mon ti monte, zot ti vin fer *show*.

Nou pa bezwen retourne dan sa lepok. Me mon'n vvar Onorab Roucou yer in mete lo *Facebook*, son Komite Kiltirel. I bann keksoz ki kekfwa fodre nou ankouraz nou bann dimoun pou partisipe. Pou fer lavi gou dan Kominote, pou nou ganny en lokipasyon. Pou nou pa asiz lo glasi ouswa anba pon. Me nou a ganny en keksoz pou nou fer.

E dimoun pe rode, be kot zot pou ganny lenstriman? Lot zour lo televizyon mon'n war en dimoun, sa msye mon pa mazin son non, me selman i ti bat tanbour dan Bwa Gayak, i en boug ki kapab fer tanbour moutya. E i ti pe dir avek Lotorite, si zot permet li en siper, kelkonk i a kapab fer.

Donk i annan tou sa bann debousman. En msye Beau Vallon sa. Wi, son pti non Piston.

E Onorab Kelly Samynadin in dir nou en keksoz. Nou ozordi nou pe diskit sa akoz nou bann Dirizan kominote. Me pli enportan nou Seselwa nou. E nou realize poudir nou pe perdi en keksoz ki si ozordi nou pa sezi loportinite pou fer sa ki nou ti'n merit fer depi yer, nou pou perdi.

Donk, se pour sa alors ki nou pe anmenn nou lavwa dan sa konversasyon. E mon kontan parol Onorab Roucou ki a plizer repriz in dir nou, zabitant fodre pran *ownership*.

Mwan ler mon ti pe grandi, ti annan en kantite travay volonter dan bann lannen '90. Be ki mannyer zot ti rekompans bann dimoun? Aswar Tann Manmzel ti donn son lari, bann granmoun la ti dans moutya. E prezant la mon pe mazin ler mon pe koze la, tou sa bann granmoun. Ton Jimmy, Tann Malali, Tann Pti Ser. Bann dimoun ki'n kit nou. Selman pou mwan, vwar la mon lanfans ki mon ankor mazinen e bann souvenir tre dou dan mon lespri.

Be mon ti ava kontan sa zanfan ozordi, sa lepok mon ti

annan 9an, 10an, mon ti ava kontan sa zanfan 9an, 10an ozordi, tout dan proteksyon ki nou pa ekspoze avek lalkol, pa ekspoz li avek bann lezot vilgarite nou sisyete kan lannwit in fer, me i kapab vwar sa bann keksoz, ki 40an disi, li osi i kapab rapel sa bann bon souvenir. Alors mon pa vwar naryen mal avek sa.

Ki bann artis i gannyen Onorab *Chief Whip* obor mwan in demande? Orizinalman dan mon prezantasyon mon'n dir ki ti ava byen bann artis i prodwir plis. Akoz Moutya i en lanmizik ki *cut across* tou laz dimoun. E dimoun pou aste, lanmizik pou vin popiler, bann *Music Award* fer kategori pou bann dimoun ganny en pri. E zot popilarite i fason ki nou Seselwa pou rapel zot.

Alors Mr Speaker, mon krwar poudir nou'n epwiz sa size ase byen. Bokou propozisyon in sorti. Me propozisyon pli enportan ki mon krwar mon oule souliny ankor, se ki Komite kiltir dan Lasanble Nasyonal i swiv. Nou fer en lot konversasyon an deor Lasanble.

Anfet ler mon pe koze la, Anbasader Kiltir, Mr Patrick Victor in pran kontak avek mwan, in dir mwan i apresye sa ki nou pe koze la e annou

kontinyen konversasyon. E en *forum* atraver MYCC, i ava en bon plas.

Mon ava termin avek en sitasyon, Mr Speaker. Koman Seselwa nou bezwen protez ki nou été. Nou bezwen reste konekte avek nou pase, avek serten valer sosyal, krwayans, koutim e tradisyon, ki pou permet nou idantifye nou avek lezot.

E ranforsi nou sans linite, lapartenans e lafyerte nasyonal. Dan en sanson, dan en ladans ki apel Moutya, tousala nou kapab met li dan en sel *package* e fer Sesel fyer. Fer Sesel pli zoli, fer Sesel pli sile. Mersi.

(APPLAUSE)

MR SPEAKER

Mersi Onorab Henrie. Avek sa mon ava apel bann Manm pou vot lo Mosyon. Manm ki an faver lev lanmen silvouple? Mersi. I annan Manm ki kont? Mersi.

Lo kestyon ki sa Lasanble i demann Lendistri Kiltirel Lokal pou fer moutya vin vivan koman parti nou divertisman e pou mentenir son stati koman patrimwann mondyal, 18 Manm in vot pour, o kont e 0 abstansyon.

Alors sa Mosyon in aprouve par Lasanble. Mon remersye bann Manm. Nou ava termin la pou ozordi. Nou a re zwenn koman Lasanble, Mardi prosen 9er. *Adjourn*.

(ADJOURNMENT)